

DXUS YUWE SAN JUAN FXI'JNI

Kristo naa kiwete vxyaani

¹ Nyafxiitey naa kiwe meeín, Kristo' ũsyã'kh yu'. Txã' Dxus yakhku ũsu', sa' Dxus íçxáak yu'.

² Nyafxiiteya' txã'wëk Dxus yakh ũssa yu'.

³ Dxusa' txã'sna neewe'weçxak kījkihñawa jxuka kvxiitu'j. Txãa pa'ga naa kiwete kījkihwa ũssa' jxuka txajx vxitniçxaçxáata'. Dxus yakh ũssa kījkihñawa vxitmeewaça', kīh yuhwa mee yuutxna.

⁴ Uuçxa ki' itxi yuuwa'ja's txãak ji'phu', sa' txãa íçxáak nasatx eena'te kaafxi'ze'jwa'jsa yu'.

⁵ Txãa eena'sa' çxhi'dxte kweethku, aça' çxhi'dxsa' fxīçxhaya' ãjame'.

⁶ Txãa eena'sa's tuuthe'jsa' teeçx piçthē'j Juan yaasesak yu' Dxus kaahni.

⁷ Txã' txãa eena'te kaafxi'ze'jwa'jsa's tuuthe'jsak yu', maawa txajx tuuthe'jni's wëse'jçxa Kristo's ũuste jxpagakahn.

⁸ Juan yu' eena'te kaafxi'ze'jwa'jsa meek yu', naasáa eena'te kaafxi'ze'jwa'jsa's tuuthe'jsaçxáak yu'.

⁹ Naapkaçxha' nasatx eena'te kaafxi'ze'jwa'jsa Kristo' naa kiwete vxyaaçxáak yu'.

¹⁰ Sa' vxyaaçxa' naa kiwete fxi'zena ũsu'k. Txã'wëtewa, naa kiwetewe'sxa' jiyumeeta', makwe txajx vxitnisaçxawa.

11 Txajx vxitni kiwete vxyaatewa, txajx ji'j j̄nisa' jxpa'gameeta'.

12 Makwe txajx ji'j j̄nisa jxpa'gameetewa, maaí yu' txā's nwēese'jçxa ũuste jxpa'gatx. Aça' txā'sna jxpa'gasatxi's Dxusa' txajx luuçx yuuwa'ja's ũsku.

13 Txāa pa'ga txāawe'sxa' naa kiwete neywe'sx kakweju kakwe yakh upxhi'tx neywe'sx jxthāasni txā'wēsameeta', txāawe'sxa' Dxus luuçx yuuna pa'jsata'.

14 Nyafxiitey Dxus yakh ũssa' nasaa kakwe's jxpa'gaçxa kwe'sx yakh ũsu'k, isasaçxá's pta'sxna peeygāhna. Txāa pa'ga kwe'sxa' txajx fxi'zeni wala zhiçxkwesa's uytha'w, txāasa jiitha'w Dxus Nçxi'k teeçxçxáasatewa.

15 Txā'snak Juana' tuuthe'jna na'j̄ina we'we:

—Adxa' na'snath pta'sxi' i'kwe'sxtxi: Adx e'ste yuja' txā' adx naa kiwete upxmeyna we'sxku yu', txāa pa'ga adxte jxthaakwesa' j̄inak pta'sx.

16 Aça' kwe'sxa' txajx peeygāani makwe ne' yu' txā'sa' jxukatha'w jxpa'ga jxukaysa.

17 Nyafxi' juuna' jxkaahnisa ley Moises nvxihtku txā'sçxáanatha'w jxpa'ga, naapkaçxha' Jesukristo' isa Dxus peeygāani'sku nuypa'j txā'snatha'w jxpa'ga.

18 Nawa maa yuhwa Dxusa's iuymeeta'. Txā'wētewa Dxus Nçxi'k teeçxçxáasa Ney yakh ih ũssa' kwe'sxtxi' kaajiyu'kh Dxus ma'wēsatewa.

*Jesus kimtewa Juan pta'sxni
(Mt 3.11-12; Mr 1.7-8; Lk 3.15-17)*

19 Jerusalente judiuwe'sxa' pějxya' kaahtx sacerdote vxite' levxitawe'sxtxi Juan kintewa jiyuya'.

20 Aça' Juana' âatek pta'sx:

—Adxa' Kristomeeth jïna.

21 Txajũ' ki'kin pějxtxi:

—Txã'wěçxa' ¿kinga? ¿Txãniitey Dxus yuwe pta'sxsa Elias wá'ga? jïte', Juan pasçxa':

—Txã'wěmeeth jïk.

Aça' ki'kin pějxtxi:

—Dxus yuwe pta'sxsa' pa'jana jï'tx txãa wá'ga jïte':

—Txãameeth jïnak pas.

22 Txajũ' ki'kin pějxtxi:

—Txã'wěçxa' idxa' ¿kinga? Idxa' kïh yũuna fxi'zesaçxawa mpeeta'sx. Txã'wěme', kwe'sxtxi jxkaahsatx pta'sxya' u'jwa'j jï'ptha'w jïte',

23 Juan pasçxa':

—Dxus yuwe pta'sxsa Isaiasa' na'jïnak we'we: Nasa u'pnimée kiwesu sus we'weni pthũusena: Dxus pa'jwa'ja's mpheu'jwe jïna, nawa adx tu-uthe'jna pekũhwa'ja's pta'sxnak txã'jï.

24 Juana's paapějxya' pa'jsa' fxariseowe'sx kaahnisatx yu',

25 sa' ki'kin paapějxtxi:

—Txã'wě Kristomeeth, sa' Eliaswa meeth, sa' Dxus yuwe pta'sxsa pa'jana jï'tx txãameeth jï'g sa' ¿kïjxa'çxáaga nasatx yu'te bautisaĩ'? jïte',

26 Juan pasçxa':

—Adxa' yu'teçxáath bautisaĩ'. Nawa i'kwe'sx ksxavxyte teeçx ũsa' txã'sa' jiimeene'kwe.

27 Txã' adx e'su vxyaana, nawa txã' adxte jxthaakwesa'. Aça' adxa' txajx pelgatxi tudni

wesçxáa yuhtxwa khihbxá' áhmeekwesath jĩnak pas.

²⁸ Juana' Jordan yu'wala kuteju sek kãani ju'gu Betábara yaasesatek txã'wẽ bautisãyna ũsu', açá' kxteetx txã'wẽ paapẽjxya' pa'jna ũsu'.

Kristo Dxus kaahni piisxakuẽ

²⁹ Kuskuskhẽ' Juana' Jesus yuhte uyçxa', na'wẽk we'we:

—Mthegwe, naaí Dxus kaahni piisxakuẽ', jxukaysa pkaltxi txudewa'jsa.

³⁰ Açá' adxa' txã'sna we'weçxath txã'wẽ pta'sx: Adx e'su teeçx piçthẽ'j vxyaana, txã' adxte jxthaakwesa', txã' naa kiwete adx upxmeyna we'sxku yu' txãa pa'ga.

³¹ Txã'sa' adxíi yuuwa jiimeeth yu' kimtewa. Nawa Israelwe'sx txã's jiyukahn yu'teçxáawa bautisãyna ũsu'th.

³² Juana' ki'kin we'wek na'jĩna:

—Dxus Espiritu's uythu cieluju tub çxihme na'wẽsa Jesus kajkwekhẽ kĩijaçte.

³³ Txã'wẽtewa, adxa' nee jímée iıçxáath yu' kimtewa. Nawa adxa's bautisãyya' kaahsa' pta'sxku: Espiritu's uyuune'ga teeçx piçthẽ'j kajkwete kĩijaçte', açá' txãa piçthẽ'ja' isa Dxus Espiritu's nasaa ũuste kxu'akhe'jsa yuuna jĩnak pta'sx.

³⁴ Açá' açxha' uyçxa', jiyuth Dxus Nçxi'ktewa, sa' txã'snath tuuthe'je'.

Kristo yakh u'jusa nyafxtewe'sx

³⁵ Vxite kuskuskhẽ' Juana' ki' kxtey ũsu'k txãa yakh u'jusa e'zsa yã'jçxa.

³⁶ Sa' Jesus jxkhẽuuçte uyçxa', Juana' na'jĩk:

—Mthegwe, naaí Dzus kaahni piisxakuẽ'.

³⁷ Txã'jini's wẽse'jçxa', txãa e'zsa' Jesus e'stey u'jtx.

³⁸ Aça' Jesusa' yu'thegçxa', txajx e'ste yuusatx uyku, sa' na'wẽk pẽjx:

—¿Kĩjkwe pakwé'? jĩte', txãawe'sx pasçxa':

—Kaapiya'jsa, ¿mteega u'pu'? jĩte',

³⁹ Jesus pasçxa':

—Mejkawe thegya' jĩk. Aça' txãawe'sxa' u'jçxa' jiyutx mtee u'psatewa. Sa' txãa yakh kxtee neeyũutx, kusuçyã'kh yu' naa pa'ga.

⁴⁰ Juan we'weni's wẽse'jçxa' Jesus e'stey u'jsa teeçxa' Adresku yaase yu', Simon Pedro nyakh.

⁴¹ Aça' Adresa' txajx nyakh Simon khuẽ'yna nyafxte pta'sxya' u'kh:

—Dzus tasxu yuusa Kristo jĩni's yuutha'w uy jĩna.

⁴² Txajũ' Adresa' txajx nyakh Simona's pe'jna kũjk Jesus ũsnite. Aça' Jesus uyçxa' na'jĩk:

—Idxa' Jonas nçxi'k Simon yaaseg, nawa ãçxha' Cefxas yaseni neeyũune'ga. Cefxas yu', Pedro jĩni'.

Fxelipe, Natanaelwe'sxtxi Jesus pa'yani

⁴³ Vxite kuskuskhẽ' Jesusa' Galilea kiwen u'jweççxa', Fxelipe's uyçxa':

—Adx yakh myuh jĩnak pi'kx.

⁴⁴ Fxelipe yu', Beçaida çxhabte u'psak yu', Adres Pedrowe'sxwa txãa çxhabteywe'sxtxi yu'.

⁴⁵ Aça' Fxelipe' Natanaela's pta'sxya' u'jçxa' na'jĩk:

—Moisesa' teeçx piçthẽ'ja' vxyaana jĩnak fxi'j ley libroute, aça' Dzus yuwe pta'sxsa

txãniiteywe'sxwa txã'snaíçxáatx tuuthe'jna fxi'j
txã'stha'w kwe'sxa' puutx uy. Txãa piçthê'ja'
Jose nçxi'k Jesusa', Nasaret çxhabetewe'sxa' jîte',
⁴⁶ Natanael pasçxa':

—Nasarette', ¿maaçxá' nasa ewsa kasejxa'
ãjama'k? jîte', Fxelipe pasçxa':

—Mejka wakx thegya' jîk.

⁴⁷ Txajũ' Natanael utxaana kũjuçte Jesusa'
uyçxa', na'jîk:

—Naa piçthê'j yuuçxa' Israel nwe'sx jxpub-
asamée nasa ewsa yuh yu'ga.

⁴⁸ Txã'jîte', Natanaela' pějxku:

—¿Ma'wē yuuçxaga adxa's jiyu? jîte', Jesus
pasçxa':

—Fxelipe pa'yameyna, idxa's uythu higwera
fxtũu tasxte u'pte jîte',

⁴⁹ Natanaela' na'wēk pas:

—Idxa' Dxus Nçxi'kgu, Israelwe'sxtxi jxkaahsa
jîte',

⁵⁰ Jesusa' na'jîk:

—Txã'wē higwera fxtũu tasxte u'pte idxa's
uythu jîteçxáa ¿adx kintewa jiyuwá'ga?
Txã'wēyã'jçxa', naajũyã'ja' Dxus kaavxya'ja'jnix
wejx walasatx uyuune'ga jîk.

⁵¹ Sa' ki' we'weçxa':

—Adxa' isath we'we': cielu phaateçxa ũste',
Dxus angeleswe'sxa' kîhna tejkana ũste uyu-
une'kwe Dxus Nçxi'k Nasa Yuusáa kajkwekhē
jîk.

2

Kaná çxhabte ptamunisa

1-3 Tekh en skhēwniite', Galilea kiwesu Kaná çxhabte ptamusáa ũsu'tx. Aça' Jesuswa pi'kxni pa'jçxa ũsu'k, txãa yakh ih u'jusawe'sx yã'jçxa. Jesus nji'jwa kxtee ũsu'k, naapkaçxa' vxino pçuute', Jesusa's na'jĩnak pta'sx:

—Vxino pçuk jĩk.

4 Aça' Jesusa' na'wēk pas:

—¿Kĩh yũukahnkwe adxa's txã'wē pta'sxi? adx en yuu āhmeya' jĩte',

5 nji'ja' kxtee selpisaawe'sxtxi na'jĩk:

—Txãa ma'wē jxkaathe', kxtey myũuwe jĩna.

6 Kxte' seis kiwe mitxh walasatx ũsu'. Txãa yu' judiuwe'sx khweeçxawa'j yu' awnisatx yu'. Mitxh iisa oçxenta meeçxawa cien litro yu' khēesatx yu'.

7 Txajũ' Jesusa' jxkaakh kxtee selpisaawe'sxtxi':

—Naa mitxhsu jxuka yu' uta mawwe jĩte', kxtey yuutx.

8 Txajũ' Jesusa' na'jĩnak we'we txãawe'sxtxi':

Naa mitxhte le'çxkuē pa'kxçxa boda namu's me'jwe yusya' jĩte', txãawe'sxa' kxtey yuutx.

9 Txajũ' boda namu' tudxçxawa, jiyume' yu'a's txã'wē vxino vxitnitewa. Kxtee selpisaawe'sxçxáatx jii yu', yu'a's txã'wē vxino vxitnisatewa. Txajũ' boda namu' ptamusa's pa'yaçxa

10 na'jĩnak we'we:

—Maawa vxino ewsa's khuē'ytxi nyafxte yusu' pi'kxnisatx, txãa e'sutx vxino açxamée ewsa's yusu'. Nawa idxa' txã'wē yũumée vxino wejx ewsa'sgu nmehte yus jĩk.

11 Jesusa' Galilea kiwesu Kaná çxhabtek txã'wē kim yuhwa ājānimeesa's kaavxya'j. Txã'wē

yũuçxak txajx ewuni's khiyu'j, aça' txãa yakh u'jusawe'sxa' jiyutx Jesus kintewa.

¹² Txãa e'su' Jesusa' Kapernaum çxhabnak u'j, txajx nji'j vxite' txajx nyakhwe'sx, txãa yakh u'jusawe'sx yã'jçxa.

*Dxuus yatte txweyna ũssatx Jesus kasxisxni
(Mt 21.12-13; Mr 11.15-18; Lk 19.45-46)*

¹³ Judiuwe'sx fxiesta Paskua en ajãçte', Jesusa' Jerusalen çxhabna u'kh.

¹⁴ Sa' dxuus yatte u'kaçxa', bwey, piisxáa, tub çxihmetx txweyna ũstek uy, vxite' vxyuu yu'pthehna ũssatx.

¹⁵ Sa' Jesusa' txã'wẽ yũuna ũste uyçxa', kha'txa pheu'jçxa eka kasxisxku nasa vxite' niimaltxi jxuka. Sa' txã'wẽy vxyuu yu'pthehna ũsni mesatxwa jxuka pũsxku petx vxyu yã'jçxa.

¹⁶ Sa' kxtee tub çxihme txweysatxi' na'jĩk:

—Naatxi' ayjxu jxuka mkaasxisxwe. Adx Tata yatte' txweyna vxyuu yu'pthehna ũswa'jme'.

¹⁷ Txã'jĩte', Jesus yakh u'jusawe'sxa' yajkxtxi Dxus libroute na'wẽ fxi'jni's: Dxuus yatte' ewmée yũuni's weh yuhwa peejxmeeth jĩni's.

¹⁸ Txajũ' judiuwe'sxa' ũusçxa we'wenatx pẽjx:

—Kim jxkaathe txã'wẽ yũuçxawa, kwe'sxtxi mpeeta'sx jĩte',

¹⁹ Jesus pasçxa':

—Naa dxuus yata's pẽxtewa, adxa' tekh ente' ki' kiisya' ajãwa'jsath.

²⁰ Txajũ' judiuwe'sxa' iiveeçx we'wena na'jĩtx:

—Naa dxuus yata's kuarenta y seis anxutetx txahna jxã'j, aça' idxa' ¿tekh enteçxáa txajxa' ewuudxijíima'g?

21 Nawa Jesusa' txajx kakwe'sku dxuus yata' jĩna we'we'.

22 Aça' uuçxa ki' ãtxi yuute', txãa yakh u'jusawe'sxa' yajkxtxi txã'wẽ we'weni's. Sa' Dxus libru' isane' we'we', aça' Jesuswa isasa's ãçxãane' we'we' sũhna ewtxi jiyu.

Jesus nasaa ũus yaakxnitx jiyuni

23 Judiuwe'sx fxiesta ente Jesus Jerusalente ũste', nasa wala kuh jiyutx Jesusa' Dxus tasxu yuusatewa, txã'wẽ kim yuhwa ãjãnimeesa's kaavxya'ja'pha'ga.

24 Nawa Jesusa' txãawe'sx ma'wẽsatewa jxuka jiyã'kh yu', txãasak txã'wẽ jiyutx sũju'çmẽe.

25 Txãa nasa' txã'wẽsata' jĩna pta'sxi peejx yu'çme', txãa pa'gatey nasaa ũus yaakxnitx jxuka jiyã'kh yu' naa pa'ga.

3

Jesus, Nikodemo yakh puutx we'weni

¹ Teeçx fxariseo Nikodemo yaasesa u'pu'k. Txã' judiu npiiçthẽ'jsatewe'sxku yu'.

² Txãa piçthẽ'ja' Jesus tasxte kus pa'jçxa', na'jĩk: Jiitha'w idxa's Dxusne' txã'wẽ kaah, kwe'sxtxi kaapiya'khan. Dxus pu'çxmeewaça', kim yuhwa ãjawa'jsame's kaavxya'ja'jmeena, idx na'wẽg yu' txã's jĩte', ³ Jesusa' na'wẽk pas:

—Isath we'we', maawa ki' upxmeeçxa yu', Dxus jxkaahna ũsnite u'kaya' ãjameena.

⁴ Txã'jĩte', Nikodemo' na'wẽk pẽjx:

—Nasa ãisxyã'jsa' ma'wẽ ki' upxya' ãjakx? Njĩ'j tutxhte ki' u'kaçxa upxya' ãjama'k? jĩte',

⁵ Jesusa' pta'sxku:

—Adxa' naa kakwe upxwa'ja's we'we'çmeeth. Maawa Dxus jxkaanite u'ka wēeçxa', yu'te vxite' Dxus Espiritute upxwa'ja'sthu txã'jĩ'.

⁶ Nasaa kakwe' nasaa kakweteyçxáak upxhi', naapkaçxha' Dxus luuçxa' Dxus Espiritutek upxhi'.

⁷ Maawa ki' upxwa'ja' jĩ'th açã' fxiy yuh txã'wē we'we'k sũhna yaakxnu.

⁸ Wejxa'swa ma'wēga susni's wēse'jçxawa, majũ yuhte ki' maa dxi'j u'jweçtewa ya'jiyu'çmée, txã'wēyku Dxus Espiritute upxni's ya'jiyu'çmée jĩte',

⁹ Nikodemo' jiyuya' ãjameeçxa' ki' pējxku:

—¿Ma'wē txã'wē yuja' ki' ya'upxhix? jĩte',

¹⁰ Jesus paçxa':

—Idxa' Israelwe'sxtxi kaapiya'jsaçxawa, na'wēsa yuutxi' ¿jiimeewá'ga?

¹¹ Isath we'we': Dxus Espiritute upxnisa' wejxa na'wēsaçxá' txã' ma'wēsatewa iiuythu sa' jiiçxath txã'jĩ'. Nawa i'kwe'sxa' jiyu'çmēei'kwe.

¹² Naa kiwetewe'sxtxi we'wena pta'sxte jiyumeeçxa', ¿ma'wē jiyuki'kwe cielutewe'sxna pta'sxte'?

¹³ Maa yuhwa cielute u'kasa yu' meeta', naasáa cielujũ kīisa yuuçxáa cielute u'kasa', Dxus Nçxi'k Nasa Yuusáa txã' cielutewe'sxa' naa pa'ga.

¹⁴ Dxus Nçxi'k Nasa Yuusa's ēekhē a'kxçxa ki'pni yuuna, Moiseswa ma'wēga nasa u'pnimée kiwete ũsçxa' ul weeswe's fxtũukhē a'kxçxa ki'p txã'wēy,

¹⁵ kxah maawa jxukay txã'sna uyçxa ũuste jxpa'gasa', bagaçxte yuhwa pçuwa'jmée ĩtxi fxi'zewa'ja's ji'phutxna vxitumée.

Dxusa' nasatx iiméh wala peeygãani

16 Dxusa' naa kiwete nasatx iiméh wala peeygãhçxa yuuçxáak txajx Nçxi'k teeçxçxáasanawa naa kiwete kaah, kxah maawa txã'sna ũuste jxpa'gaçxa' bagaçxte yuhwa pçumée itxi fxi'zewa'ja's ji'phukahñ vxitumée.

17 Dxusa' naa kiwete txajx Nçxi'ka's kaahçxawa, nasatx ewmeete nvxihtxa' kaahme', wejxwa nwe'weya'k kaah.

18 Maawa Dxus Nçxi'ka's ũuste jxpa'gasa', ewteyã'j neeyũutxna. Nawa txã'wě Dxus Nçxi'k teeçxçxáasana ũuste jxpa'gasame', ewmeeteyã'j neeyũuwa'jsata'.

19 Maawa ũuste jxpa'gasame', ewmeeteyã'jtx nvxiitni yu', txã'wě eena'sa naa kiwete kihtewa, ewmeeçxáa yũuna ũsçxa', çxhi'dxteçxáa wejx fxi'ze wěepa'ga.

20 Sa' maawa jxukay ewmeeçxáa yũuna ũssa', eena'sa's ahççxa utxa'çmeeta' eena'te, txãawe'sx ewmée yũuni áate vxyaakahmen.

21 Nawa ew yũuna fxi'zesa yu' eena'sa's utxa'tx, txãawe'sx ew yũuni' Dxus jxkaahnisatewa áate vxyaakahñ.

Jesusa's tuuthe'jni's wěse'jçxa' Juan weçxanú

22 Txãa e'su' Jesusa' Judea kiwen u'kh txãa yakh u'jusawe'sx yã'jçxa. Sa' kxte' maz en ũsu'k nasatx yu'te bautisãyna.

23 Juanwa bautisãynak ũsu' teeçx ahte Enon yaasesate Salim utxate, txãa ja'dasu yu' ũsu'k naa pa'ga. Aça' Juana' nasa wala kuh yu'te bautisãyku.

24 Karcelte kxupmeynaçxáak txã'wě bautisãy.

²⁵ Txajũ' judiuwe'sxa' Juan yakh u'jusawe'sxtxi paapējxtxi txã'wẽ bautisãyni's.

²⁶ Aça' txãawe'sxa' Juana's pta'sxtxi na'jĩna:

—Kaapiya'jsa, mwẽese'j. Sek kãani ju'gu Jordan yu'wala kutete ũste pta'sxgu txãa piçthẽ'jwa ãçxha' bautisãyna ũsa', aça' nasa jxukay txãa yakhçxaçxáa u'jweçta' jĩte',

²⁷ Juana' na'wẽk pas:

—Kim yuhwa txã'wẽ tuuthe'jni yuumeena, Dxus jxkaahnimeesa yu'.

²⁸ I'kwe'sxa' yaçtey adx pta'sxni's jiiyã'ji'kwe: Adxa' Kristomeeth, naasáa txajx yaçte kaahnisaçxáath jĩni's.

²⁹ Naa ejemplo's mjiyuwe: Ptamú ente' novxio' novxia yakhku u'pu'. Aça' novxio namiku' pukate u'pçxa' wala weçxweçxa yaaki'k novxio we'weni's wẽse'jçxa. Adxwa txã'wẽythu wala weçxweçxa yaaki', Jesusa's tuuthe'jni's wẽse'jçxa.

³⁰ Txã' jweeíçxáa tuhthesa yuuna u'jwena, naapkaçxha' adxa' jweeíçxáa ãhmeekwesa yu-uwa'th.

Jesusa' cielujũ kĩisa'

³¹ Cielujũ kĩisa' maatewa jxthaakwe tuhthesa'. Kiwete ũssa' naa kiwetewe'sxta', sa' naa kiwetewe'sxçxá'stxi pta'sxi'. Nawa cielujũ kĩisa' maatewa jxthaakwe tuhthesa'.

³² Txã'wẽçxaíik txajx wẽse'jçxa uyni's pta'sxi', nawa kim yuhwa nwẽese'je'çmeeta' txajx we'weni's.

33 Nawa txajx pta'sxni's maaçxáawa nwēese'jwaça', Dxusa' isak pta'sxi' sūhna jiyuna pa'jatxna.

34 Txã'wē Dxus jxkaahnisa' Dxus kwe'we'jni'sku we'we', txã'sa' Dxusa' txajx Espiritu's makwewa ũsu'k txãa pa'ga.

35 Neyá' Nçxi'ka's wedxçxa kīhnawa jxuka txajx kusete nvxihtku.

36 Aça' maawa Dxus Nçxi'ka's ũuste jxpa'gasa' pçumée ĩtxi fxi'zewa'ja's ji'phutxna. Nawa Dxus Nçxi'ka's nwēese'jsame' pçumée ĩtxi fxi'zewa'ja's ji'phumeetxna, naasáa Dxus kastigo seena'saçxá's jxpa'gawa'jsata'.

4

Teeçx u'y Samariatewe'sx yakh Jesus puutx we'weni

1 Txã'wē Jesus tasxte nasa wejx wala utxaate', Jesusa' Juante jxthaakwe bautisāyni's fxariseowe'sxa' jiyutx.

2 Isa yu' Jesusa' bautisai'çme', naasáa txãa yakh u'jusawe'sxçxáatx bautisai'.

3 Nawa txã'wē fxariseowe'sx jiyuni's Jesus wēse'jçxa', Judeajū kasehna u'kh, Galilea kiwen.

4 Nawa Galilea kiwen u'jweççxa', Samaria kiwegak khēwna u'jwa'j ji'phu'.

5 Sa' Samaria kiwesu' teeçx çxhab Sikar yaasesa ũsa' txãa çxhab peeku'thek pa'j txãa yakh u'jusawe'sx yã'jçxa. Txãa Sikar çxhaba' Jakob kiwe ũsku txajx nçxi'k Jose's txãa utxatek neeyū'.

6 Txãa kiwete' Jakoba' txãniitey yu' kutxi'jni kafx nvxihtna ũsu'ne', aça' Jesusa' ĕepxãh wahtxna u'jweçça', kxteek jxkaaseya' kaçx.

7 Naapkaçxha' teeçx u'y Samariasuwe'sxa' yu' pa'kxya' pa'the', Jesusa' na'jik:

—Yu' mpeeswe tudxwa'j.

8 Txãapkaçxha' txãa yakh u'jusawe'sxa' çxhabna ũ' weyya' u'jnitx yu'.

9 Aça' txãa u'ya' na'jĩnak pas:

—Idxa' judiu nasag, sa' ¿ma'wētega ũ'kwe's yu' thãasu'? ũ'kwe' Samariasuwe'sxthu açuja' jik. (Judiuwe'sxa' Samariasuwe'sxtxi ahççxa we'we'ççxãa yuhwa meeta'.)

10 Txajũ' Jesusa' pta'sxku:

—Dxusa' kĩh ũsya'watewa jiyuçxa txã'wēy yu' thãassa' kimtewa jiyuwaça', adxa's yu' thãasune'kwe, aça' adxa' yu' pçuwa'jmeesa's peesu'nja jĩte',

11 txãa u'ya' na'wēk pas:

—Naa kafxa' wala dxiaa', aça' idxa' yu' pa'kxwa'j ji'phmeeg. Sa' ¿ma'wēga ũ'kwe's yu' pçuwa'jmeesa's peesu'nja jĩ'?

12 Kwe'sx yaçgawe'sx Jakobku naa kafxa's phaade yu' pa'kxwa'j, aça' txajx nçxi'kwe'sxwa kxteetx pa'ki' tajkxtxi yuswa'j vxite' txãawe'sx tudxwa'j yã'jçxa. Aça' idxa' ¿kwe'sx yaçgawe'sx Jakobte jxthaakwe wãa walasane'ga? jĩte',

13 Jesus pasçxa':

—Jxukay maawa ayte yu'a's tudxsa' yũ'wēena nes yuutxna.

14 Nawa adx peesni yu'a's tudxçxa', bagaçxte yuhwa yũ'wēemeetxna. Txãa pa'gatey adx

peesni yu'a' txãawe'sx ũuste yu'ĩçh na'wě nes
yuuna, pçuwa'jmée ĩtxi fxi'zewa'ja's ji'phukah.ñ.

¹⁵ Txã'jĩte' txãa u'ya' na'jĩnak pas:

—Txã'wěte', txãa yu'a's mpees, kxah
yũ'wěewame'nja, sa' peena yu' naa kafxte
pa'kxya' pa'jme'nja.

¹⁶ Aça' Jesus we'weçxa':

—I'kwe nmi'a's me'jwe pa'yaya', sa' txãa yakh
yuweene'kwe ayte' jĩte',

¹⁷ txãa u'ya':

—Nmi' ji'phmeeth jĩnak pas.

Txajũ' Jesusa' na'jĩk:

—Nmi' ji'phmeeth jĩçxa' isa yuh we'we'i'kwe.

¹⁸ Txã'wě nyafxíi yu' tahç nmi'i'kwe ji'phu',
nawa ãçxwe'sxa' nmi' me', aça' isa yuh
we'wei'kwe.

¹⁹ Txã'wě wěse'jçxa', txãa u'ya' na'jĩnak pas:

—Idxa' Dxus yuwe pta'sxsaií ne'ga sũju'th.

²⁰ Kwe'sx yaçgathē'jwe'sxa' naa vxiçtetx
Dxusa's neewe'weya' pkhaakhe'. Nawa judi-
uwe'sx yu', Jerusalenteçxáa Dxusa's neewe'weya'
pkhaakhewa'ja' jĩ'i'kwe jĩte',

²¹ Jesus pasçxa':

—Ew mjiyuwe: naa vxiçte meeçxawa
Jerusalenteçxáa Dxusa's neewe'wewa'jme'.
Dxusa's mteewa neewe'wewa'j en ãjana.

²² Samariatewe'sxa' Dxusa's ma'wě
neewe'wewa'ja'swa jĩmeei'kwe. Nawa
judiuwe'sxa' jĩiçxatha'w Dxusa's neewe'we',
nwe'wesa' judiu nwe'sxa' naa pa'ga.

²³ Dxusa's neewe'wewa'j en ãjana jĩ'th txãa
ena' ãjxã'kh. Aça' maawa ĩsxiimée ũusuh jxuka

yajkxçxa Dxusa's ũusteçxáa neewe'wesa' ew yu-
utxna, kwe'sx Tata' txã'wẽ yũuni'sku jxthãasu'
naa pa'ga.

²⁴ Dxusa' kwe'sx na'wẽy kakwe ji'phme' na'
mtee mteewa ũsa', aça' txã'sna neewe'wesa'
ũusuh jxuka yajkxçxa neewe'wewa'ja' jĩte',

²⁵ txãa u'ya' na'wẽk pas:

—Ũ'kwe' jiith Kristo Dxus tasxu yuhna, aça'
txãa pa'jçxa jxuka ew pta'sxina jĩte',

²⁶ Jesus pasçxa':

—I'kwe yakh puutx we'wena u'psa adxíi Dxus
tasxu yuusath jĩk.

²⁷ Naapkaçxha' txãa yakh u'jusawe'sxa' sx-
awedna pa'jtx. Sa' Jesusa' txã'wẽ txãa u'y
yakh puutx we'wena ũste uyçxa', kuh yajkxnatx
neeyũu. Nawa ¿kĩjxa'ga txãa u'y yakh puutx
we'we'? jĩna maa yuhwa paapẽyi'çmeeta'.

²⁸ Txajũ' txãa u'ya' mitxha's kxtee txahna' u'kh
çxhabsu nasatx pta'sxya':

²⁹ —Naa kiwete ma'wẽ fxi'zeni'swa teeçx
piçthẽ'j jiyuk txã'sa' myuhwe thegya'. Txã'
Kristo ína jĩna pta'sxte',

³⁰ çxhabetewe'sxa' thegya' u'jtx Jesus ũsnite
pa'j.

³¹ Naapkaçxha' txãa yakh u'jusawe'sxa' Je-
susa's na'jĩnatx we'we:

—Idxa', ¿wẽemeegá'? Pan mẽ' jĩna.

³² Nawa Jesusa' na'wẽk pas:

—I'kwe'sxa' jiimeei'kwe adx kĩh ũ'wa'j
ji'phtewa.

³³ Txã'jĩte', puutx paapẽyi'tx txãawe'sx
pwe'sx:

—Meeçxa' ¿maa nasa puuçya' kūhwá'ntakx? jīna.

³⁴ Aça' Jesusa' na'wēk pta'sx:

—Adx Tata jxthāasçxa mjīiya' kaahni's kxtey yuuniçxáa, adx ũ'ni na'wēsa'.

³⁵ Ũ' thē'jwa'j pahz a'tey peejxa' jī'i'kwe i'kwe'sxa'. Nawa txā'wēme'. Mjīinisū mthegwe wakx, jxuka thē'jniyā'j ũsa', aça' pkhakhwa'jçxáa yā'j peejxa'.

³⁶ Pkhakhna mjīisa' deweni's jxpa'gawa'j jī'pha', aça' txāa pkhakhnisa' pçuwa'jmée itxi fxi'zewa'jsata', kxah uuhsa' pkhakhsa yakh ja'daçxah weçxweçxa yajkxna neeyūutxna e'zīi.

³⁷ Teeçxsa' uja'k, naapkaçxha' vxite' pkhakhe'k jīni' isa yuja'.

³⁸ I'kwe'sxa' uuhsameei'kwe, nawa adxa' pkhakhya' kaath vxite nasa uuhnisu jīk.

³⁹ Txā'wē txāa u'y ũ'kwe ma'wē fxi'zeni'swa jxuka jiyuk jīna pta'sxpa'ga, txāa çxhabte nasa kuhsa' Jesusa's ũuste jxpa'gatx.

⁴⁰ Sa' Jesus ũsnite thegya' pa'jçxa', Jesusa's wala neevxisxatx txāawe'sx yakh kxtee pta'sxna neeyūukahn. Aça' e'z enku kxtee fxi'ze, Dxus yuwe's pta'sxna.

⁴¹ Aça' txā's wēse'jçxa', Jesusa's ũuste jxpa'gasa' jweeīçxáatx pehna.

⁴² Sa' txāa u'ya's na'wētx we'we:

—I'kwe pta'sxniçxá's jiyumée, kwe'sx yu-utha'w txajx we'weni's wēse'jçxa' jiyu Dxus tasxu yuusa Kristotewa, maatxwa jxuka nwe'wesa.

⁴³ Txajū' e'z en skhēwniijū', Jesusa' Samariajū kasehna u'kh Galilea kiweníi.

44 Jesusíi we'weçxawa: Dxus yuwe pta'sxsa' maa yuhwa peekx kiwete yu' wedxni fxi'ze'çmeeta' jĩk txãasak Galilean u'j.

45 Aça' Galileate pa'the', kxteewe'sx yu' wala weçxana jxpa'gatx, Jerusalen fxiestan u'jsa' uyne'ta Jesusa' ma'wẽ yũutewa txãasatx txã'wẽ yũu.

Teeçx ãçã'sa's Jesus nuykatxhini

46 Jesusa' Galilea kiwete pa'kh Kaná çxhabte, yu'a's vxino vxitku nyafxíi kxtee. Aça' kxtey teeçx piçthẽ'j ũsu'k ne'jwe'sxa's jxkaah pu'çxsa. Txã' teeçx nçxi'k wala ãça'sa ji'phu'k Kapernaum çxhabte.

47 Sa' Galileatey Jesus sxawedna pa'jni's jiyuçxa', txãa piçthẽ'ja' puutx uyna kũhçxa', na'jĩnak pxthaa we'we:

—Adx yatna mejka, adx nçxi'ka's nuykatx-hiya'. Txã'wẽme', uuçyã'ja' jĩte',

48 Jesus pasçxa':

—I'kwe'sxa' adx ãjani's kaavxya'ja'jmeete yu', adxa's jiyumeene'kwe kimtewa.

49 Txã'jĩte', txãa piçthẽ'j yu' na'jĩk:

—Dud myuh, adx nçxi'k uumeyna.

50 Txajũ' Jesusa' na'jĩk:

—Yatna sxawedna me'j. Iidx nçxi'ka' katx-hiyã'jçxa ũsa'.

Txã'jĩte', txãa piçthẽ'ja' Jesusa' isa yuh we'wene' sũhna yatna sxawedna u'kh.

51 Sa' yatte pa'jaçte', txã'sna selpisaawe'sx pu'thegya' kasehçxa' na'wẽtx pta'sx:

—Iidx nçxi'ka' katxhiyã'kh jĩna pta'sxte',

52 txãa piçthẽ'ja' pẽjxku:

—Adx nçxi'k ãçã'sa' ¿ma'wëga wëtkuë' yajkx?
jïte':

—Jũ'na la unatek kakwesek ûçxha jïnatx
pta'sx.

⁵³ Aça' neya' yajkxku txãa oratey Jesusa': Iidx
nçxi'ka' katxhiyã'jçxa ũsa' jïni's. Txajũ' txãa
piçthë'ja' Jesus kimtewa jiyuçxa' txajx ũuste
jxpaga'k, yattewe'sxwa txã'wëy.

⁵⁴ Txã'wë Judeajũ sxawedna Galileate pa'jçxa
ãça'sa's nuykatxhini yakha' e'z usyã'ja' Jesus
ãjani's kaavxya'ja'jni'.

5

Treinta y oçxo anxu ãçã'na ũssa's Jesus nuykatxhini

¹ Txãa e'su' judiuwe'sx fxiesta en ãjaçku yu',
aça' Jesusa' Jerusalenna ki' u'kh.

² Txãa çxhabte' ïikha'jni yu' ji'phu'tx piisxáa
ka'ga'jni vxitx utxate. Txã' Betesda yaase' hebreo
yuwete. ãça'sa pa'jçxa ũswa'j tahç ahtek txudeni
yu', yat pwa' na'wësa.

³ Kxte' wala kuh ãça'sa ũsu'tx, uyya'
ãjasamée, çxida puuplesa, vxite' ëseyá'
ãjasamée txã'wësatx ũythesna ũsu', yu'
ëseçpkaçxha' kxtee khëeya' sũhna.

⁴ Txã'wë maa enteya' Dxus angel kïhçxa yu'a's
këese'je'k, naapkaçxha' maa yaçte khëjena txã'
jxuka katxhiçxak neeyũ' kïh wee ji'phçxawa.

⁵ Kxteea' teeçx piçthë'j treinta y oçxo anxu
ãça'na ũssak txkaa ũsu'.

⁶ Aça' txã'sna Jesus uyçxa' txakwe txaçx ãça'na
ũste jiyuçxa', pëjxku:

—¿Katxhi wēega'? jīte',

⁷ āça'sa paşça':

—Yu' ēseçpkaçxa' yu'te adxa's akhwa'jsa kim yuhwa meeta'. Adx khēe wējeçpkaçxa' vxite khuē'y khēje'tx jīte',

⁸ Jesusa' na'jīnak jxkaah:

—Kiiteçxa iidx puşça deeni's tū'sçxa me'j jīçpkaçxa',

⁹ naa dudtey txāa piçthē'ja' katxhiyā'jçxak neeyūu. Sa' txajx puşça deeni's tū'sçxa u'kh.

Nawa judiuwe'sx ki'sni ente txā'wē dee pusni's tū'sçxa u'jweçte uyçxa',

¹⁰ judiuwe'sxa' na'wētx pējx txāa piçthē'j katxhisa's:

—Āçxa' ki'swa'j ena' aça' txā'wē tū'sçxa u'juwa'j ji'phmeeg jīte',

¹¹ txāa piçthē'ja' paşça na'jīk:

—Adxna nuykatxhisaíik txā'wē jxkaah: iidx puşça deeni's tū'sçxa me'j jīpa'ga txā'wē tū'sçxa u'jweçthu.

¹² Aça' judiuwe'sxa' ki'kin paapējxtxi:

—Txā'wē jxkaahsa' ¿kimga yu'? jīte',

¹³ txāa piçthē'j katxhisa' jiyuya' ājame' kim txā'wē nuykatxhitewa. Kxteea' nasa wala kuh ūste', txāa katxhisa' jiimeek yu' maa dxi'j kasehçxa Jesusa' u'thewa.

¹⁴ Txāa e'su' Jesusa' dxuus yatte txāa piçthē'j katxhisa's puutx uyçxa', na'jīk:

—Āçxa' katxhgu neeyūu na', naa weete jxthaakwe nxussa pa'khamen pa'yajkx mfxi'ze, ewmée yūuna u'jumée jīte',

¹⁵ txāa piçthē'j u'jçxa' judiuwe'sxtxi pta'sxku:

—Adxna nuykatxhisa' Jesusga yu' jīna.

¹⁶ Txāa pa'gatx judiuwe'sxa' Jesusa's ahçeçxa ikh wēe, ki'sni ente txā'wē āça'sa's nuykatx-hipa'ga.

¹⁷ Txajū' Jesusa' judiuwe'sxtxi na'wēk we'we:

—Adx Tata' naa entewa mjīina ūsa', txāa pa'gath adxwa mjī'.

¹⁸ Txā'jīte', judiuwe'sxa' jweeíçxáatx Jesusa's ikh wēena kiite. Txā'wē ki'swa'ja' jīna jxkaahni leyçxá's nwēese'jmée adx Tata' Dxusa' jī'k na' txāawa Dxus na'wēysath jī'ne' sūhçxatx txā'wē ikh wēena kiite.

Dxusa' Nçxi'ka's ĩtxi vxit-ya' ājawa'ja's ūsni

¹⁹ Txajū' Jesusa' na'wēk pta'sx:

—Isath we'we', adxa' Dxus Nçxi'kthu, nawa adxçxáa yu' mjīiya' ājame'nja. Adx Tata ma'wē mjīite', txajx mjīini's thegçxa yuuçxáath txā'wēy mjīiya' āja'.

²⁰ Txāa pa'gatey Tata' adxa's peeygāhçxa txāa kīh mjīiççxawa jxuka pta'sxi'k adxa's. Txāasa āçxh uyi'kwe txāate jweeíçxáa walasatx kaavxya'ja'jana, aça' txāatx uyçxa' i'kwe'sxa' kuh yajxna neeyūune'kwe.

²¹ Tata' ma'wēga uusaatx ĩtxi vxitu', txā'wēy adxwa ĩtxi vxitu'nja maatxwa.

²² Āçxha' Tata' yuuwesatx kastigāywa'ja's jxuka adxçxaçxáanak nvxiht, txāasa āçxha' yuuwesatx kastigāywa'ja's Tata' kim yuhtxwa thegwa'jsame'.

²³ Tata'swa ma'wēta nwēese'je', txā'wēy adx-nawa jxukaysa nwēese'khanku txā'wē yūu.

Adxna nwēese'jsame' adxna kaahsa Tata'swa nwēese'jsameeçxa txã'wē yuutxna.

24 Isath we'we': Maawa adx pta'sxni's jxpa'yajkx wēse'jçxa adxna kaahsa's ūuste jxpa'gasa', bagaçxte yuhwa pçumée ãtxĩ fxi'zewa'ja's ji'phutxna. Txã'wē yūusa' ewmeete nvxiitni yuumée, uuwa'ju kutxi'jçxa bagaçxte yuhwa pçumée ãtxi fxi'zewa'the nvxiitnisa yuuna.

25 Isath we'we': Pçumée ãtxi fxi'zewa'j en pa'jana jĩ'th txãa ena' ãçxhíia'. Aça' uusaawe'sxa' Dxus Nçxi'k we'weni's wēse'jçxa kxtey yuusá' ãtxi fxi'zewa'ja's ji'phutxna.

26 Txãa pa'gatey adx Tata' ãtxĩ vxit-ya' ãjãwa'ja's ji'pha', sa' adxnawa ūsku txã'wē ãtxi vxit-ya' ãjãwa'ja's.

27 Sa' yuuwesatx kastigãywa'ja'swa adxa'siıçxáak ūs, adxa' Dxus Nçxi'k Nasa Yuusath naa pa'ga.

28 Txã'wē Dxus Nçxi'k we'weni pthūusete', uusaawe'sxa' pedaniijū kasehwa'j en pa'jana jĩna pta'sxte', fxiy yuh we'we'k sūhna yaakxnuwe.

29 Txãa en ãhte', uusaawe'sxa' pedaniijū ãtxi yuuçxa kasejetxna, ew yūuna fxi'zesa' ewte u'jya', naapkaçxha' ewmée yūuna fxi'zesa' ewmeete u'jya' ãtxi yuutxna.

Jesus kimtewa kaajiyu'jsa

30 Adxçxáa yu' kījxa'wa ãjame'nja. Adx Tata jxkaatheçxáath yuuwesatx kastigaĩ'. Adx ūuste peekxçxáa yajkxçxa txã'wē yu'çmeeth, txãasa adx kastigãyni' isasata'. Adxna kaahsa ma'wē jxthãaste' txãaçxá'sthu kxtey yu'.

31 Adx ma'wēsatewa kimwa pta'sxwa'jsa ji'phméé peekxçxáa txã'wēsath jíte', isa yuhna sūhwa'ja's ya'ji'phu'çme'.

32 Nawa txã'wē ājawa'jsa yuja' jīna adx ju'gu we'wesa ūsa', aça' adxa' jiith txajx we'weni' isasa yuja'.

33 I'kwe'sxa' Juan tasxte paapējxya' kaaji'kwe, aça' txã' isa yuh pta'sxku adx kimtewa.

34 Adxa' naa kiwetewe'sx adx ju'gu we'weni's peejxmeeth. Nawa i'kwe'sxa' Juan pta'sxni's jiiyā'jçxa', thēymée ewte neeyūuwa'ja's pak-wekahnçxáath txã'jī.

35 Juana' eena'te kaafxiz'e'jwa'jsa's tuuthe'jsak yu', aça' i'kwe'sxa' wa'lmée i'kwe Juan pta'sxni's jxpa'gana ūsu' maz ençxáawa.

36 Nawa adxna tuuthe'jna isa pta'sxsa yu' mazwa ji'pthu, Juan pta'sxnite jxthaakwesa. Adx mjīini' adxna tuuthe'jna isa pta'sxsata'. Na'wē mjīith nawa adx Tata jxkaahniçxáatxthu txã'wē yu', Dxus kaahnisa yuh yu'ne' sūjkahn.

37 Txã'wēy adxna kaahsawa isak pta'sxi' adxa's tuuthe'jna. Txã'wētewa, i'kwe'sxa' bagaçxte yuhwa txajx we'weni's iiwēse'jmeene'kwe, sa' txã'sa' iuuywameene'kwe.

38 Sa' txajx kaapiya'jni'swa i'kwe'sx ūuste ji'phmeene'kwe, txāasa i'kwe jxpa'gaya' ājā'çmée, adxa's Tata kaathewa.

39 I'kwe'sxa' jxpa'yajkx i'kwe leeĩ', pçumée ãtxĩ fxi'zewa'ja's ji'phuya'. Aça' txāa libru' adxa's pta'sxsaĩçxá'.

40 Makwe txã'wēçxawa, i'kwe'sxa' adx tasxte utxa'çmeei'kwe ãtxĩ fxi'zewa'ja's ji'phuya'.

41 Naa kiwete nasa adxa's tuuthe'jni's jx-thãasu'çmeeth.

42 Adxa' i'kwe'sxtxi ew jiith, i'kwe'sxa' Dxusa's wedxi'çmée i'kwe.

43 Tata kaathe' yuwe'th, nawa i'kwe'sxa' adxa's jxpa'ga'çmée i'kwe. Nawa Dxus kaahnisamée vxite pa'jwaça', txãa yu'sa' jxpa'gane'kwe.

44 ¿Ma'wē yūuça adxa's jxpa'gaya' ājaki'kwe, nasaa pwe'sx puutx ew tuuthe'jniçxáana jx-thãasçxa, Dxus teeçxçxáasa tuuthe'jni yu'sa' jxpa'gameeçxa'?

45 Adx Tata tasxte i'kwe'sxtxi ewmée yuwe ũswa'jsana sūjuwá'kwe adxa' txã'wēmeeth. Txã'wē i'kwe'sx ma'wēsatewa adx Tata tasxte pta'sxsa' Moisesiçxá', i'kwe'sx nakwe wala ewçxáa we'we'i'kwe txãa.

46 Moises we'weni's jiyuwaça', adxa's jxpa'gane'kwe, Moisesa' adxnaíçxáak tuuthe'jna fxi'j naa pa'ga.

47 Nawa txajx fxi'jni's jxpa'gameeçxa', ¿ma'wē adx we'weni's jxpa'gaya' ājaki'kwe?

6

Cinko mil nasatx Jesus sã'jñi

(Mt 14.13-21; Mr 6.30-44; Lk 9.10-17)

¹ Txãa ensu' Jesusa' Galilea íkh kuten u'kh, txãa íkha's Tiberias jĩ'tx.

² Txã'wē naa kiwete kim yuhwa vxitya' ājanimeesa's kaavxya'ja'jna āça'satxwa nuyçxhãçxhapa'ga, nasa wala kuh pkhaakhena Jesus e'stey u'jtx.

³ Aça' Jesusa' thã'j vxiçna u'jçxa kxtee kaçxku txãa yakh u'jusawe'sx yã'jçxa.

⁴ Txajũ' Judiuwe'sx fxiesta Paskua en ãjaçku yu' txãa ensu'.

⁵ Aça' nasa wala pkhaakhena yuhte uyçxa', Jesusa' Fxelope's na'jĩnak pẽjx:

—¿Mtee ũ' weyuukxtha'w nasa jxukaysatx puuçwa'j?

⁶ Nawa Jesusa' Fxelope ma'jĩtewa jiyuya'çxáak txã'wẽ pẽjx, ma'wẽ yũuwa'ja'swa jxuka ji-iyã'jçxawa.

⁷ Aça' Fxelope' na'wẽk pas:

—Dos cientos peso pan weyçxa jxukaysatx pe'ltedeçxa peesu'swaçwa, ãhmeena jĩte',

⁸ Jesus yakh u'jusa Simon Pedro nyakh Adresa' na'wẽk pta'sx:

⁹ —Ayte teeçx kuẽ e'z wedx taç cebada pan ji'phsa ũsa'. Nawa kxazçxáasa yuja' ¿ãhma'k? jĩte',

¹⁰ Jesusa' txãa yakh u'jusawe'sxtxi': Mkaaçxi'jwe jxukaysatx jĩnak jxkaah. Aça' cinko mil piçthẽ'jsa kxaazkuẽesay txaksu kaçxna skhẽwtxi.

¹¹ Aça' Jesusa' pantxi' jxpa'gaçxa', Dxusna weçxana'wa txãa yakh u'jusawe'sxtxi ũsu'sku. Aça' txãawe'sxa' kxaazkuẽesaytxi puuçna skhẽwtxi subapkaçx. Wedxnawa txã'wẽytxi yũu, makwe ũ'çxawa txikpkaçx.

¹² Txajũ' jxukaysa txikna skhẽwte', Jesusa' jxkaakh txãa yakh u'jusawe'sxtxi':

—Jxuka mepkhakhwe pe'la kijxasaatxi' kĩhwa vxitukahmen jĩte',

13 doce kanastate utatx pkhakh txãa tahç ce-bada pan kijxasaatxi'.

14 Txã'wê Jesus yuuçxáa maa yuhwa ãjanimeesa's vxitte uyçxa', nasa' na'wêtx weçxana we'we:

—Naa yuuçxá' isa Dxus yuwe pta'sxsa yuh yu'ga, naa kiwete pa'jana jĩ'tx txãaga yu' jĩna weçxaçxa', ãadxijimée jxkaahwa'jsa ki'pxa'watx yu'. Aça' Jesus jiyuçxa',

15 txãaçxáa txuteena u'kh thã'j vxiçte pa'j.

Ĩkh kajkwega Jesus u'juni

(Mt 14.22-27; Mr 6.45-52)

16 Çxhi'dxna kīinite', Jesus yakh u'jusawe'sxa' ĩkh pukate kīhçxa,

17 barkote khēena'wa ĩkhuy ktejkana u'jtx Kapernaumte pa'jya'. Txã'wê jxuka çxhi'dxni yã'thewa Jesusa' sxawedna kīhmeyna,

18 barko ĩkhuy u'jweçpkaçxha', wejxaa wala kiiteçxa ĩkha's seena' wala kēese'kh.

19 Txã'wê seena' yuuçtewa ĩkh pxāhsu jxu'j u'jweççxa', Jesusa's ĩkh kajkwesu yuhte uytxi, sa' wala ũukhtxi.

20 Aça' Jesusa' na'wêk we'we:

—Ũukhnuwe, adxthu jĩte',

21 wala weçxana jxpa'gatx barkote. Sa' yaakxn-imeete naa dudtey ĩkh kutete pa'jtx.

Nasa' Jesusa's pakwení

22-24 Kuskuskhē' Jesusa' kxtee meeyã'the', txãa yakh u'jusawe'sxwa meete', nasa' barkote khēena' u'jtx Kapernaum çxhabna Jesusa's pakweya'. Txã'wê Jesus yakh u'jusawe'sx teeçx barkote khēeçxa u'the', Jesus yu' txãawe'sx

yakh u'jmeetewa jiyuçxane'ta pakweya' u'jna ũsu' îkh kuteju nasa neeyũusa'. Jesusa' Dxusna weçxaçxa pan puuçku txãa ja'date barko pa'jne'ta Tiberias çxhabuh yuusa, aç'a' txãatetx khêeçxa pakweya' u'j.

Û' cielujũ kũisa

²⁵ Sa' îkh kutete pa'jçxa Jesusa's uyçxa pějxtxi:

—Idxa' ¿ma'wěnga ayte pa'j? jĩte',

²⁶ Jesusa' na'wěk pas:

—Isath we'we', i'kwe'sxa' pana's txikpkaçx ũ'çxaçxáa i'kwe txã'wě adxa's pakwé'. Nawa adx txã'wě maa yuhwa ãjanimeesa's vxitthu txã's yu' jiyuçxa txã'wě yu'çmeei'kwe.

²⁷ Txik ũ'çxa fxi'zewa'jçxá's pakwewa'jme', wejxwa ũ' багаçxte yuhwa pçumée ĩtxi kaafxi'ze'jwa'jsa's pakweewa'ja'. Aç'a' Dxus Nçxi'k Nasa Yuusa' txã'wě pçumée ĩtxi fxi'zewa'ja's ũsu'nja, txã'wě yũuwa'ja's adx Tata' ũsku naa pa'ga jĩk.

²⁸ Txã'jĩte', na'wětx pějx:

—¿Ma'wě yũukxtha'w Dxus jxkaahnitxi' kxtey yuuna fxi'zey'a? jĩte',

²⁹ Jesusa' pta'sxku:

—Dxus jxkaahnitxi' kxtey yuu wěeçxa', adxa's mpa'gawe, adxa' Dxus kaahnisath naa pa'ga jĩk.

³⁰ Aç'a' ki'kin pějxtxi:

—Idxa' Dxus kaahnisane'ga sũhna kwe'sx ew jiyukahn açxha' ¿kĩh kaavxya'ja'jya'waga?

³¹ Kwe'sx yaçgawe'sx manteywe'sxa' nasa u'pnimée kiwesu u'juçxa', ũ' maná yaasesa's ũ'tx. Aç'a' txã'wě yũuni's Dxus libroute na'wěk we'we': Dxusa' cielujũ ũ'a's puuçku jĩ'k.

³² Aça' txã'jïte', Jesusa' na'wëk pas:

—Isath we'we', cielujũ ù'a's Moises puuçme'. Cielujũ ù'a's adx Tatak puuç.

³³ Aça' Dxus puuçni ù' cielujũ kïisa' naa ki-wetewe'stxxi pçumée ïtxi kaafxi'ze'jwa'jsa'.

³⁴ Txã'jïte', na'wëtx pëjx:

—Kwe'stxxi jxpe'jsa, cielujũ kïisa ù'a's pejka puuçune'ga kwe'stxxiwa jïte',

³⁵ Jesusa' pta'sxku:

—Û' ïtxi kaafxi'ze'jwa'jsa' adxthu. Aça' maazkuëesawa adx tasxte pa'jsa' bagaçxte yuhwa wëemeetxna. Sa' txã'wëy adxna ùuste jxpa'gasa' peena yu' yũ'wëemeetxna.

³⁶ Adxa' kimçxawa i'kwe'stxxi pta'sxyã'th, nawa i'kwe'sxa' makwe uyçxawa, adxa's cielujũ kïisana sũju'çmée i'kwe.

³⁷ Makwe i'kwe'sx yu' adxa's jxpa'gameetewa, adx jxpe'khan Adx Tata dukhnisawe'sx yu' jxukaysa adx tasxteçxaçxáa pa'jatxna. Aça' maawa adx tasxte pa'jsatxi' ahçemée weçxana jxpa'ga'nja.

³⁸ Txã'wë cielujũ kïhçxawa peekx adx ùus yaakxniçxá's kxtey yuuya' yuwe'çmeeth. Adx Tata ma'wë yũukaathe' txã'sçxáanath kxtey yu-uya' yuwé'.

³⁹ Adx Tata' adx jxpe'khan dukhnisatxi' teeçxçxáa yuhwa ivxiitu jxthãasu'çme', kxajíi adxa' nmeh ente' ki' ïtxi vxitu'nja.

⁴⁰ Adxna kaahsa jxthãasni' na'wë': maawa jxukay Dxus Nçxi'ka's ùuste jxpa'gasa' pçumée ïtxi fxi'zewa'ja's ji'phu jxthãasu'k. Txãa pa'ga

txã'wẽ ùuste jxpa'gasatxi' adxa' nmeh ente' ki' ìtxi vxitu'nja.

⁴¹ Txã'wẽ adxíi ù' cielujũ kīisath jīpa'ga judi-uwe'sxa' Jesusa's açewe'weya' takhtxi:

⁴² —¿Naa pihçíi Jose nçxi'kmeená'? Sa' çma'wẽga cielujũ kīisath jīna we'we'? Txã'jikahmeníi kwe'sxa' txajx neywe'sxtxi ew jīitha'w.

⁴³ Txajũ' Jesusa' txã'jīni's jiyuçxa', na'wẽk we'we:

—Maa yuhwa txã'wẽ açewe'wen ùswa'j jī'phmeei'kwe.

⁴⁴ Adxa' Tata jxkaahnisath açá' txãái' adx tasxte kuutxa'the yuuçxáa txãatxi' jxukaysatx nmeh ente' ìtxi vxitu'nja.

⁴⁵ Txã'wẽ yūuwa'ja's Dxus yuwe pta'sxsa li-brute na'wẽ fxi'jni ūsa': Dxusa' kaapiya'jana jxukaysatx çjī'çmeená'? Kxajíi maawa adx Tata kaapiya'jni's wẽse'jçxa txajx jxkaahnitx kxtey yuusa yuuçxáa adx tasxte pa'jatxna.

⁴⁶ Maa yuhwa Dxusa's iuymeeta'. Adx yuuçxáa Dxus tasxu yuusath na' txã'sna iuuythu.

⁴⁷ Adxa' isath we'we': Adxa's jxpa'gasa' pçumée ìtxí fxi'zewa'ja's jī'phutxna,

⁴⁸ txãasa pçumée ìtxí kaafxi'ze'jwa'jsa ū'a', adxthu.

⁴⁹ Kwe'sx yaçga manteywe'sx nasa u'pnimée kiwesu u'juçxa' maná yaasesa's ū'çxawa, pejka uu ena's jī'phutx.

⁵⁰ Nawa adxa' cielujũ kīisa ū'a'sthu pta'sxi', txã'sna ū'çxa' uukahmen.

⁵¹ Adxíi cielujũ kīisa ū' ìtxisath. Maawa txãa ū'a's ū'sa', багаçxte yuhwa uumée ìtxi

fxi'zewa'ja's ji'phutxna. Aça' ũ' adx ũsu'nja txã' adx kakwe', kxah maa nasawa pçumée itxi fxi'zewa'ja's ji'phukahñ txã'wě adx kakwe's ũsu'nja.

⁵² Txã'jĩte', judiuwe'sxa' na'wětx puutx ya'paapēyi':

—Naa piçthē'ja' ¿ma'wě txajx kakwe's kwe'sxtxi puuçya' ājakx? jĩte',

⁵³ Jesusa' na'wěk pta'sx:

—Adxa' isath we'we': Dxus Nçxi'k Nasa Yuusáa kakwe's ũ'çxa txajx eenawa tudxmeeçxa yu', pçumée itxi fxi'zewa'ja's ji'phumeene'kwe.

⁵⁴ Aça' maawa adx kakwe's ũ'çxa adx eenawa tudxçxa yuuçxáa pçumée itxi fxi'zewa'ja's ji'phutxna, kxah txã'wě yūsaxi' adxa' nmeh ente' itxi vxitu'nja.

⁵⁵ Txãa pa'gatey adx kakwe' peena yu' kwēje'jmeena, aça' adx eewa peena yu' kxũ'wě'jmeena.

⁵⁶ Maawa adx kakwe's ũ'na txã'wěy adx eenawa tudxsa', bagaçxtewa adx yakh ih ũsuna, aça' adxwa txãa yakh ih ũsu'nja.

⁵⁷ Tata' adxna kaakh txã' itxĩsa'. Txãa pa'ga adxwa itxĩsath. Aça' adxwa Tata yakh ma'wě itxĩsatka'w, txã'wěy itxĩ fxi'zewa'ja's ji'phutxna maawa adx kakwe's ũ'sa'.

⁵⁸ Cielujũ kĩisa ũ'a'sthu pta'sxna we'we'. Kwe'sx yaçgawe'sx manteywe'sxa' maná yaas-esa's ũ'çxawa pejka uu ena's ji'phutx. Nawa naa ũ'a' txãa maná na'wěsame'. Maawa naa ũ'a's ũ'çxa', bagaçxte yuhwa pçumée itxĩ fxi'zewa'ja's ji'phutxna jĩnak pta'sx.

Jesus we'weni' pçumée ïtxĩ kaafxiz'e'jwa'jsa

⁵⁹ Jesusa' txã'wěk pta'sx Kapernaumte judi-
uwe'sx pkhaakhenite.

⁶⁰ Aça' txã'wě kaapiya'jni's wěse'jçxa', txãa
yakh u'jusawe'sx maaí yu' na'wětx we'we
txãawe'sx pwe'sxçáa:

—Na'wě pta'sxni', wala thēya' jiyuwa'j, aça'
ma'wě yuhwa ya'jiyu'çme'.

⁶¹ Nasa jiyumeeçxa kuh jwed we'wena ũste
Jesusa' jiyuçxa', na'jĩk:

—Adx pta'sxni's jiyumeeçxa ũsçxa
yaaki'wá'kwe.

⁶² Txã'wě jiyumée ũsçxawa, Dxus Nçxi'k Nasa
Yuusa' cielun teekaçte uyçxa', çmaa sũjuki'kwe?

⁶³ Na'jĩ'th na': Dxus Espiritu' ïtxi kaafxiz'e'jsa',
aça' txãaçxá'sthu we'wena pta'sxi', naa kiwete
ũ'çxa ïtxĩ fxi'zeni's pta'sxi'çmeeth. Adxa' isath
pta'sxi' Dxus yakh ïtxĩ fxi'zewa'ja's.

⁶⁴ Nawa maaí yu' isane' pta'sxi'
sũju'çmeei'kwe jĩk.

Jesusa' dxiikhēy jiiyã'kh yu' maa txã'wě
açeçtewa, sa' kim ikhkahn dukhwa'jsatewa, txãa
pa'gak dxiikhēy txã'jĩna we'we.

Sa' ki' we'weçxa':

⁶⁵ —I'kwe'sx maaí yu' açeçte jiiçxath adx
Tata kuutxa'the yuuçxáa txãawe'sxa' adx tasxte
pa'jatxna jĩna we'we.

⁶⁶ Jesus txã'wě pta'sxteçxáa, txãa yakh
u'jusawe'sx maaí yu' txuteena u'jtx.

⁶⁷ Txajũ' Jesusa' pějxku docesatx:

—çI'kwe'sxwa adxa's txuteeçxa u'jya'wakwe'?
jĩte',

68 Simon Pedro' na'wēk pas:

—Kwe'sxa' ¿kim yakh u'jwekxtha'w? Idx yuuçxáa pçumée itxí fxi'zewa'ja's pta'sxna ũsgu açá'.

69 Txāa pa'gatey kwe'sxa' idxa's jiyutha'w, txāasatha'w idxa' Kristo, Dxus itxisa Nçxi'kne'ga sūju'.

70 Txā'jīte', Jesus we'weçxa':

—Adxa' i'kwe'sx docesatx txhitxhçxa pa'yatewa, teeçxsa' eçxthē'j jīia' jīnak pta'sx.

71 Jesusa' Simon nçxi'k Judas Iskariote's we'weçxak txā'jī, Judas txā'wē doce-satewe'sxçxawa Jesusa's ikhkahn dukhya'wak yu' naa pa'ga.

7

Jesusa' Dxus Nçxi'kna sūju'çmeeta' Jesus nyakhwe'sxa'

1 Txajū' Jesusa' Galilea kiwesuk u'ju'. Judea kiwesu yu' u'ju wēeme', kxteea' judiuwe'sx ikhya' pakwenatx ũsu' naa pa'ga.

2 Judiuwe'sx fxiesta wa' vxitni en ājaçku yu',

3 açá' Jesus nyakhwe'sxa' na'wēt看 we'we:

—Ayte ũsmée Judea kiwen me'j, kxah nasa iidx ju'guh ũssawe'sx uyuutxna idx na'wē yū'g txā'sa's.

4 Maawa āate tuuthe'j jxthāasuççxa', paaçsu u'jumeena. Na'wē kimwa ājanimeesa's kaavxya'ja'g na' txāatxi' āate mkaavxya'j maawa uykahn jīnatx we'we'.

5 Nyakhwe'sxíi yuhwa Dxus Nçxi'kna sūju'çmeene'ta, txāasatx ũuste jxpa'gameeçxa' txā'wē we'we.

⁶ Txajũ' Jesusa' na'jĩnak pta'sx:

—Adx u'jwa'j ena' āhmeya', nawa i'kwe'sx yu' kĩh entewa u'jya' ewuçxáane'kwe.

⁷ Naa kiwetewe'sxa' i'kwe'sxtxi' açe'çmeeta', nawa adxa's açe'tx, txã'wẽ txãawe'sx ewmée yũuni's āateth pta'sxi' txãa pa'ga.

⁸ I'kwe'sxa' fxiestan me'jçxáawe. Adxa' yuhme'nja, adx u'jwa'j en āhmeya' aça'.

⁹ Txã' we'weçxa', Jesusa' Galileatee neeyũuk.

Jesus fxiestan u'jni

¹⁰ Nawa txajx nyakhwe'sx u'jni e'su', Jesuswa fxiestan u'kh, kimwa jiyunimeete.

¹¹ Aça' judiuwe'sxa' na'jĩnatx txãa fxiestate Jesusa's pakwena ũsu':

—¿Mtee ũski txãa piçthẽ'ja'? jĩna.

¹² Txãa fxiestate' Jesusa's nuywe'wesa yuuçxáatx susna ũsu'. Vxiteíi yu': Jesusa' ewsa yuja' jĩçpkaçxha', vxite yu': Ewmeesa', nasatx ĩxiina u'jusaçxá' jĩnatx nuywe'we'.

¹³ Nawa Jesusa's ew we'wesa yu' maa yuhwa āate yu' we'weçmeeta', judiuwe'sxtxi ũukhçxa.

Fxiesta ente Jesus kaapiya'jni

¹⁴ Fxiesta pçuuna u'jweçpkaçxha', Jesusa' dx-uus yatte u'kaçxa kaapiya'jya' takhku.

¹⁵ Aça' judiuwe'sxa' kuh yajkxnatx ũsu' txãawe'sx pwe'sxçxáa na'jĩna:

—Naa piçthẽ'ja' ¿ma'wẽçxa txakwe wala jiina, maa kaapiya'jsa yakh yuhwa u'jusameeçxawa?

¹⁶ Aça' txã' we'weni's jiyuçxa', Jesusa' na'jĩnak pta'sx:

—Na'wēth kaapiya'ja' txã' adx peekx ya-jkxçxa kaapiya'jnisame'. Adxna jxkaakh txajx we'weni'sthu kaapiya'ja'.

17 Maawa Dxus jxthâasni's kxtey yuuwa'jsa ũsçxa', naa kaapiya'jni's jiyuna Dxus we'wenitewa, meeçxa' adx peekxçxáa yajkxçxa kaapiya'jnitewa.

18 Peekíçxáa yajkxçxa we'wesa', jxtuhthesa yuuwa'jçxá'sku jxthâasu'. Nawa Dxusçxáana tuuthe'jsa', Dxus jxkaahniçxá'sku isa we'wena pta'sxi'.

19 Moisesa' leya's fxi'jçxa ¿i'kwe'sxtxi ũsyuhmeena' wakx? Txã'wētewa i'kwe'sxa' maa yuhwa ley jxkaahni's kxtey yu'çmeei'kwe. Txãasa i'kwe adxa's ikhya'çxáa yaaki' jíte',

20 nasa' na'wētx pas:

—Eçxthē'j yakh ũsne'ga. ¿Kimga idxa's ikh wēje'?

21 Txajũ' Jesusa' na'jĩnak we'we:

—Ki'swa'j ente teeçx nasa aça'sa's nuykatxhith txãa pa'gaçxáa i'kwe txakwe susya' kiite.

22 Nawa i'kwe'sx yu' ki'swa'j entewa luuçx pihçtxi cirkuncidaĩ'i'kwe, Moises jxkaahni's nwēese'jçxa. Naa kxah i'kwe aça'sa's adx nuykatxhini yu'sa' txakwe susu'. (Nawa ew jiyute yu', Moises txã'wē cirkuncidâywa'ja's jxkaahna takhme', jwee yaçgawe'sxtxi txã'wē jxkaah.)

23 I'kwe'sxa' Moises leya's kxtey yuuya' sũhçxa i'kwe ki'swa'j entewa cirkuncidaĩ' luuçx pihçtxi'. Sa' ¿kĩjxa'kwe txakwe ũusçxa' adx teeçx piçthē'j aça'sa's ki'swa'j ente nuykatxhiçxa nvxiitpa'gaçxáa?

24 I'kwe'sxa' ew jiyumey yu' fxiyfxiyçxáa ya-jkxna we'wenuwe, naasáa ew jiyuçxa yuuçxáa txã'wē dxih yu'ga sūhna we'wewa'ja' jīnak pta'sx.

Dxus tasxu yuusa

25 Txajū' Jerusalemte nasa maaíi yu' na'wētx puutx paapēyi':

—¿Naa piçthē'ja'síi ikhya' pakwe'çmeetxna'?

26 Txã'wē pakweçtewa, nasaa ksxavxyte yajkxyajkmée we'wena ūsa', kim yuhwa ma'jīnimeete. Meeçxa' ¿kwe'sx npiiçthē'jwe'sxa' ew yuh jiyuwá'ntakx naa piçthē'ja' Dxus tasxu yuusa Kristotewa?

27 Naa piçthē'ja' majuwe'sxtewa jiitha'w, açá' isa Dxus kaahni Kristo dxihwaça', txã'sa' txãa kiwejuwe'sxa' jīni yuumeena jīnatx we'we'.

28 Açá' Jesusa' dxuus yatte kaapiya'jna ūsíi, sus we'weçxa na'jīk:

—Adxa'sa' jiiyuji'kwe majūwe'sxtewa. Nawa adxa' peekx yuu wēçxaçxáa yuwe'çmeeth, Dxus kaahni ayte ūsthu. Txãa yuuçxáa isa we'wesa' txãa kaahsa's yu' i'kwe'sxa' jiyu'çmeei'kwe.

29 Txã'sa' adx yuuçxáa jiith, txajx tasxu kaahni ayte ūsthu naa pa'ga jīk.

30 Txã'jīte', tudçxa preesu jxūna u'j wēetx, nawa kim yuhwa tud yu' meeta', txã'wē yūuwa'j en āhmeyne' yu' naa pa'ga.

31 Txã'wētewa, wala kuh jiyutx Jesusa' kimtewa sa' na'jī'tx:

—Dxus tasxu yuusa Kristo kīhçxa', ¿naa piçthē'the jxthaakwe kījkīhwa kaavxya'ja'jya' ājāma'k? jīnatx we'we'.

Jesusa's preesu'jya' kaahni

³² Nasa txã'wẽ Jesusa's tuuthe'jna ũste fixarise-owe'sxa' wẽse'jçxa', sacerdote npiçthẽ'jwe'sx yakh puutx we'weçxa', dxuus yat thegsawe'sxtxi kaahtx Jesusa's tudçxa jxũna yuukahn.

³³ Aça' preesu'jya' kaahni's jiyuçxa', Jesusa' na'jĩnak we'we:

—Adxna kaahsa tasxna sxawedna u'jya'wath na' i'kwe'sx yakh txaçxmeeçxáa pi'kxna ũsya'wath.

³⁴ Aça' adxa's pakweçxawa uymeene'kwe, txãa pa'gatey adx u'jweçthu kxte' pa'jya' ãjãmeene'kwe naa pa'ga.

³⁵ Txajũ' judiuwe'sxa' na'wẽtx puutx ya'paapẽjxya' takh:

—Naa piçthẽ'ja' ¿mtee u'the txã'wẽ kwe'sxa' uymée yuukxtha'w? Meeçxa' ¿judiuwe'sx ũsta' vxite kiwesu griegowe'sx ksxavxysu aça' txãa griegowe'sxtxi wáa pta'sxya' u'jweçnakx?

³⁶ Adxa's pakweçxawa uymeene'kwe, txãa pa'gatey adx u'jweçthu kxte' pa'jya' ãjãmeene'kwe naa pa'ga jĩnak we'we' sa' ¿ma'jĩçxaki'k txã'wẽ we'we'? jĩ'tx.

Yu' pçuwa'jmeesa

³⁷ Fxiesta pçuuya' nmeh en yuuçte', Jesusa' yujuçxa na'jĩnak sus we'we':

—Maawa yũ'wẽesa ũsçxa', adx tasxte myuhwe tudxya'.

³⁸ Adxa's ũuste jxpa'gasatxi's txãawe'sx ũuste yu' pçuwa'jmeesa kasehna nes yuuna, Dxus librate we'we'k txã'wẽ.

39 Jesusa' txã'jĩna we'weçxa', txã'sna yaakksa' Dxus Espiritu's jxpa'gawa'ja'sku pta'sxna txã'jĩ'. Txãa ensu' txãa Dxus Espiritu' pa'jmeyku yu', Jesus yuu cielun tejkameyku yu' naa pa'ga.

Jesus kimtewa jiyumeeçxa nasa fxiyfxiy yaakxni

40 Nasa wala kuh pkhaakhena ũsnite maaíi yu' Jesus pta'sxni's wẽse'jçxa', na'wẽtx we'we:

—Naa piçthẽ'ja' isa Dxus yuwe pta'sxsa yuhna jĩ'tx.

41 Aça' vxite yu' na'jĩ'tx:

—Na' Dxus tasxu yuusa Kristona jĩ'tx. Nawa vxite we'weçxa':

—Galileajũ yuja', ¿Kristo' kasehma'k?

42 Txã'wẽmeeteíik Dxus librute we'weçxa': Kristo' jxkaahsa Davxid nwe'sxçxa', Davxid up-xni çxhab Belentey kasejena jĩ'k jĩnatx we'we'.

43 Txajũ' maaíi yu' Jesus ju'gu we'wenatx neeyũu, aça' vxite yu' Jesusa's ahçenatx neeyũu.

44 Aça' maaíi yu' preesu'jçxa jxũna u'j wẽeçxawa, maa yuhwa txã'wẽ yu' yũumeeta'.

Judiu npiiçthẽ'jwe'sxa' Jesusa's jxpa'gameeta'

45 Dxuus yat thegsawe'sxa' ki'kin sxawedna pa'the', sacerdote npiiçthẽ'jwe'sx vxite' fxarise-owe'sxa' na'jĩnatx pẽjx:

—¿Mjĩitekwe txãa Jesusa's preesu'jçxa jxũna yuwe'çmée? jĩte',

46 txãawe'sx pasçxa':

—Bagaçxte yuhwa naa piçthẽ'j na'wẽ zhiçxkwe pta'sxi'k txã'wẽsa yu' iiwẽse'jmeetha'w. Txãasatha'w preesu'jmée.

47 Txajũ' fxariseowe'sxa' wēesxũ we'weçxa', na'jĩtx:

—¿I'kwe'sxwa vxitesa na'wēy ya'ĩsxiijaçwá'kwe?

48 ¿Kwe'sx npiiçthē'jwe'sx meeçxawa fxariseowe'sx maaçxá' txãa piçthē'j kaapiya'jni's jxpa'gaçxa ũste i'kwe'sxa' jii'kwe'?

49 Nawa txãa piçthē'ja's nwēese'jsa' leya's jiimeesata' na' iiméh seena' ewmeesa nwe'wewa'jmeesa yã'tha'.

50 Txã'jĩte', kxtee ũssa teeçx fxariseo Nikodemo yaasesa Jesus tasxte kus pa'jya' u'ju'ga txãa we'weçxa na'jĩk:

51 —Yuuwesa's pa'yaçxa pējxmey yu', kastigāyya' ājame'nja'w, kwe'sx leya' txã'wē jxkaaja'çme' jĩte',

52 txãawe'sx pasçxa':

—¿Idxwa Galileajũwe'sxwá'ga? Dxus li-bru's mtheg wakx, sa' jiyune'ga: Galileajũ yu', bagaçxte yuhwa Dxus yuwe pta'sxsa iikasehmeeta' jĩnatx açewe'we.

53 Txã'jĩçxa', puutx txuteena u'jtx txãawe'sx yatna.

8

Teeçx u'ya's Jesus peltunāyni

¹ Naapkaçxha' Jesusa' Jerusalenu kasehçxa Oli-wos vxĩçnak u'j.

² Sa' kuskus kusĩçxáa dxuus yatte sxawedna pa'kh. Txajũ' nasa jxukaysa utxaate', Jesusa' kaapiya'jya' kaçxku.

3 Txajũ' ley kaapiya'jsawe'sx vxite' fxarise-
owe'sxa' teeçx u'y kazx yũuna ũste kpajkçxa
Jesus tasxte nuypa'jtx sa' pxãhte txahçxa'

4 na'jĩtx:

—Kaapiya'jsa, naa u'ya's kazx yũuna ũsiin
kpajkxtha'w.

5 Txã'wẽ yũusatxi' Moises leya' kwet
wãatatahçxak ikhkaja'. Aça' idxa' ¿ma'wẽ
jxkaajaki'g? jĩnatx pẽjx.

6 (Kxtee ãhmée we'wete', paatxhĩ'khya'
sũhçxatx txã'wẽ paapẽyi'.)

Nawa Jesusa' kũiçhuçxak kiwete kuseju fxi'ja'.

7 Aça' maz uswa jwee pẽjxte', Jesusa' ka-
phuteçxa na'jĩk:

—I'kwe'sxa' maaçxáawa pkal ji'phmeesa
ũsçxa', txãa khuẽ'y naa u'y kakwete kwet
mwãatahwe jĩçxa',

8 ki' kũiçhuçxa kiwete fxi'kh.

9 Aça' txã'jĩni's wẽse'jçxa': Kwe'sxwa
pkalsane'tka'w sũhçxa, kasehna u'jtx
teeçxteeçxçah, nyafxte' jwee ïisxsa khuẽ'ytxi
kaseh. Txã'wẽ jxuka kasehna u'the', txãa
u'yçxáak kxtee neeyũu Jesus ũsnite.

10 Aça' Jesusa' kaphuteçxa ley kaapiya'jsawe'sx
jxuka kasehna u'jnite' txãa u'yçxáa ũste uyçxa',
na'jĩk:

—I'kwena paatxhĩ'khsawe'sxa' ¿mteeta
yuu? ¿Maawa i'kwe's ewmeete nvxiht-ya'
ãjãmeewá'nta? jĩte',

11 txãa u'ya' na'jĩnak pas:

—Maa yuhwa ãjãmeeta' jĩte', Jesusa' na'jĩk:

—Adxwa i'kwe's ewmeete nvxihtme'nja. Me'jwe, nawa peena yu' ewmée yũuna u'junuwe jik.

Jesusa' eena'te kaafxi'ze'jsa

¹² Ki'kin nasa pkhaakhete', Jesusa' na'jĩnak we'we:

—Adxa' eena'te kaafxi'ze'jsath, aça' maawa adx yakh yuusa' eena'te fxi'zewa'ja's ji'phutxna, sa' багаçxte yuhwa çxhi'dxte fxi'zemeetxna.

¹³ Txajũ' fxariseowe'sxa' na'wẽtx we'we:

—Idxa' peekiıçxáa ya'tuuthe'jna ũsgu aça' txã' kxul yuhna jĩte',

¹⁴ Jesus pasçxa':

—Makwe peekiıçxá'ntka ya'tuuthe'je', nawa adx pta'sxni' ĩsxiinisame'. Txãa pa'gatey adxa' jiith majũwe'sxçxa' ki' maa dxi'j u'jweççxawa. Nawa i'kwe'sxa' jiiinée i'kwe adx majũwe'sxtewa sa' maa dxi'j u'jweçtewa.

¹⁵ I'kwe'sxa' peekx ũus yaakxnijũçxáa i'kwe txã'wẽ we'we', adx isa we'weni's jiyumey. Nawa adxa' jiiimeççxa yu' we'we'çmeeth.

¹⁶ Nasa ma'wẽsatewa isa jiyuçxath we'we', Tata' adxa's kaakh txãak ma'wẽ yũuwa'ja'swa adxa's pu'çxhi' txãa pa'ga.

¹⁷ I'kwe'sx leyte' na'jĩ'k: Yuwe's jiisa e'zĩ txãa na'wẽçxaçxáa we'wenisaçxáa selpiina jĩ'k.

¹⁸ Aça' isa we'wesa teeççsa' adxiıçxáath. Aça' vxite' adxna kaahsa Tataııçxá'.

¹⁹ Txã'jĩte', fxariseowe'sxa' na'jĩtx:

—Iidx Tata' çmtee ũsna? jĩte', Jesus pasçxa':

—I'kwe'sxa' adxa's jiyu'çmeei'kwe, sa' adx Tatanawa jiyu'çmeei'kwe. Adx kintewa jiyuwaça', adx Tatanawa jiyune'kwe jīnak pta'sx.

²⁰ Dxuus yatte ofxreda āsxni kaja pukate kaapiya'jna ūščxa', txā'jīnak pta'sx Jesusa'. Nawa maa yuhwa preesu'jya' ājāmeeta', preesu'jwa'j en āhmeyne' yu' naa pa'ga.

Adx ūsnite' pa'jya' ājameene'kwe

²¹ Jesusa' ki'kin we'weçxa na'jīk:

—Adxa' u'jweçthu, aça' i'kwe'sxa' makwe pakweene'kwe, nawa adxa's uymey i'kwe'sx pkalte uune'kwe. Txāasa adx u'jweçthu kxteea' pa'jya' ājameene'kwe jīna we'wete',

²² judiuwe'sxa' na'jītx:

—Meeçxa' çpeekx kusetey uuya'wawáanakx, txāasa wá' adx u'jweçthu kxteea' pa'jya' ājameene'kwe jīna we'we'kx? jīte',

²³ Jesusa' pta'sxku:

—I'kwe'sxa' aytewe'sxi'kwe, naapkaçxha' adxa' ēejūwe'sxthu. Aça' i'kwe'sxa' naa kiwetewe'sxi'kwe, naapkaçxha' adxa' naa kiwetewe'sxmeeth.

²⁴ Txā'wēçxaíith i'kwe'sx pkalte uune'kwe jīna pta'sxi'. Txā'wē Dxus kaahnisa' adxçxáath jīna pta'sxtewa jiyumée yā'jçxa', i'kwe'sx pkalte uune'kwe jīna pta'sxte',

²⁵ na'jīnatx paapējx:

—Txā'wēçxa' çidxa' kimga? jīte', Jesus pasçxa' na'jīk:

—Adxa' kimçxawa nyafxíi pta'sxyā'th.

²⁶ Txāasa wala pta'sxwa'j ji'pthu i'kwe'sx ma'wēsatewa āate pta'sxna, txāa pa'gatey

adxna kaahsa' ĩsxiisame', aça' adxa' txajx we'weni's wēse'jçxa txã'wē ĩçxáath pta'sxi' maawa jiyukahñ jĭnak we'we.

²⁷ Txã'wē Dxusa' adx Tata' jĭna Jesus pta'sxtewa jiyumeeta'.

²⁸ Txãa pa'gak Jesusa' na'jĭna we'we:

—I'kwe'sxa' Dxus Nçxi'k Nasa Yuusa's ĩete txahçxa yuuçxáa jiyune'kwe kimtewa, sa' peekxçxáa yu' we'wemée, wejxwa Tata kwe'we'jniçxá'sne' kaapiya'j sũjune'kwe.

²⁹ Txãa pa'gatey adxna kaahsa', adx yakh ih ũsa', Tata' adxçxáa yu'sa' nvxiitu'çme', txajx jxthãasniçxá'sthu kxtey yu' naa pa'ga jĭk.

³⁰ Txã'jĭna we'wete', nasa kuhsa Jesus ju'gu yuutx.

Ewmeete fxi'zesa vxite' ewmeejũ nwe'wenisa

³¹ Txajũ' Jesusa' txajx ju'gu yuusaawe'sxtxi' na'jĭnak pta'sx:

—Adx kaapiya'jni's jxpubamée nwēese'jçxa', adx nasa yuuçxa

³² ewsa's jiyune'kwe, aça' txãa ewsa' ewmeesajũ nwe'wena jĭte',

³³ txãawe'sxa' na'wēttx pas:

—Kwe'sxa' Abraham jĭ'tha'w, sa' багаçxte yuhwa ewmeete yu' fxi'zesameetha'w. Aça' idxa' çma'wēga ewmeesajũ nwe'weni yuune'kwe jĭna we'we'? jĭte',

³⁴ Jesusa' pta'sxku:

—Isath we'we', maawa ewmée yũuna fxi'zesa', ewmeete fxi'zesata'.

³⁵ I'kwe'sxa' peekx jii i'kwe: selpisa' yat namu na'wěsame', naasáa peekx nçxi'k yuuçxáa yat namu na'wěsa'.

³⁶ Txãa pa'ga yat namu na'wěsa Dxus Nçxi'k txã'wě ewmeesajũ nwe'wete yuuçxáa, isa ewmeete fxi'zesamée yuh yuune'kwe.

³⁷ I'kwe'sxa' Abraham ji'thewa jiith, nawa adxa's ikh wěje'i'kwe, adx kaapiya'jni's nwěese'j wěemeexaçxáa.

³⁸ Adx Tata kwe'we'jniçxá'sthi pta'sxi', naap-kaçxha' i'kwe'sxa' i'kwe'sx tata jkkaahniçxá's i'kwe kxtey yu' jíte',

³⁹ txãawe'sxa' na'wětx pas:

—Kwe'sx tata' Abrahana' jíte', Jesus pasçxa':

—Abraham luuçxwaça', Abraham na'wěy yũune'kwe.

⁴⁰ Txã'wětewa, adxna ma'wě Dxus kaapiya'the', txã'sçxáath isa pta'sxi'. Nawa i'kwe'sxa' adxa's ikhya' yuuçxáa i'kwe pa'pçxu'. Abrahana' bagaçxte yuhwa txã'wě yũume'.

⁴¹ I'kwe'sx tata ma'wě yũute', i'kwe'sxwa txã'wěy i'kwe yũ' jíte', na'wětx pas:

—Txã'jikahna', kwe'sxa' ¿ptamunimeesa luuçx wá'ntka'w? Kwe'sxa' teeçx tataçxáa ji'ptha'w, txã' Dxusa' jíte',

⁴² Jesusa' na'jĩnak we'we:

—Isa Dxusa' i'kwe'sx tatawaça', adxa's ahçemeene'kwe, adxa' Dxus tasxu kaahnith yuwé' txãasa ayte ũsthu. Adxa' peekxçxáa yu' yuwe'çmeeth, adxa'sa' Dxusku kaah.

⁴³ Na'swa adx kaapiya'jni's jiyu'çmeee'kwe, txã'wě adx we'weni's nwěese'je'çmeee'kwe, txãasa i'kwe jiyu'çmée.

44 I'kwe'sx tata', eçxthê'ja', aça' i'kwe'sxa' txajx luuçxi'kwe. Txã'wêçxaáí i'kwe txajx jx-thâasni's kxtey yuu wêje', eçxthê'ja' nyafxiitey nasaa kiikhe'jsa' naa pa'ga. Eçxthê'ja' bagaçxte yuhwa ewsa's yũ'çme', sa' bagaçxte yuhwa isa we'we'çme'. Txãa yuu txã'wêesana na' îsxiinaçxáak we'we', sa' kaaîsxiija'jsa'.

45 Nawa adx isa we'weni yu's nwêese'je'çmeei'kwe.

46 I'kwe'sxa' ¿maaçxa' adxa's pkalsa' jîna ukhe'jya' âjama'kwe? adxa' isasaçxá'sthu pta'sxi' aça'. Adx isasa's kaapiya'jaçte', ¿ma'wêtekwe adx we'weni's nwêese'je'çmée?

47 Dxus luuçxa' Dxus we'weni's nwêese'je'tx. Nawa i'kwe'sxa' nwêese'je'çmeei'kwe na' Dxus luuçx mee'kwe jîk.

Abrahan meetey Kristo úsyã'kh yu'

48 Txajũ' judiuwe'sxa' Jesusa's na'wêtx açewe'we:

—Idxa' Samariajũwe'sxgu, txãasa eçxthê'j yakh úsgu aça' isatha'w txã'jî' jîte',

49 Jesusa' na'wêk pas:

—Adxa' eçxthê'j yakh úsmeeth, naasáa adx Tata's tuuthe'jsaçxáath. Nawa i'kwe'sxa' adxa's açe'i'kwe.

50 Adxa's weçxana tuuthe'jni's pakwe'çmeeth. Nawa teeçx úsa' adxa's tuuthe'jsa txã' adx ma'wêsatewa jîia'.

51 Isath we'we': Adx we'weni's kxtey yuusa', bagaçxte yuhwa uu ena's jî'phumeetxna.

52 Txã'jîte', judiuwe'sxa' na'wêtx we'we:

—Āçxhtha'w wejx ew jiyu, eçxthê'j yakh ũstewa. Abrahamana' uuk sa' Dxus yuwe pta'sxsawe'sxwa uutx. Naapkaçxha' idxa' na'jĩ'g: Maawa adx we'weni's kxtey yuuçxa', bagaçxte yuhwa uu ena's ji'phumeetxna jĩ'g.

⁵³ Kwe'sx yaççawe'sx Abrahamana' uuk sa' Dxus yuwe pta'sxsawe'sxwa uutx, aça' idxa' ¿Abrahante jxthaakwesa wá'ga? jĩte',

⁵⁴ Jesusa' na'wêk pas:

—Adxíiçxáa ya'tuuthe'jna pta'sxi'nja na' txã' selpimeena. Nawa adxa's tuuthe'jsa' adx Tata' txã's i'kwe kwe'sx Dxusa' jĩna we'we'.

⁵⁵ Nawa i'kwe'sxa' txãa Dxusa's jii yuuwa meei'kwe. Nawa adxa' txã'sa' ew jiith. Txã'wê txã'sa' ew jiiçxa jiimeeth jĩ'nja na', i'kwe'sx na'wêy ïisxihsa yu'nja. Nawa adxa' ïsxiimée Dxusa's jiith, sa' txajx jxkaahni's kxteythu yu'.

⁵⁶ I'kwe'sx yaççawe'sx Abrahamana' adx naa kiwete pa'jwa'ja's jiyuçxa', wala weçxana yajkxku, sa' kxtey yuuni's jiyuçxa' wejxku wala weçxa.

⁵⁷ Txã'jĩte', judiuwe'sxa' na'wêtx weeçx we'we:

—Idxa' cinkwenta anxu yuhwa méé ji'phgu, sa' ¿ma'wêga txã'wê Abrahamana's uy? jĩte',

⁵⁸ Jesus pasçxa':

—Isath we'we', Abraham meeiin, adxa' ũsyã'th yu'.

⁵⁹ Txã'jĩte', judiuwe'sxa' ũusaçxaçxa', Jesusa's kwet wáatatajxa'watx yu'. Nawa Jesusa' txãawe'sx ksxavxysuy dxuus yatu kasehna u'kh, kim yuhwa jiyunimeete.

9

Teeçx piçthê'j uyya' âjasame's Jesus yu'çe'jni

¹ Jesusa' u'jweççxa', teeçx piçthê'j naa kiwete upxhí uyya' âjasame'sku puutx uy.

² Aça' txãa yakh u'jusawe'sxa' Jesusa's na'wêtx paapêjx:

—Naa piçthê'ja' ¿kîh yuupa'gaki'k txã'wê yafx ji'phméé upxna ũsu'? ¿Txajx pkalpa'ga ma'k txã'wê nxus ji'phu, meeçxa' neywe'sx pkalpa'ga wá' txã'wê yuu? jíte',

³ Jesus pasçxa' na'jîk:

—Txajx pkalpa'gawa me', sa' neywe'sx pkalpa'gawa meek txã'wê yuu, naasáa Dxus ewuni's áate kaavxya'ja'khançxáak txã'wê yuu.

⁴ Txãa pa'ga kaahsa mjîia's áate kaavxya'ja'jna mjîiwa'j ji'pthu nee en ũsiyna. Txã'wême' kus yã'the', kim yuhwa mjîiya' âjameena.

⁵ Adxa' naa kiwete nee ũsíçxáawa, nasatx eena'te kaafxí'ze'jwa'jsath.

⁶ Txã'jîçxa', kiwe's fxne'sxju tuupha'çxa txãa piçthê'j yafxte sxûsxna'wa,

⁷ na'jînak jxkaah:

—Me'j pkhi'kxya' Siloé yu'kafxte. (Txãa Siloéa' Jxkaahnisa jîni'.)

Txajũ' txãa piçthê'ja' u'jçxa', yafxtxi pkhi'kxku, sa' uyna yã'kh sxawedna kûh.

⁸ Aça' txajx yat utxasuwe'sx vxite' nyafxíi txã'wê yafx ji'phméé upxsatewa ew jiisa' na'wêtx we'we:

—Naa piçthê'jí ¿nyafxí' lmusxnu pêjxna u'psa meená'? jíte',

⁹ maaíi yu':

—Txãaíik jĩ'tx. Naapkaçxha' vxite':

—Txãa na'wẽ yuh thegu'k, nawa txãame' jĩ'tx.
Nawa txãa piçthê'j yu':

—Adxíith jĩk.

¹⁰ Txajũ' pějxtxi:

—Idx upxnijũjx uyya' ãjameeçxa', ãçxha' çma'wẽ yuuçxaga uyya' ãja'? jĩte',

¹¹ pta'sxku:

—Teeçx piçthê'j Jesus yaasesa' kiwe's fxne'sxju tuupha'çxa adx yafxte sxũsxnawa na'jĩk: Me'j pkhi'kxya' Siloé yu'kafxte jĩte', u'jna'wa pkhi'kxthu, aça' adx yafx'a phatetx aça' uyu'th jĩte',

¹² paapějxtxi:

—Idxa's txã'wẽ kaahsa' çmtee ũsna? jĩte':

—Jiimeeth jĩnak pas.

Fxariseowe'sx txãa piçthê'ja's paapěyni

¹³ Txajũ' txãa piçthê'ja's pe'jna u'jtx fxariseowe'sx tasxna.

¹⁴ Jesus txã'wẽ kiwe's fxne'sxju tuupha'çxa uyya' ãjasame's yu'çe'jni' ki'swa'j enne' yu'.

¹⁵ Aç'a fxariseowe'sxa' ki' paapějxtxi txãa piçthê'ja's:

—çMa'wẽ yũuçxaga ãçxha' uyya' ãja'? jĩte', na'jĩnak pta'sx:

—Kiwe's fxne'sxju tuupha'çxa adx yafxte sxũsxku, aç'a' pkhi'kxthu sa' uyya' ãjath jĩk.

¹⁶ Txajũ' fxariseowe'sx maaíi yu' na'wětx we'we:

—Txã'wẽ yũusa' Dxus luuçx meena, ki'swa'j ena's ki'su'çme' na' jĩte', vxite' na'wětx we'we:

—Pkalsaçxa', ¿ma'wě txã'wě kim yuhwa ãjãnimeesa's kaavxya'ja'jya' ãjãkx?

Txajũ' txãawe'sxíçxáa txã'wě we'weçxa', pu-
utx puuidxi'tx neeyũ.

¹⁷ Sa' txãa piçthě'ja's ki' paapějxtxi:

—Iidx yafxa's yu'çe'jsa' ¿kimna sũju'ga? jĩte':

—Txã' Dxus yuwe pta'sxsana sũju'th jĩnak pas.

¹⁸ Txã'wě upxniçjũjx uyya' ãjasameeçxawa
ãçxha' uyu'th jĩtewa, judiuwe'sx yu' txã'wěne'
yu' sũju'çmeeta'. Sa' txãa piçthě'j neywe'sxtxi
pa'yaçxa',

¹⁹ paapějxtxi:

—¿Naa txã'wě i'kwe'sx luuçx upxniçjũjx uyya'
ãjasameena wakx? Sa' ¿ma'wě yũuçxaga ãçxha'
uyya' aja'? jĩte',

²⁰ neywe'sx paçxa':

—Na' kwe'sx luuçx yuja', txã'wě upxhíi uyya'
ãjasameetewa txã'sa' jiitha'w.

²¹ Nawa jiimeetha'w ma'wě yũuçxane' ãçxha'
uyya' aja'. Sa' kim txã'wě yafxtxi' yu'çe'thewa
txã'snawa jiimeetha'w. Txã's yuu mpějxwe, txã'
thě'jsayã'ja' na' txãa pta'sxina.

²² Paapěysatxi' ũukhçxatx txã'wěçxáa pas.
Txã'wěme' maa txã'wě Jesusa' Dxus kaahni
Kristo' jĩna tuuthe'jena txã'sa' fxariseowe'sxa'
ahçeçxa peena yu' txãawe'sx pkhaakhenite
kaapa'ja'jya'méetx ũsu'.

²³ Aça' txã'wě yuuya'watetx ũukhçxa: Na'
thě'jsayã'ja' na' txãa pta'sxina jĩnaçxáa pasu'.

²⁴ Txajũ' fxariseowe'sxa' txãa piçthě'ja's ki'
pa'yaçxa' na'wětx we'we:

—Dxus dxi'pte ĩsxiimée mpeeta'sx. Kwe'sxa' jiitha'w iidx yafxtxi yu'çe'jsa' pkalsatewa jĭte',

²⁵ txāa piçthē'j pasçxa' na'jik:

—Pkalsa wáana nawa adxa' jiimeeth. Adxa' na'wēçxáa jiith: nyafxí' uyya' āja'çmeeth, nawa āçxha' uyu'th jĭte',

²⁶ ki' paapējxtxi:

—¿Kĭhga yūu? sa' ¿ma'wēçxah yūuçxaga iidx yafxtxi' yu'çe'j? jĭte',

²⁷ txā' na'wēk pas:

—Pta'sxyā'th, nawa pta'sxtewa açewe'we'çxáa i'kwe. Sa' ¿kĭjxa'kwe peena pta'sxkaja? ¿I'kwe'sxwa txāa yakh u'ju wēje'wá'kwe? jĭte',

²⁸ na'jĭnatx wēesxūu:

—Idxa' txāa yakh u'jusag. Nawa kwe'sxa' Moises jxkaahni's nwēese'jsatha'w.

²⁹ Kwe'sxa' jiitha'w Dxusa' Moises yakh puutx we'wek. Nawa txāa thē'ja's majūwe'sxtewa jiimeetha'w.

³⁰ Txajū' txāa piçthē'ja' na'wēk we'we:

—Wala yuh fxiya', adx yafxtxi yu'çe'jsa's majūwe'sxtewa i'kwe'sxa' jiyumeete'.

³¹ Maawa jiitha'w Dxusa' pkalsawe'sx we'weni's pasu'çme', naasáa Dxusna yajkçxa txajx jxkaahni's kxtey yuusaçxáatxku Dxusa' pasu'.

³² Bagaçxte yuhwa iiwēse'jmeetha'w upxhíi uyya' ājasameetx ki' kaauyu'jni yu'sa'.

³³ Adx yafxtxi yu'çe'jsa' Dxus kaahnisamee-waça', txā'wē kaauyu'jya' ājawa'jmeene' yu' jĭte',

³⁴ na'wētx wēesxūu we'we:

—Idxa' upxhí iidx ũuste pkałçxaçxáa uta ji'ph upxsag na' ȷma'wētega kwe'sxtxi yu'kxpeh wēje'? jīna açewe'weçxa', neeutx peena yu' jxpa'gaya'mée.

Uysaaçxawa Dxus yu's jiimeesa

³⁵ Txajũ' Jesusa' txāa piçthē'ja's neeuni's jiyuçxa', ki' puutx uyçxa' na'wēk pējx:

—ȷDxus Nçxi'k kimtewa jiigá'? jīte',

³⁶ txāa piçthē'j pasçxa':

—Mpeeta'sx adx jiyukahn jīna pējxte',

³⁷ Jesusa' pta'sxku:

—Idxa' Dxus Nçxi'ka's iuuyā'jg. Adxíith, aça' idxa' txāa yakhgu puutx we'we'.

³⁸ Txā'jīte', txāa piçthē'ja' Jesus tasxte pee-jxũkweçxa':

—Idxa' Dxus Nçxi'k yuh yu'ga sũju'th jīte',

³⁹ Jesusa' na'jīnak pta'sx:

—Adxa' na'wē yuuya'íiçxáath naa kiwete kīh, uyya' ājasameeçxawa uyya' ājākahn, aça' makwe uysaaçxawa uyya' ājākahmén.

⁴⁰ Txajũ' fxariseowe'sx kxtee ũssa' txā'wē wēse'jçxa', na'wētx pējx:

—Kwe'sxwa uyya' ājasameewá'ntka'w jīte',

⁴¹ Jesusa' na'jīnak pta'sx:

—I'kwe'sxa' uyya' ājāsamée dxihwaça', yu-uwesamée yuune'kwe. Nawa uyu'tha'w jī'i'kwe na', txāa pa'ga Dxus dxi'pte' yuuwesai'kwe jīk.

10

Piisxáa kxuuphni's kaaja'dajna pta'sxni

¹ Isath we'we', maawa piisxáa ka'ga'jni vx-itxtey u'kamée, vxite ahte vxitxtemée u'kasa' txã' pesweeta'.

² Nawa vxitxte u'kasa' piisxáa-thegsaçxa txã'wē yuuna.

³ Aça' kxte vxitxte thegsa' vxitxa's phaade'k u'kakahn. Aça' piisxá' jiyu'tx jxpe'jsa we'weni's, txajũ' teeçxteeçxçah kxsusna pa'yaçxa kxuuph-nijũ kutxi'ji'k.

⁴ Sa' jxuka kasxisççxa', piisxáa-thegsa' yaçtek u'jwe', aça' piisxa' txajx e'ste wa'lmeetx u'jwe', jxpe'jsa pa'yani's jiyu'ne'ta naa pa'ga.

⁵ Nawa nasa fxiysa pa'yate yu', u'jmée wejxwa ũphna u'jwe'tx, nasa fxiysa pa'yate jiyuçxatx txã'wē ũphu'.

⁶ Jesusa' naa ejemplo's pta'sxnak kaapiya'j, nawa nasa' jiyumeeta' txã'wē pta'sxni's.

Jesusa' ew jxpe'jsa'

⁷ Nasa jiyumeete', Jesusa' na'jĩnak ki'kin pta'sx: —Isath we'we': Adxii piisxáa u'kani vxitx na'wēsath.

⁸ Adx pa'jmeyna yaçte pa'jsa' jxukay ĩsxiisa pesweeçxáatx yu'. Aça' piisxá' ũukhçxa utx-aameeta'.

⁹ Adxii vxitx na'wēsath, aça' maawa adx tasxte u'kasa', nwe'weni yuutxna. Txajũyã'ja' ki' kasehn ki' u'kan txã'wē yuuna ũsçxawa, sã'jĩni nes yuutxna.

¹⁰ Ewmeesa' pesweena ikhna jxuka pebaya'çxáatx pa'ja', naapkaçxha' adxa' багаçxte yuhwa pçumée ĩtxi fxi'zekahnthu yuwé'.

11 Adxa' piisxaatx ew jxpe'jsath. Aça' ew jxpe'jsa' piisxaatx peeygãhçxa nwe'wepa'gaçxáa txajx ìtxi fxi'zeni's ivxiituya' ũsa'.

12 Nawa vxyuu pa'gaçxáa piisxaatx thegna ũssa' yu'kh eçx yuhte uyna'wa, piisxaatx thegmée ũphna u'jwe'tx, piisxáa-thegsa meena sa' piisxa' txãa jiiwa meetxna, txãa pa'gatx txã'wē yũ'. Aça' txã'wē yũute', yu'kh eçxa' piisxaatx mazwa ikhe'k, naapkaçxha' ìtxisa yu' ma'wēwa ũphu'tx.

13 Txã'wē vxyuu pa'gaçxáa thegna ũsna, txãasane' ũphna u'jwe' piisxaatxi' thegmée.

14-15 Adxa' piisxaatx ew jxpe'jsath. Adx Tatawa ma'wē adxa's ew jiina aça' adxwa ew jiith Tata's, txã'wēy adxwa piisxaatxi' ew jiith, aça' adx piisxaawa adxa's jiita'. Adx piisxaatx wedxçxa nwe'weya' adx ìtxi fxi'zeni's ivxiituya'wath.

16 Txã'wēy piisxáa vxite ji'pthu ayte kxuuphnimeesa txãatxwa nuypa'ja'nja. Aça' txãawe'sxwa adx pa'yani's nwēese'jetxna. Txã'wē yũute', teeçx ahteçxaçxáa jxuka pkhakhni neeyũutxna teeçx jxpe'jsa yakhçxáa.

17 Txã'wē adx ìtxi fxi'zeni's ya'ivxiituya'wath, nawa ìtxi yuuwa'ja's ki' jxpa'gaya'wath, txãa pa'gak Tata' adxa's wedxi'.

18 Adx ìtxi fxi'zeni's kim yuhwa kusa'jya' ãjameena. Adx yuuth peekíi ya'dukhe'. Sa' adx ìtxi fxi'zeni's ya'dukhçxa uuya'wa ãja'nja sa' ki' ìtxi yuuwa'ja'swa ki' jxpa'gaya' ãja'nja. Txã'wē yũukahnkku adx Tata' adxa's kaah.

19 Txã'wē we'weni's judiuwe'sx wēse'jçxa, kuh jwedtxi yajkxna neeyũu.

²⁰ Maaíi yu' na'wētx ũsçxawe'we':

—¿Kĩjxa'kwe nwēese'je' eçxthē'j yakh ũsçxa luuku we'weni's? jĩ'tx.

²¹ Naapkaçxha' vxite' na'jĩ'tx:

—Eçxthē'j yakh ũsçxa', kim yuhwa na'wē zhiçxkwe kaapiya'jya' ājāmeena. Eçxthē'jçxa', txā'wē uyya' ājasameetx kaauyu'jya' ¿ājāma'k?

Judiuwe'sx Jesusa's açeni

²² Dxuus yata's txahna jxā'jni's anxu iisatx fxiesta'ja' Jerusalen çxhabte. Sa' txāa fxiestatetx ũsu' nus ente.

²³ Naapkaçxha' Jesusa' dxuus yat pwa' Salomon jĩ jĩnisuk pekūhna u'ju'.

²⁴ Aça' judiuwe'sxa' txajx tasxte pkhaakheçxa na'wētx pējx:

—¿Bagaçxpkaçx kwe'sxtxi kaypuba'jna ũsya'waga? Idxa' Dxus tasxu yuusa Křistoçxa', tehwed mpeeta'sx jĩte',

²⁵ Jesusa' na'jĩnak pas:

—Pta'sxyā'th, nawa adx we'weni's jxpa'gaçmeei'kwe. Adx Tata jxkaathe', na'wē kĩhwa mjĩ'th, aça' adx mjĩini' āate kaajiyu'ju'tx adx kintewa.

²⁶ Adx piisxāa meei'kwe jĩ'th na', isa i'kwe'sxa' txā'wēsa yuji'kwe. Txāasa i'kwe adxa's jxpa'gaya' wa'lu'.

²⁷ Adx piisxaatx jiith, aça' txāawe'sxa' adx pa'yani'swa wa'lmée nwēese'je'tx, sa' adx yakh u'jwe'tx.

²⁸ Txāasath txāawe'sxtxi' pçumée ĩtxi fxi'zewa'ja's peesu'. Aça' kim yuhwa adx kusejũ' kusa'jmeena, sa' bagaçxte yuhwa vxitumeetxna.

²⁹ Adx Tata maatewa jxthaakwesak adx kusete dukh, aç'a' kim yuhwa kusa'jya' ãjameena adx Tata kusejũ'.

³⁰ Tata adx yakha' txãa na'wẽçxaçxáatha'w.

³¹ Txã'jíte', judiuwe'sxa' Jesusa's ki' kwet wãatatajxa'watx yu'.

³² Aç'a' Jesusa' we'wek:

—Adx Tata pu'çxte i'kwe'sx dxi'pte mjii ewsaçxaçxáa wala kuh kaavxya'ja'th. Aç'a' adx mjii ewsa ¿maaga i'kwe'sxtxi ewmeena' thegu' açkwe adxa's kwet wãatatah wẽje'? jíte',

³³ judiuwe'sx pasçxa' na'jĩtx:

—Ew yũupa'ga txã'wẽ kwet wãatatajxa'wameetha'w. Nasaçxáag, naa kxahg Dxusthu jĩna Dxusa's weeçx we'we', txãa pa'ga txã'wẽ yũuya'watha'w.

³⁴ Txajũ' Jesusa' na'wẽk we'we:

—I'kwe'sx leyte i'kwe'sxtxi we'weçxa': Dvus i'kwe ¿jĩ'çmeena'?

³⁵ Jiitha'w Dvus librute fxi'jni's maawa weeçx we'wewa'jme'. Maawa Dvus yuwe's jxpa'gasayã'ja', Dvus i'kwe jĩnak we'we Dvusa'.

³⁶ Nawa adxa' txã'wẽsaçxáameeth. Adxa' Dvus yuu txhitxhçxa naa kiwete kaahnisath, aç'a' adxa's ¿ma'wẽ Dvusa's weeçx we'we'k Dvus Nçxi'kthu jĩna jĩya' ãjaki'kwe'?

³⁷ Meeçxa' adx Tata mjii kaahnimeesaçxáatx wáa mjĩina ũsne'tka aç'a' adx we'wenitxi' jxpa'ganuwe.

³⁸ Nawa adx Tata mjii kaahnisatx yuh mjĩite', adx yu's jxpa'gameeçxawa, adx we'weniçxáatxwa miipa'gawe. Txã'wẽ

yūuḡçaḡxáa jiyune'kwe, adx Tata' adx yakh ũsa', aḡa' adxa' Tata yakh ũstewa.

³⁹ Txã'jíte', Jesusa's preesu'jḡxa jxūna u'j wēetx. Nawa preesu'jmeyna, kasehna u'kh.

⁴⁰ Txajũ' Jesusa' Jordan yu'wala kuten u'jḡxa', Juan nyafxíi bautisãyna ũsu'k kxteek ũsu'.

⁴¹ Aḡa' nasa wala kuh thegya' pa'jḡxa', na'wētx we'we:

—Juana' kim yuhwa ājanimeesatx kaavxya'ja'jmeeḡxawa, pta'sxku naa piḡthē'j pa'jḡxa ma'wē yūuwa'ja'swa, aḡa' txã' ĩsxiinimée jxuka kxtey yuuk jĩ'tx.

⁴² Txajũ' kxtee ũssa nasa' wala kuhsa Jesus kintewa jiyutx.

11

Lasaro uuníi

¹ Betania ḡxhabte teeḡx piḡthē'j Lasaro yaas-esak āḡã'na ũs yu', npe'sxwe'sx Maria Marta u'pni ḡxhabte.

² Txãa āḡã'sa npe'sx Mariak txã'wē Jesus ḡxidakhē wēt putasa's awḡxa txajx dxkhasju adxi'jwa'jsa yu'.

³ Txãawe'sxa' pxakhíitx dxiy āḡã'na ũste', Jesusa's pta'sxkahn yuwe kaah:

—Iidx namiku wedxnisa' wala āḡã'na ũsa' jĩna.

⁴ Txajũ' Jesusa' naa pta'sxni's wēse'jḡxa' na'jĩk:

—Na'wē āḡã'na ũḡxawa, uuwa'jsa meea'. Naasáa Dxus ājāni's āate kaavxya'ja'jna, txã'wēy Dxus Nḡxi'k ājani'swa kaavxya'ja'khanḡxáa txã'wē āḡã'na ũsa'.

⁵ Aḡa' Marta Maria txãawe'sx dxiy Lasaro yakha' Jesus wedxnisatx yu'.

⁶ Nawa Lasaro' wala ãçã'na ũsa' jĩna pta'sxni's wẽse'jçxawa, nee e'z eníik txajx u'junisu jx-thěeyũ.

⁷ Txãa e'z en skhěwniijũ', Jesusa' na'jĩnak we'we txãa yakh u'jusawe'sxtxi:

—Judea kiwen ki' u'jwega jĩte',

⁸ txãawe'sxa' na'wětx pas:

—Kaapiya'jsa, mwěese'j. Txãwãsu' judiuwe'sxa' idxa's ikh wěeçxa kwet wãatatajxa'watx yu', aça' ¿ma'wěga kxtey ki' u'j wěje'? jĩte',

⁹ Jesusa' na'wěk pas:

—Isa ena' doce ora ¿ji'phmeena'? Maawa en u'juçxa' yu'spě'themée fxi'zetxna, eena' kweethniitene'ta fxi'ze' naa pa'ga.

¹⁰ Nawa kus u'juçxa', yu'spě'thetxna, eena' kweethnite u'jupa'gamée.

¹¹ Txajũ' na'jĩk Jesusa':

—Kwe'sx namiku Lasaro' deeni', nawa adxa' fxĩtxya' u'jwe'nja jĩte',

¹² txãa yakh u'jusawe'sxa' na'jĩtx:

—Deeniçxáa ũsçxa yu', fxĩtxte' kiiteena jĩtx.

¹³ Lasaro' uuni ũstek Jesusa' txã'wě we'we. Nawa txãa yakh u'jusawe'sxa' jiyumeeçxa', ĩ'née deenisaçxá'sne' we'we sũju'ne'ta.

¹⁴ Txajũ' Jesusa' teehwedku áate pta'sx:

—Lasaro' uuni' jĩna.

¹⁵ I'kwe'sxa' adx ājani's uyçxa' adx kimtewa jiyukahn, ewçxá'ntka kxtee ũsu'çmée. Txã'wě uuniyā'j ũstewa, thegya' u'jwega jĩte',

¹⁶ Tomas melxisu jĩ'tx txã' na'wěk we'we vxite pi'kxna u'jusawe'sxtxi:

—Kwe'sxwa u'jwega Jesus yakh ja'da uuya' jĩk.

Jesus itxi vxit-sa

¹⁷ Jesus kxtee pa'jaçte', Lasaro's pedaní pahz enyã'kh yu'.

¹⁸ Aça' Betania çxhaba' Jerusalen çxhabuh e'z kilometro y medioçxáak jxu'kha ũsu'.

¹⁹ Aça' judiuwe'sxa' wala kuh pa'khu'ta txã'wẽ dxiy uute', npe'sxwe'sxtxi kvxiisxa'jya'.

²⁰ Aça' txãa entey Jesusa' pa'jaça' jĩni's jiyuçxa', Marta' puutx uyya' kasejk. Nawa Maria' yatte neeyũuk.

²¹ Txajũ' Marta' Jesus yakh puutx uyçxa' na'jĩnak we'we:

—Idx ayte ũssawaça', uuwa'jmeene' yu' ũ'kwe dxi'sxa'.

²² Nawa jiith Dxusa' jxuka ũsuna idx kĩh pẽjxtewa jĩte',

²³ Jesusa' na'wẽk pas:

—I'kwe dxiya' itxi yuuna jĩte',

²⁴ Marta' na'wẽk pas:

—Ũ'kwe' jiith, uusaawe'sx itxi yuu ente' itxi yuuyujuna.

²⁵ Nawa Jesusa' na'jĩk:

—Adxii uuniitewa itxi vxit-sath, sa' pçumée itxi fxi'zewa'ja'swa adxii peessath. Maawa adxa's ũuste jxpa'gasa' makwe uuçxawa ki' itxi yu-utxna.

²⁶ Aça' maawa nee itxi ũssa' adxna ũuste jxpa'gaçxa', bagaçxte yuhwa uuwa'jmée itxi fxi'zetxna. Adx we'weni' isa yuhtxna ¿sũju'kwe'? jĩte',

²⁷ Marta pasçxa':

—Txã'wẽ yuhna sũju'th. Idxa' Kristog, Dxus Nçxi'k naa kiwete kĩisa jĩk.

Jesus ũ'neni

²⁸ Txã'wẽ we'wena jxã'jçxa', Marta' yatna sxawedna u'kh nyakha's pa'yaya'. Sa' na'jĩnak susmée we'we:

—Kaapiya'jsa ayte yã'j ũsa', sa' i'kwe's yuu kaakh.

²⁹ Txã'jĩ'çpkaçxa', Maria' kiitena' wala dud u'kh Jesusa's puutx uyya'.

³⁰ Jesusa' Betania çxhabte u'kameyku yu', Marta yakh mteene' puutx uy kxtee nee ũsiyçxáak yu'.

³¹ Aça' Maria' kiiteçxa wala dud skhẽwte', judi-uwe'sx txãa yatte kvxiisxa'jna ũssa' e'stey u'jtx, pedaní kafxte wáa ũ'neya' u'jweçna sũhçxa.

³² Txajũ' Maria' Jesus tasxte kũhna'wa, pee-jxũkweçxa na'wẽk we'we:

—Kwe'sxtxi jxpe'jsa, idx ayte ũssawaça', ũ'kwe dxi'sxa' uuwa'jmeene' yu' jĩnak we'we.

³³ Txã'wẽ Maria vxite' judiuwe'sx pi'kxna yuusa ũ'neçte Jesusa' uyçxa', txãawa wala nxusçxa'

³⁴ pẽjxku:

—¿Mteekwe pedáa? jĩte':

—Myuh wakx thegya' jĩtx.

³⁵ Aça' Jesusa' ũ'nek.

³⁶ Txã'wẽ Jesus ũ'neçte uyçxa', judiuwe'sxa' na'jĩtx:

—Mthegwe ma'wẽga wala peeygãja'.

³⁷ Nawa maaí yu' na'wẽtx we'we:

—Naa piçthẽ'ja' uyya' ājasameetxwa kaauyu'ju'k na' ¿kĩhçxáawa yũuya' ājawa'jmée ma'k yu' Lasaro uukahmén?

Lasaro's itxi vxitni

³⁸ Txajũ' Jesusa' ki'kin wala nxusna utxaak Lasaro's pedaní kafxte. Txãa kafxa' dxiiga pwa'ja'nik yu', açã' u'kani vxitxte yu' kwetku aphni yu'.

³⁹ Jesusa' na'wêk jxkaah:

—Aphni kweta's mkiiswe jïte', uusãa npe'sx Marta' na'jïk:

—Uuní pahz enyã'ja', açã' phadete' ¿kazx putameema'k? jïte',

⁴⁰ Jesus we'weçxa':

—Adx pta'sxnitxi' txã'wê yuhna sũhna ũuste jxpa'gaçxa', Dvus ma'wêsatewa jiyune'kwe ¿jïçmeetka'?

⁴¹ Txã'jïte', txãa aphni kweta's kiistxi. Açã' Jesusa' cielute pagayçxa na'wêk we'we:

—Tata, adx pëyni's pasu'g naa pa'ga weçxa'th.

⁴² Adxa' jiith, idxa' bagaçxtewa adxa's pasu'g. Nawa txã'jïna ãateth weçxá', ayte nasa ũsta' txãawe'sx wêse'jçxa', adxa'sa' Dvus kaahni yuh yu'ne' sũjkahn.

⁴³ Txã'jïçxa', Jesusa' susku we'we:

—Lasaro, txãajũ mkaaseh jïçpkaçxha',

⁴⁴ uusá' itxi yuuçxa kasejk, çxida, kuse petx dxi'p yã'jçxa yapni. Açã' Jesusa' khibkaakh u'jya' ãjãkahn.

Jesusa's ikhya' puutx we'weni

(Mt 26.1-5; Mr 14.1-2; Lk 22.1-2)

⁴⁵ Uusá's itxi vxitni's uyçxa', Maria's pi'kxna ũssa judiuwe'sxa' Jesusa's ũuste jxpa'gaçxatx neeyũu.

46 Nawa vxite judiuwe'sx açesa yu' fxariseowe'sx tasxna u'jçxa', Jesus txã'wẽ uusá's ìtxĩ vxitni's pta'sxtxi.

47 Aça' fxariseowe'sxa' sacerdote npiiçthẽ'jwe'sx yakh pkhaakheçxa', na'jĩnatx puutx we'we:

—Naa piçthẽ'ja' naa kiwete kim yuhwa ãjanimeesatx kaavxya'ja'jna kījkihwa yūuna ũsa'. Aça' çkĩh yuukxtha'w?

48 Txãa piçthẽ'ja's kĩhçxáawa yūumeete', nasa' jxukay txãa yakhçxaçxáa u'jwetxna. Aça' Romajũ nasa kwe'sx dxuus yata's ivxiituçxa', kwe'sxtxiwa ivxiitutxna.

49 Txajũ' txãa anxute sacerdote npiiçthẽ'j Kaifxasa' na'wẽk we'we:

—I'kwe'sxa' ũus yajkxya'çxáa yuhwa ãjã'çmeei'kwe.

50 Kwe'sx ji'j jxuka yu' vxitukahmen wejxwa jxukasa pa'gate teeçx yuuçxáa vxituwaççxáa wejx ewna. Txã'wẽ yūuwa'ja's ũus yajkxya' i'kwe ãja'çmée.

51 Kaifxasa' txãa anxute' sacerdote npiiçthẽ'kh yu', sa' peekxçxáa txã'wẽ yajkçxa we'wemeene'. Jesusa' judiuwe'sx jxukaysa pa'gate txãaçxáa uuwa'thene' Dxusa' Kaifxasa's txã'wẽ we'wewa'ja's kaaũusuthe'j.

52 Nawa judiuwe'sxtxi nwe'weya'çxáameene' txã'wẽ uuya'wa yu'. Dvus luuçx mtee mteewa ũstxna txãawe'sxtxiwa pkhakhya'k txã'wẽ uuya'wa yu'.

53 Aça' txãajũjx judiu npiiçthẽ'jwe'sxa' Jesusa's ikhya' puutx we'wetx.

⁵⁴ Txãa pa'gak Jesusa' Judiuwe'sx ksxavxysu u'juya' âjãmeeçxa', Judea kiwejũ kasehna u'j txãa yakh u'jusawe'sx yã'jçxa teeçx çxhab nasa u'pnimée ja'dasu Efxrain yaasesa ũsu'k kxtee ũsya'.

⁵⁵ Txajũ' Judiuwe'sx fxiesta Paskua en âjaçku yu'. Aça' wala kuh nasa' u'jtx Jerusalenna, Paskua fxiesta âhmeyna txãawe'sx kakwete pkaltxi yaateçxa ũsya'.

⁵⁶ Kxte' Jesusa's pakwena yã'jtx ũs yu' sa' dxuus yatte na'wêtx puutx paapēyi':

—¿Ma'jĩki'kwe? Jesusa' fxiestate ũsya' ¿yuhmanx?

⁵⁷ Txajũ' fxariseowe'sx vxite' sacerdote npiiçthē'jwe'sxa' neewe'wetx maaçxáawa Jesusa' fxiestate ũste jiyuçxa' txãawe'sxtxi pta'sxkahn tudxa' kaajxa'.

12

Wêť putasa's Jesus çxidakhê teeçx u'y awni (Mt 26.6-13; Mr 14.3-9)

¹ Paskua fxiesta âjxa' seis en peejiyna, Jesusa' Betania çxhabna u'kh, Lasaro uuniitewa itxi vxitku kxtee.

² Kxteea' ũ'wa'j pheu'jtx Jesusna weçxana, naapkaçxha' Marta yu' puuçuçsak yu'. Aça' Lasaro' Jesus yakh kaçxku ũ'ya'.

³ Txajũ' Maria' teeçx libra âjk wêť putasáa wala pa'gasa's jxũna pa'jçxa', Jesus çxidakhê sxũsxçxa', txajx dxkhasjuk adxi'. Aça' yat dxiite txãa wêť putasaçxáa jxuka utak.

4 Txajũ' Jesus yakh u'jusa Simon nçxi'k Judas Iskariote yaasesa' Jesusa's ikhkahn dukhwa'jsa' na'wěk we'we:

5 —¿Ma'wěteki'k naa u'ya' wět putasa's tres cientos pesote txweyçxa nasa puuplesatx peesu'çmée? jĩk.

6 Nawa Judasa' puuplesatx pees jxthãasçxa txã'jĩçme'. Txã' vxyuu jxaawsak yu', nawa vxyuu pkhakhnitx kim yuhwa jiyunimée paaçte nkuutxi'ji'u'ga, txãasak txã'wě we'we'.

7 Txajũ' Jesusa' na'wěk we'we:

—Naa u'ya's txã'wě yuja' we'wewa'j ji'phmeeg. Naa wět putasa's adx kakwe's pedaaçtewe'sxku jxaawni ji'phu'.

8 Puuplesa' bagaçxtewa i'kwe'sx yakh nes yu-utxna. Nawa adxa' jwee yu' i'kwe'sx yakh nes yuuwa'jsameeth jĩnak pta'sx.

Lasaro's ikh wěeni

9 Jesusa' Betaniate ũsa' jĩni's jiyuçxa', judi-uwe'sx wala kuhsa pkhaakheçxa Jesusa's thegya' txãa çxhabna u'jtx. Nawa Jesusçxá's thegya' u'jmée, Lasaro's ja'datx thegya' u'j, txã'sa' uuni-itewa Jesusa' ki' ĩtxi vxitku txãa pa'ga.

10 Txajũ' sacerdote npiiçthě'jwe'sxa' puutx we'wetx Lasaro'swa ikhya',

11 txã's Jesus ĩtxi vxitpa'gaçxáa judiuwe'sx wala yã'j txuteeçxa Jesus yakhtxi u'jweç yu' naa pa'ga.

Jerusalente Jesus u'kani

(Mt 21.1-11; Mr 11.1-11; Lk 19.28-40)

12 Jerusalente Paskua fxiestate nasa wala pa'tha. Sa' kuskus enkhē' Jesuswa Jerusalente fxiestate pa'jana jīni's jiyuçxa',

13 lamus eç spē'thçxa Jesusa's pu'thegya' kasehtx. Sa' na'jīnatx sus we'we':

—¡Dxus txakwe ewte, teeçx yuja' Dxus kaahni, Israelwe'sxtxi Jxkaahsa wala ewsa! jīnatx weçxá'.

14 Txajū' Jesusa' teeçx buçxu ũste uyçxa', txãatek a'jçxa u'j, Dxus librute na'wē fxi'jni' txãa kxtey yuukahn:

15 Ũukhnuwe, Sion çxhabetewe'sx.

Mthegwe, i'kwe'sxtxi Jxkaahsa yuja', teeçx buçxute a'jçxa jīnak fxi'jni' yu'.

16 Txãapkaçxhīi yu', Jesus yakh u'jusawe'sxa' jiyumeeta' txã'wē yūuni's. Nawa Jesus cielun u'jnite', jiyutx txã'wē fxi'jni' kxtey yuutewa.

17-18 Txã'wē uusá's Jesus ĩtxi vxitpa'gatx nasa jiyuwēesa' txakwe wala pu'thegya' kaseh, Lasaro's ĩtxi vxituçte' kxtee ĩh thegna ũssa' jīimeesatxwa pta'sxne'ta txãa pa'ga.

19 Txajū' txã'wē nasa pu'thegya' kasehpa'gaçxáa fxariseowe'sxa' na'jīnatx ũusçxa we'we' txãawe'sx pwe'sx:

—Mthegwe wakx, kīh yuhwa yūuya' ãjaçmeetha'w, naapkaçxçxáa nasa' jxukay Jesus yakhçxaçxáa u'jweçta' jī'tx.

Greciajūwe'sx Jesusa's pakweni

20 Jerusalente fxiesta ente jxu'j kiwe Greci-ajūwe'sx pa'jçxa ũsu'tx.

21 Txajũ' Greciajũwe'sxa' Galilea kiwesu Beçaidatewe'sx Fxelipe's utxaana kũhçxa', na'wẽtx pxthaa we'we:

—Jesusa'stha'w puutx uy wẽje' jĩte',

22 Fxelipe' u'jçxa Adresa's pta'sxku, sa' txajũ' e'zsay Jesusa's pta'sxya' u'jtx.

23 Aça' Jesus we'weçxa':

—Dxus Nçxi'k Nasa Yuusa' uuçxa ki' ãtxi yu-uwa'j en ãjaça'.

24 Na'jĩ'th na': Teeçx skuutxh nxinx'a kiwete weteçxa uumeeçxa yu', pehnamée teeçxçxáa nes yuuna. Nawa uuçxa buçxaçxa', jweeíçxáa penana.

25 Maawa naa kiwete ãtxĩ fxi'zewa'jçxá's yaakxsa' pçuwa'jmée ãtxĩ fxi'zewa'ja's ivxiitutxna. Nawa naa kiwete ãtxĩ fxi'zeni's yaakxsame', pçuwa'jmée ãtxĩ fxi'zewa'ja's ji'phutxna.

26 Maawa adxa's selpíi wẽeçxa', adx yakh yuweena, sa' adx mtee ùste' txãawa kxtey ùsya' ãjana adxna selpiisa'. Aça' maawa adxna selpisaatxi's adx Tata' tuuthe'jena.

Jesusa' txajx uuwa'ja's pta'sxni

27 ãçxha' wala nxusna ùsthu, sa' ¿ma'jĩtk'a? Meeçxa' Tata, adxa's meen nwe'we pxthaa yuukahmen jĩte, ewwáanaxk. Nawa txã'wẽ pxthaa yuuya'íçxáath yuwé' na' txã'jĩme'nja.

28 Tata, maawa idxna jiyuwa'jçxá's mkaavxya'ja'j.

Txajũ' cielujũ we'weni na'wẽk pthũuse:

—Adxna jiyuwa'ja's kaavxya'ja'jyã'th. Nawa maawa adxa's jiyukahn ki' kaavxya'ja'jya'wath jīnik pthūuse.

²⁹ Aça' nasa' txã'wě cielujū we'weni's wēse'jçxa':

—Kpi'sxne' txã'jī jī'tx, naapkaçxha' vxite yu':

—Teeçx angelne' txã'wě we'we jī'tx.

³⁰ Txajū' Jesusa' na'jīk:

—Txã'wě we'weni' adxna pta'sxna we'weme', i'kwe'sxtxi pta'sxnak txã'wě we'we jiyukahn.

³¹ Aça' naa kiwete jxukaysa yuuwesa yuwa'j en aijk, naapkaçxha' naa kiwete jxkaahna ūssa eçxthē'j yu' peena yu' jxkaajxa' aǰāwa'jmeete neeyūna.

³² Txã'wě adxa's ēekhē ki'pni'jū', jxukaytxi nwe'weya' aǰā'nja.

³³ Txã'wě we'weçxak kaajiyu'j ma'wě uuya'waçxawa.

³⁴ Txajū' nasa' na'wētx we'we:

—Kwe'sxa' Dxus librute leya's iiwēse'tha'w, aça' Kristo' bagaçxte yuhwa uuwa'jmée itxi u'juwa'jsa' jī'k. Aça' idxa' ¿ma'wēga Dxus Nçxi'k Nasa Yuusa's ēekhē ki'pni' yuuna jīna we'we? Dxus Nçxi'k Nasa Yuusa' ¿kimna? jīte',

³⁵ Jesusa' na'jīnak pas:

—Eena'sa' i'kwe'sx yakh nee ūsuna, nawa maz ençxáa ūsuna. Txã'wēte' eena'te fxi'zewa'ja's mpa'gawe, eena'sa' nee ūsiyna, kxah çxhi'dxsa' i'kwe'sxtxi kpajkxmeena. Txã'wēme', çxhi'dxte u'jusa' maa dxi'j ewsatewa jiyuya' aǰā'çme'.

³⁶ Nee i'kwe'sx yakh ūsiyna, eena'sa's mjiyuwe, kxah eena'te fxi'zesa yuune'kwe.

Txã'wě we'wena jxã'jçxa', Jesusa' u'jçxa vxyaame'.

Judiuwe'sxa' Jesusa's jxpa'gameeta'

³⁷ Kim yuhwa ājanimeesa's txakwe wala kaavxya'ja'thewa, nasa' jiyuya' āja'çmeeta' Jesus kintewa.

³⁸ Nawa Dxus yuwe pta'sxsa Isaiás fxi'jçxa nvxiitni' kxtey yuukahntxi txã'wě yuu: Kxte' na'jĩ'k:

Kwe'sx pta'sxni's ¿kimçxá' jxpa'gata'?

Dxusa' txajx ājani's ¿kimtxiga kaavxya'ja'j? jĩ'k.

Kristo's jiyuya' ājawa'jsameene'ta yu', txãa pa'gak Dxus yuwe pta'sxsa Isaiasa' txã'wě fxi'jçxa nvxiht.

³⁹ Sa' Isaiasa' ki' we'weçxa':

⁴⁰ Dxusa' txãawe'sx yafxtxi aphku uyya' ājākahmén.

Sa' txãawe'sx ũustxiwa nuywejik jiyukahmen, Sa' Dxus tasxte sxawedçxa katxhiwa'ja'swa nvx- ihtme' jĩ'k.

⁴¹ Jesus ma'wě yuuwa'jsatewa jiyuçxak Isaiasa' txã'wě we'wena fxi'j.

⁴² Txã'wětewa, judiuwe'sx wala kuhsa Jesus kintewa jiyutx, maaíi yu' npiiçthē'jwe'sx yã'jçxa. Nawa fxariseowe'sx ahççxa txãawe'sx pkhaakhenijũ kutxi'jçxa peena yu' pa'jwa'jmée vxitkahmen, āate yu' pta'sxi'çmeeta' ũukhçxa.

⁴³ Txãawe'sxa' nasaa tuuthe'jniçxá's wejx ji'phu wēçxatx txã'wě yu'.

Ney pta'sxkaahni's Jesus pta'sxni

⁴⁴ Txajũ' Jesusa' na'jĩnak we'we:

—Maawa adxna ũuste jxpa'gasa', adxçxáana jxpa'gamée, adxna kaahsa Tatanawa jxpa'gana.

⁴⁵ Txã'wëy maawa adxna uysa', adx Tata'swa uysáa yuuna.

⁴⁶ Adxa' nasatx eena'te kaafxi'ze'jya'th kîh, kxah adxna ũuste jxpa'gasa' çxhi'dxte neeyũumeetxna.

⁴⁷ Nawa maawa adx pta'sxni's wëse'jçxawa kxtey nwëese'jmeete', txã'wë yũusa's ewmeete nvxiitwa'jsa' adxmeeth. Adx yu' naa kiwetewe'sxtxi ewmeete nvxihtxa' yuwe'çmeeth, wejxwa nwe'weya'th yuwé'.

⁴⁸ Adxa's wa'lçxa adx pta'sxnitxi' kxtey yuumeete', txã'wë yũusatx ewmeete nvxiitwa'jsa ũsa': açxh na'wë adx pta'sxna we'we'th txãa pta'sxnisá íçxáa ewmeete nvxiitwa'jsata' nmeh ente'.

⁴⁹ Txãa pa'gatey adxçxáa we'wena pta'sxiçmeeth. Adxna kaahsa Tataíik txã'wë pta'sxkaja',

⁵⁰ kxah adxa' jiith adx Tata we'weni' bagaçxte yuhwa pçumée ítxi kaafxi'ze'jwa'jsatewa. Aça' adx Tata ma'wë pta'sxkaathe', txã'sna íçxáath adxwa pta'sxi' jñak we'we Jesusa'.

13

Jesusa' txãa yakh u'jusawe'sx çxidatx pkhi'kxni

¹ Paskua fxiesta ájxa' teeçx ençxáa pejiçku yu'. Aça' Jesusa' jiik yu' naa kiwe's nvxihtçxa Ney tasxna u'jwa'j en áani's. Sa' naa kiwete txãa yakh u'jusawe'sxtxi' nyafxiitey ma'wëne' peeygãh na', nmeh entepkaçxku peeygãh.

² Jesusa' txãa yakh u'jusawe'sx yakh ũ'na u'ppkaçxha', eçxthê'ja' Simon nçxi'k Judas Iskar-iote's kaaũusuthe'jeçyã'kh yu' Jesusa's ewmeesa kusetë dukhkahn.

³ Aça' Jesusa' jiik yu' Dxus tasxune' yuusa yu' sa' ki' Dxus tasxnay u'jwa'ja's. Sa' txã'wëy jiik yu' Dxus ma'wëçxah jxkaahwa'ja'swa txãaçxaçxá's dukhni'swa.

⁴ Txajũ' Jesusa' ũ'na u'píi kiitena'wa, atxhna ki'pçxa, toalxa's jxtuhdku.

⁵ Sa' kuse khweeçxaniite yu' awna', mesate ih ũ'na u'psa çxidatx pkhi'kxna', toalxaju adxi'k.

⁶ Sa' Simon Pedro çxidatx pkhi'kxya'wate', txã' na'wëk we'we:

—Kwe'sxtxi jxpe'jsa yuja', ¿adx çxidatx pkhi'kxma'g? jíte',

⁷ Jesusa' na'wëk pas:

—Ãçxhíi yu' jiyumeene'ga na'wë yũuni's. Nawa e'su' jiyune'ga.

⁸ Txã'jítewa, Pedro' ki' na'jík:

—Idxa' adx çxidatx pkhi'kxwa'jsameeg jíte', Jesusa' na'jĩnak pta'sx:

—Idxa's pkhi'kxmeete', adx yakh ũ'sya' ãjameene'ga jíte',

⁹ Simona' na'wëk pxthaa we'we:

—Txã'wëyã'the', çxidaçxáatx pkhi'kxmée, kuse petx dxikthé yã'jçxa meen pkhi'kx jík.

¹⁰ Nawa Jesusa' na'jík:

—U'se pëwçxa ũ'ssa', jxuka ateyã'tha', kxah çxidaçxáatx pkhi'kxwa'j peejxta'. I'kwe'sxa' ateyã'ji'kwe, nawa jxukasa yu' ate ũsmeei'kwe.

¹¹ Jxukaysa yu' ate ũsmeei'kwe jĩnak we'we, txã's ikhkahn dukhwa'jsa's we'weçxak txã'jĩ.

12 Txajũ' Jesusa' txãawe'sx çxidatx pkhi'kxna jxã'jçxa', atxha's jxkahçna' mesate ki' kaçxçxa na'jĩnak paapẽjx:

—¿I'kwe'sxa' jiyu'kwe' adx txã'wẽ i'kwe'sx çxidatx pkhi'kxte'?

13 I'kwe'sxa' adxa'sa' kaapiya'jsa, jxpe'jsa, jĩçxa', isa yuh we'we'i'kwe, adxa' txã'wẽsa yuhth naa pa'ga.

14 Adxa' kaapiya'jsa, jxpe'jsaçxawa i'kwe'sx çxidatx pkhi'kxthu aç'a' i'kwe'sxwa txã'wẽy çxidatx puutx ya'pkhi'kxna mfxi'zewe teexsa na'wẽçxaçxáa.

15 Adx na'wẽy yũuna fxi'zekahnthu i'kwe'sxtxi txã'wẽ selpii.

16 Isath we'we', maawa selpisa' txajx patronte jxthaakwesame', aç'a' txã'wẽy kaahnisawa txã's kaahsate jxthaakwesame'.

17 Na'wẽ selpiwa'ja's jiyuçxa kxtey yuuna fxi'zeçxa', weçx weçxa fxi'zene'kwe.

18 I'kwe'sx jxukaysa yuutxi' txã'jĩ'çmeeth. Jiith kimçxah adx txhitxhnisatewa. Nawa Dxus li-brute na'wẽ fxi'jni ũsa': Adx yakh ih ũ'saçxawa, adxa's ahçeçxa kiikhe'jya'wa' jĩna fxi'jni' kxtey yuukahnthu txã'jĩ'.

19 Açxhíi pta'sxiçthu, kxah kxtey yuute', adxa's ew jiyune'kwe Dxus Nçxi'kdxihtewa.

20 Isath we'we': maawa adx kaahnisa's jxpa'gaçxa', adxa'swa jxpa'gasa yuuna. Sa' adxçxáana jxpa'gamée, adxa's kaahsanawa jxpa'gasa yuuna.

*Judasa' Jesusa's ewmée yũuya' yaakxni
(Mt 26.20-25; Mr 14.17-21; Lk 22.21-23)*

21 Txã'jĩna jxã'jçxa', Jesusa' nxusnxus yajkçxa ãatek we'we:

—Isath txã'jĩ', i'kwe'sx yakh u'jusa teeçxa' adxa's ahççxa ewmeesa kusete dukhya'wa' jĩk.

22 Txajũ' kimna txã'jĩtewa jiyumeeçxa', dxi'p iisaçxáatx puutx thegu' txãawe'sx pwe'sx.

23 Teeçxa' Jesus pukate ih u'psa' Jesus wedxnisak yu'.

24 Aça' Simon Pedro' kimna txã'jĩtewa jiyu wēeçxa', txãa ih u'psa's kuseju pta'sxku paapēykahn.

25 Aça' Jesus pukate ih u'psa' tuphiçxa na'jĩnak paapējx:

—Jxpe'jsa, mpeeta'sx ¿kim idxa's txã'wē ahççxa dukhwa'jsana? jĩte',

26 Jesusa' na'jĩnak pta'sx:

—Pana's tuupha'jçxa maana ũsu'nja txãa adxa's dukhwa'jsa' jĩçxa', pana's tuupha'jna'wa Simon nçxi'k Judas Iskariote'sku ũs.

27 Aça' Judasa' pana's jxpa'gaçpkaçxha', eçxthē'ja' txajx ũuste u'kak.

Aça' Jesusa' Judasa's na'jĩnak we'we:

—Kĩh yũuya'waçxawa, dud kxtey myuu jĩte',

28 mesate ũ'na u'psa' maa yuhwa jiyumeeta' txã'wē we'weni's.

29 Maai' yu' na'wētx yaaki': Judasa' vxyu jxaawsate', kxah wá' Jesusa' fxiestate peejiwa'ja's weykaja', meeçxawa puuplesatx wá' kĩhçxáawa peeskaja' sũju'tx.

30 Naapkaçxha' Judasa' pana's ũ'na'wa kasehna u'kh. Txã'wē yuuçte', çxhi'dxni yã'kh yu'.

U'se jxkaahnisa

³¹ Judas u'jni e'su', Jesusa' na'wěk pta'sx:

—Dxus Nçxi'k Nasa Yuusá's açxha' tuuthe'jnik yuu, aç'a' Nçxi'kwa Ney'a's tuuthe'kh.

³² Dxus Nçxi'k Nasa Yuusa' Ney'a's tuuthe'jeçpkaçxha', Neywa Nçxi'ka's tuuthe'jena, nawa açxhíi txã'wě yuuya'wa'.

³³ Adx nçxi'kkuēwe'sx, jwee yu' txaçx ũsme'nja i'kwe'sx yakh. Adxa' judiuwe'sxtxi nyafxíi we'weçxa': I'kwe'sxa' adxa's pakweene'kwe. Nawa adx u'jweçthu kxte' yujxa' âjameene'kwe jînath we'we, sa' i'kwe'sxtxiwa txã'wěyçxáath we'we'.

³⁴ I'kwe'sx yakh nvxiituçthu u'se jxkaahnisa's, puutx ya'peeygãhna fxi'zewa'ja's. Adx ma'wětká i'kwe'sxtxi peeygãhna fxi'ze', txã'wěy i'kwe'sxwa puutx ya'peeygãhna mfxi'zewe.

³⁵ Txã'wě puutx ya'peeygãhna fxi'zete', maa nasawa jiyutxna i'kwe'sx adxa's nwěese'jsatewa.

Pedro' ĩsxiiwa'jsatewa Jesus pta'sxni

(Mt 26.31-35; Mr 14.27-31; Lk 22.31-34)

³⁶ Txajũ' Simon Pedro' na'jĩnak Jesusa's paapējx:

—Jxpe'jsa, ¿mtee u'jweçga? jĩte', Jesusa' na'jĩnak pta'sx:

—Adx u'jweçthu kxte' yujxa' âjameene'ga açxhíi yu'. Nawa e's yu' yuweene'ga jítewa,

³⁷ Pedro' ki'kin paapējxku:

—Jxpe'jsa ¿kĩh yuuçxa açxhíi yu' yujxa' âjamée yuuki'th? Adx uuwa'ja's yuhwa ũukhya'mée ũsthu, idxa's peeygãaweete jĩte',

³⁸ Jesus we'weçxa':

—¿Isaga txã'jĩ'á'? Nawa adxa' na'jĩ'th na':
atalx we'wemeyna, adxa's jiimeeth jĩna tekx us
ĩsxiijaçyã'j yuune'ga jĩk.

14

Jesusa' Dxus tasxte kaapa'ja'jwa'jsa

¹ Jesusa' na'jĩk:

—I'kwe'sx ũuste fxĩikãhna nxusmée meswe.
Wejx yuwa Dxusçxá's yajkxna meswe, sa' adx-
nawa txã'wěyçxáa yajkxna meswe.

² Adx Tata ũsnite', jxkaasena ũswa'j wala ũsa'.
Txã'wě méewaça', meea' jĩna pta'sxni yã'j yu'nja
i'kwe'sxtxi. Txãa pa'ga i'kwe'sx kxtee pa'jwa'ja's
pheu'jya' u'jweçthu.

³ Sa' u'jçxa kxtee i'kwe'sx pa'jwa'ja's pheu'jçxa',
ki' sxawedu'nja i'kwe'sxtxi pe'jna u'jya', kxah
i'kwe'sxwa adx ũsnitey adx yakh ih ũsune'kwe.

⁴ I'kwe'sxa' jii i'kwe mtee u'jweçtewa, sa'
dxi'jnawa jii i'kwe.

⁵ Txajũ' Tomasa' na'jĩnak pějx:

—Jxpe'jsa, mtee u'jweçne'ga nawa kwe'sxa'
jiimeetha'w, sa' dxi'ja'swa jiimeetha'w jĩte',

⁶ Jesusa' pta'sxku dxi'ja's:

—Adx yuuçxáa Dxus tasxte kaapa'ja'jwa'jsath,
sa' adx yuuçxáa kaypuba'jwa'jsameeth, sa' adx
yuuçxáa ĩtxi kaafxize'jwa'jsath. Aça' adxpa'ga
yuuçxáa maawa adx Tata tasxte pa'jya' ajatxna.

⁷ I'kwe'sxa' adxa's jiyuwaça', adx Tata
ma'wēsatewa jiyune'kwe. Txã'wěçxawa açxha'
jiyu i'kwe, uyna ũsi'kwe txãa adx Tata'.

⁸ Txãa adx Tata' jĩte', Fxelipe' na'wěk pějx:

—Jxpe'jsa, iidx Tata's ãate mkaavxya'j kwe'sx uykahn. Txã'wẽçxáa peejxtha'w jĩte',

⁹ Jesusa' pta'sxku:

—Adxa' i'kwe'sx yakh nakwe txaçx ũsthu açá' ¿ãçxh pa'jwa adxa's jiyumey wá'ga? Adxna uysa', adx Tatanak uyu'. Açá' ¿ma'wẽga Tata's mkaavxya'j jĩna pẽyi'?

¹⁰ Jiyu'çmée wá'ga, adxa' Tata yakh багаçxtewa nesthu yu', açá' txã'wẽy Tatawa adx yakh nesa'. Na'wẽ we'we'th na' peekx ũusuh yajkxçxa txã'wẽ we'we'çmeeth. Tata adx yakh ũssa txãa we'wekaatheçxáath we'we'.

¹¹ Jiyuçxa mneeyũuwe: Bagaçxtewa adxa' Tata yakh e'zsay ih nestha'w yu'. Txã'wẽ e'zĩ ihne'ta fxi'ze' sũhmeçxawa, adx mjĩnisaçxáatxwa uyçxa', Tata yakh ũssaçxak txã'wẽ ewsatx mjĩ' sũhna mneeyũuwe.

¹² Isath we'we', adxna ũuste jxpa'gasa' adx na'wẽy mjĩiya' ãjatxna. Nawa txã'wẽçxáamée, adx mjĩinite jxthaakwe wala mjĩiya' ãjatxna, txã'wẽ ãjakahníçxáa adxa' u'jweçthu Tata tasxna.

¹³ Sa' i'kwe'sxa' Tata's kĩh pẽywa'j ji'phçxawa, adxa's pẽyine'kwe açá' adxa' i'kwe'sx pẽyni's jxuka kxtey yu'nja, kxah Nçxi'kpa'gate Tata weçxani yuuna.

¹⁴ Na'jĩ'th na': adxa's kĩh pẽjxtewa jxuka kxtey yu'nja.

Jesusa' Dzus Espiritu's kaajxa' neeyũuni

¹⁵ I'kwe'sxa' adxa's peeYGãjaççxa', adx jxkaah-nitxi' nwẽese'jna kxtey myuuwe.

16 Aça' adx Tata's i'kwe'sx pa'gate neewe'we'nja, i'kwe'sxtxi pu'çxwa'jsa teeçx adx na'wēysa's kaakhan. Txã' Dxus Espiritu isasaçxá's kaajiyu'jsa' txã' багаçxtewa i'kwe'sx yakh nes yuuna.

17 Naa kiwetewe'sxa' txãa Espiritu's uyya' ãjameeçxa' jiyuya'wa ãjameetxna, txãasa jxpa'gaya'wa ãjameetxna. Nawa i'kwe'sxa' jii yã'ji'kwe, txãa Espiritu i'kwe'sx yakh ũstewa, sa' багаçxtewa txutemée nes yuuna.

18 I'kwe'sxçxáatx nvxihtxa'wameeth. Ki' sx-awedu'nja i'kwe'sx yakh ũsya'.

19 Naajũ' txaçxmeynaçxáa nasa' adxa's peena yu' uymeetxna. Nawa adxa' uuwa'jsameeth, txãa pa'ga i'kwe'sxwa uuwa'jsameei'kwe, txãasa i'kwe'sx yu' adxa's uyuune'kwe.

20 Txajũ txãa ente ew jiyune'kwe adxa' Tata yakh nes yuusatewa, naapkaçxha' i'kwe'sxa' adx yakhi'kwe nes yu' aça' adxa' i'kwe'sx yakhthu nes yu'.

21 Adx jxkaahnitx nwēese'jna kxtey yuuna fxi'zesa' adxa's isa ũusuh jxuka yaakxsaçxa txã'wē yuutxna. Aça' adx Tata' txã'wē yũusatxi' peeygãjana, aça' adxwa txã'wē yũusatxi' peeygãhçxa ãate vxyaana nes yu'nja.

22 Txã'jite', Judas Iskariotemée, vxite Judasa' na'wēk pējx:

—Jxpe'jsa, çkĩh yuuçxa kwe'sxçxáatx ãate vxyaaçxa', vxite nasa naa kiwetewe'sx yuutxi' vxyaamée yuuki'g? jite',

23 Jesus paçxa':

—Adxa's ũusuh jxuka yaakxsa' adx jxkaahnitx nwēese'jna kxteytxi yu'. Aça' txã'wē yũusatxi'

adx Tata' peeygãja'k. Aça' txã'wẽ nwẽese'jsa yakh yu' nes yu'nja'w Tata yakh.

²⁴ Nawa adx jxkaahnitx nwẽese'jsame', adxa's yaakxsameeçxa txã'wẽ yuuna. Na'wẽ adx kaapiya'jnitx wẽse'ji'kwe txã' adxçxáa kaapiya'jnimeeta'. Adx Tata kaapiya'jnita'.

²⁵ I'kwe'sx yakh nee ũsí na'wẽ pta'sxiçthu.

²⁶ Nawa Dxus Espiritu's Tata' kajana adx na'wẽy i'kwe'sxtxi pu'çxna ũskahn txã' jxuka kaapiya'jana. Sa' na'wẽ kîhwa pta'sxthu txãatxi'sa' jxuka kaayaki'jina.

²⁷ I'kwe'sx ũuste wēt yajkxna fxi'zewaja's peesuçthu. Naa kiwete wēt fxi'zewaja's nasa ũsu'tx txã'wẽsaçxá's peesuçmeeth. Adx ma'wẽtka ũuste wētçxáa yajkxna fxi'ze' txã's i'kwe'sxtxi peesuçthu. Txãa pa'ga fxîkâhna ũukhmée meswe.

²⁸ U'jçxa ki' sxawedu'nja i'kwe'sx yakh ũsya' jîni's wẽse'jyã'ji'kwe na', adxna isa wedxdx-ihçxa', weçxweçxa yaakine'kwe, txãa pa'gatey adxte jxthaakwesa adx Tata tasxna u'jweçthu naa pa'ga.

²⁹ Dxiikhëy pta'sxiçthu, kxah adx pta'sxni kxtey yuuna pa'the', isa yuh pta'sxi'ga sũjune'kwe.

³⁰ I'kwe'sx yakh jwee yu' we'wena ũsya' âjame'nja, txãa pa'gatey naa kiwete jxkaahna ũssa eçxthê'ja' adxa's kîhwa yũuya' âjane'jmeeçxawa, yuja'.

³¹ Makwe âjane'jmeeçxawa kxtey yuuna, kxah naa kiwete nasa jxukaysa jiyutxna, adx Tata's nwẽese'jçxa txajx jxkaahni's kxtey yuusatewa.

Txã'jîna jxã'jçxa', kiiteçxa ayjxu u'jwega jîk.

15

Maawa Jesus yakh txutemée fxi'zewa'j

¹ Adxíi ũ'tasx na'wēsath, aça' adx Tata' txāa tasxa's pheu'jsa na'wēsa'.

² Ku'ta yūnsameetxi' spē'the'k, nawa ku'ta yūnsatxi' sūupi'jna pheu'ju'k jxthaakwe yūnkahn.

³ I'kwe'sxa' pheu'jniyā'j ũsi'kwe adx kaapiya'jni's nwēese'pha'ga.

⁴ Adx yakh txutemée meswe, adxwa ma'wē i'kwe'sx yakh txutemée ũstka txā'wēy. I'kwe'sxa' peekx jii i'kwe: ku'ta çxpiteçxa ũssa' yūnu'çme'. Txā'wēy i'kwe'sxwa adx yakh txuteeçxa ũsçxa', Dxus dxi'pte selpiiya' ājameene'kwe.

⁵ Adxa' ũ'tasx na'wēsath aça' i'kwe'sxa' ũ'tasx ku'ta na'wēsa i'kwe. Adx yakh txutemée ũsçxa', wala selpiine'kwe. Aça' adxwa i'kwe'sx yakh txutemée fxi'ze'nja. Adx yakhmée yu', i'kwe'sxa' kīh yuhwa yūuya' ājameene'kwe.

⁶ Aça' ũ'tasx ku'ta yūnsameetxi' ma'wēga spēthe'thçxa ya'kabu', txā'wēy ya'yuuna adx tasxu txutesatxi'.

⁷ I'kwe'sxa' adx yakh txutemée fxi'zeçxa adx kaapiya'jni's peçxkanameeçxa', kīhwa pēyine'kwe, aça' ya'ūsuna.

⁸ Adx kaapiya'jni's nwēese'jçxa' Dxus dxi'pte wala selpiiya' ājane'kwe. Aça' txā'wē yūute', adx Tata's wala tuuthe'jni yuuna.

⁹ Adx Tata' adxa's wala peeygāja'k, aça' adxa' txā'wēythu i'kwe'sxtxi peeygāja'. Aça' adx peeygānijū txutemée meswe.

10 Adx jxkaahnitx nwēese'jçxa', adx peeygāaniteçxáa fxi'zene'kwe, adxwa ma'wētká Tata jxkaahnitx nwēese'jçxa' txajx peeygāaniteçxáa fxi'ze' txā'wēy.

11 Na'wēth pta'sx kxah adx ma'wētká weçxweçxa yajxna fxi'ze', i'kwe'sxwa txā'wēy багаçxwa weçxweçxa yajxna fxi'zene'kwe.

12 Adxa' na'wēth jxkaaja': adx ma'wētká i'kwe'sxtxi peeygāja', i'kwe'sxwa txā'wēy puutx ya'peeygāhna mfxi'zewe.

13 Namiku's nwe'weya' sūhçxa peekx ĩtxi fxi'zeni's ivxiitunisaçxáa peeygāni yaase'.

14 I'kwe'sxa' isa adx namiku dxihçxa', adx jxkaahni's kxtey yuune'kwe.

15 Aça' txā'wē yūusatxi' peena yu' selpisáa jīna kxsusme'nja. Selpisá' txajx patron kīh yuuya'watewa jīmēek fxi'ze'. Nawa i'kwe'sxa' adx Tata we'wenitxi' jxuka jii i'kwe, txāa pa'ga adxna selpisáa i'kwe jīna kxsusmēe, adx namiku i'kwe jīnaçxáa kxsusu'nja.

16 I'kwe'sx khuē'y adxa's txhitxhmeei'kwe, wejxwa adxthu i'kwe'sxtxi txhitxh. Sa' i'kwe'sx mteewa u'jçxa Dxus dxi'pte selpiina fxi'zekahnthu neewe'we', aça' i'kwe'sx txā'wē Dxus dxi'pte selpiina u'juni' kxul yuumeena. Txā'wē yūusatxi' adx Tata' jxuka ũsuna kīh pējxtewa, adxa's pi'kxçxa pējxte'.

17 Na'wē yūuwa'ja'sthu i'kwe'sxtxi jxkaaja': Puutx ya'peeygāhna mfxi'zewe.

Jesus txhitxnisatxi' naa kiwetewe'sx açeni

18 Naa kiwetewe'sxa' adxa's nyafxkhēytxi ahçe na' i'kwe'sxtxiwa txã'wēyçxáa açetxna, nawa nxusmée meswe.

19 I'kwe'sxa' naa kiwetewe'sxwaça', nasa' wedxixna, txãawe'sx pwe'sx ma'wēta wedxi' txã'wēy. Nawa adxa' i'kwe'sxtxi txhitxthu naa kiwejū, txãa pa'gatx naa kiwetewe'sxa' i'kwe'sxtxi açe', naa kiwetewe'sxmée yã'ji'kwe naa pa'ga.

20 Miiyajkxwe adx na'jīna we'weni's: Maawa selpisá' txajx patronte jxthaakwesame' jīni's. Adxa' i'kwe'sxtxi jxpe'jsath na's yuhwa ikhya' pakwe'tx na' i'kwe'sxtxiwa txã'wēyçxáa ikhya' pakweetxna. Sa' adx kaapiya'jni's nwēese'jsa', i'kwe'sx kaapiya'jni'swa nwēese'jetxna.

21 Adx pa'gaçxáa i'kwe'sxtxi pkxuutxna, adxna kaahsa's jiyumeeçxa.

22 Dxus jxkaahni's adx pta'sxya' kīhmeewaça', txãawe'sxa' yuuwemeesa yuutxna. Nawa açxha' adx pta'sxni's jiyutx na' yuuwemeetha'w jīya' ājameetxna.

23 Adxna açesa' adx Tatanawa açesata'.

24 Txãawe'sx ksxavxysu kim yuhwa vxit-ya' ājanimeesa's adx kaavxya'ja'jmeewaça', yuuwemeesa yuutxna. Nawa makwe txã'wē adx ājani's kaavxya'ja'the uyçxawa, adxna açe'tx. Aça' adxna açesayã'j yu' adx Tatanawa açesata'.

25 Nawa txãawe'sx leyte na'wē fxi'jni ūsa': adxna ahçetx kīhwa yuuwemeetewa jī'k txã' kxtey yuukahntxi txã'wē yū'.

26 Nawa i'kwe'sxtxi pu'çxwa'jsa Dzus Espiritu isa ew kaajiyu'jwa'jsa's adx Tata tasxu kaja'nja txã' adx kintewa ew kaajiyu'juna.

27 Aça' i'kwe'sxwa txã'wëy adx kimtewa pta'sxine'kwe, i'kwe'sxa' nyafxii i'kwe adx yakh ũssa yu' naa pa'ga.

16

1 I'kwe'sxtxi pkxuute', nxusna wala kuh yaakxkahmen na'wë pta'sxiçthu:

2 ahçeçxa judiuwe'sx pkhaakhenijũ kutxi'jçxa peena yu' jxpa'gameetxna i'kwe'sxtxi. Sa' txã'wëçxáa yũumée i'kwe'sx maaítxi' ikhetxna, nawa txãawe'sx yu' Dxusa's selpiina ũstha'w sũhna txã'wë yũutxna.

3 Txãa açesawe'sxa' adx Tata's jiimeeta', sa' adxnawa jiimeeta', txãasa txã'wë pkxuutxna.

4 Aça' kxahth yaçkhëy txã'wë pta'sxi' na' txã'wë yũuwa'j en ähte', adx pta'sxni's yaakine'kwe.

Dxus Espiritu kaajiyu'jni

Txã'wë pkxuüwa'ja's nyafxii yu' pta'sxmeeth, txãa pa'gatey kĩhwa meek yu' adx i'kwe'sx yakh ũste'.

5 Nawa açxha' adxna kaahsa tasxte u'jweçthu. Nawa i'kwe'sxa' maa yuhwa pëyi'çmeei'kwe çmtee u'jweçga? jĩna.

6 Txã'wë pëjxmeeçxa i'neeçxáa i'kwe wala nxusu', adx u'jweçthu jĩna pta'sxte'.

7 Nawa isath pta'sxi': adx u'jmeete', i'kwe'sxtxi pu'çxwa'jsa' kĩhmeena. Nawa adx u'jçxa', txã's kaja'nja. Txãa pa'ga pejka u'jwa'j yuh ji'pthu, i'kwe'sxtxi pu'çxwa'jsa's kaajxa'.

8 Aça' txã' naa kiwete kĩhçxa', nasatx Dxus dxi'pte yuüwe pkalsa yuhtha'w sũhwa'ja's kaaũsuth'e'jena. Sa' Jesusa' kĩhte yuhwa

yuuwemée ewsa maatzwa jxuka nwe'wewa'jsa yuh yu'ga sũhwa'ja'swa ew kaajiyu'juna. Txã'wěy yuuwesatxi' Dxusa' ewmeete yuh nvxiituna sũhwa'ja'swa kaaũusuthe'jena.

⁹ Maawa adxa's jxpa'gaya' wa'lpa'ga txã'wě pkal yuuwesata'.

¹⁰ Adxa' maatzwa jxuka nwe'wewa'jsaçxafi nwe'wewa'ja's vxitna uuçxa adx Tata tasxna u'the', peena yu' uymeene'kwe.

¹¹ Sa' yuuwesa' ewmeete neeyũuwa'jsane'tka'w sũjkahnii naa kiwete jxkaahna ũssa eçxthě'j yuja'swa ewmeete yã'kh nvxiitni yuu.

¹² I'kwe'sxtxi wala pta'sxwa'j ji'phíçxáath, nawa açxhii yu' ew jiyuya' ajameene'kwe.

¹³ Nawa Dxus Espiritu kĩhçxa', txãa ente i'kwe'sxtxi' jxuka ew kaajiyu'juna, txã' isa we'wenisaçxá's kaajiyu'jsa'. Txã' peekçxáa we'wemée, Dxus kwe'we'jniçxá's pta'sxina, sa' kĩh yuuya'watewa dxiikhěy kaajiyu'juna.

¹⁴ Adx ma'wēsatewa ew jiia' na' txãasa i'kwe'sxtxiwa kaajiyu'juna, adxa's tuuthe'jsa' naa pa'ga.

¹⁵ Adx Tata ma'wēsate', adxwa txã'wěysa íçxáath. Txãa pa'ga Espiritu' adx ma'wēsatewa wejx ew kaajiyu'juna jĩnath pta'sxi'.

Nxuswa'j en skhēwte', weçxa en pa'jni

¹⁶ Açxha' adx Tata tasxna u'jwa'j ajãça', aç'a adxa's uymeene'kwe. Nawa vxite enkhē' adxa's ki' uyuune'kwe.

¹⁷ Txã'jĩte', txãa yakh u'jusawe'sxa' na'wětx puutx ya'paapěyi':

—¿Ma'jĩçxaki'k txã'wẽ we'we'? Æçxha' adx Tata tasxna u'jwa'j ãjaça', aça' adxa's uymeene'kwe. Nawa vxite enkhẽ' ki' uyuune'kwe jĩ'k sa',

18 ¿kĩh we'weçxaki'k adx u'jwa'j ãjaça' jĩna we'we'? nawa kwe'sxa' jiyu'çmeetha'w.

19 Txã'wẽ jiyuwẽena ũsni's Jesusa' jiyuçxa' pta'sxku:

—Adx Tata tasxna u'jwa'j ãjaça', aça' adxa's uymeene'kwe. Nawa vxite enkhẽ' ki' uyu-une'kwe jĩnath we'we aça' ¿txã'sna wá'kwe i'kwe'sx pwe'sx jiyu wẽena puutx paapẽyi'?

20 Isath we'we': I'kwe'sxa' nxusna ũ'nene'kwe, aça' naa kiwete nasa yu' wala weçxaatxna. Nawa i'kwe'sxa' makwe nxusna ũsçxawa, nxusu en skhẽwte', weçxweçxa neeyũune'kwe.

21 Na's mjiyuwe: U'ywa nasa upxya'wate ãça'aççxa', wala pxthaa yu'k akate. Nawa luuçx upxte', weçxaweete txãa aka yuuni's peçxkana'k.

22 Txã'wẽy i'kwe'sxwa ãçxhĩi yu' nxusu'i'kwe. Nawa adxa's ki' uyçxa', weçxweçxa yajxna neeyũune'kwe. Aça' i'kwe'sx weçxweçxa yaakxni's kim yuhwa kusa'jya' ãjameena.

23 Txã'wẽ adxa's ki' uyniijũ', txajũyã'ja' jxuka jiisa adxa's paapẽywa'j ji'phumeene'kwe. Nawa adx Tata yu'sa' kĩhwa jxuka pẽjxya' ãjãne'kwe adxa's pi'kxçxa, aça' txã' jxuka ũsuna.

24 Nawa i'kwe'sxa' ãçxh pa'jwa adx Tata's kĩh yuhwa pẽynimée i'kwe adxa's pi'kxçxa. Mpẽjxwe wakx, sa' jxpa'gaçxa' wala weçxaane'kwe.

Kristo' kīhnawa jxuka knayni

²⁵ Ejemplo yakhçxáath kaaja'da'jna pta'sx i'kwe'sx jiyukahñ. Nawa āate pta'sxwa'j en āhte', peena yu' ejemplo yakh kaaja'da'jna pta'sxme'nja, wejxwa tehwed āateçxaçxáa pta'sxi'nja adx Tata ma'wēsatewa.

²⁶ Txā'wē āate pta'sxwa'j en āhte', i'kwe'sx yuu adx Tata's pějxya' ājane'kwe, makwe adx yu' i'kwe'sx pa'gate we'we pu'çxmeetewa.

²⁷ I'kwe'sxa' adxa's wedxçxa jxpa'gai'kwe, Dxus tasxu yuusana sūhna. Txāa pa'gak adx Tata' i'kwe'sxtxi peeygāja'.

²⁸ Adxa' Tata tasxu kasehçxa, naa kiwete yuwe'th, sa' āçxha' naa kiwe's nvxihtçxa ki' u'jweçthu adx Tata tasxna jīte',

²⁹ txāa yakh u'jusawe'sxa' na'jītx:

—Āçxh yuuçxa' ejemplo yakh kaaja'da'jmée, tehwed āate pta'sxna ūsgu.

³⁰ Āçxha' jiyutha'w, idxa' kīhnawa jxuka jiiġ. Txāa pa'gatha'w ew jiyu Dxus tasxu yuusatewa. Txāasa kim yuhwa idxa's paapēywa'j ji'phmeeta' jīte',

³¹ Jesusa':

—¿Āçxha' jiyu'kwe'? jīnak we'we.

³² Āçxha' ena' ājk, aça' āçxhii i'kwe'sxa' teeçxsa na'wēçxah fxiifxii txuteene'kwe, sa' adxçxáana nvxiitune'kwe. Nawa adxçxáa yu' neeyūume'nja, Tata' adx yakh ūsa' naa pa'ga.

³³ Txā'wēth adx yakh fxi'zewa'ja's jxuka pta'sxi', kxah adxa's neewe'weçxa', ūukhmée wētwe't yaakine'kwe. Naa kiwete' thēyte nxuste fxi'zewa'ja's ji'phune'kwe. Nawa adxa's

çxhãçxha miijajkxwe, txãa pa'gatey naa kiwete ewmeesa's adxa' knayyã'th naa pa'ga jik.

17

Jesusa' txajx jxpe'jnisatx Dxus kusete neewe'weni

¹ Jesusa' txã'wẽ pta'sxna jxã'jçxa', cielute pa-gayçxa Dxus yakh puutx we'wek na'jina:

—Tata, ena' ajk. Iidx Nçxi'k kimtewa nasa jiyukahna äate mkaavxya'ja', kxah Nçxi'kwa idxa's äate kaajiyu'juna nasatx.

² Nasa jxukaysatx jxkaahwa'ja's adxna üsgu, iidx üsni yuutxi' jxukaysatx pçuwa'jmée itxi fxi'zewa'ja's üskahn.

³ Aça' pçuwa'jmée itxi fxi'zewa'ja's ji'phu wëeçxa', teeçx Dxusçxáa üsgu txã'sna jiyuwa'j ji'phta', sa' txã'wëy iidx kaahnisa Jesukristo'swa jiyuwa'j ji'phta'.

⁴ Adxa' naa kiwetewe'sxtxi' ew kaajiyu'th idx ma'wësatewa, sa' idx mjii kaahni's jxã'jyã'th.

⁵ Tata, naa kiwe meetey ma'wëtka'w cielute ih weçxana üsu', açxha' txã'sa' ki' mah kxtey ih weçxana üswa'ja's.

⁶ Naa kiwejü maaítxi' txhitxgu, aça' txãawe'sxtxi' kaajiyu'th idx ma'wësatewa. Txãawe'sxa' iidx jiiitx yu', nawa adx jxpe'khangu üs, aça' txãawe'sxa' nwëese'jtx iidx jxkaahni's.

⁷ Sa' na'wë kījkihwa yūuya' aja'th txãa ajanisa' iidx jxkaahnitxna sūhwa'ja's ji'phutx.

⁸ Iidx yuwe pta'sxkaahg txã'sa' pta'sxthu, aça' txãawe'sxa' jxpa'gaçxa üuste yu'akhtxi. Sa' adxa' Dxus kaahnisa iidx tasxuh yuusatewa jiita'.

9 Adxa' txãawe'sxtxi' iidx kuseteth nvxihtna neewe'we'. Naa kiwete idxa's jiimeesa ũsta' txãawe'sx pa'gate neewe'we'çmeeth. Adx jxpe'khan ũsgu txãawe'sx pa'gateçxáath neewe'we', txãawe'sxa' iidx jĩta' naa pa'ga.

10 Jxuka adx jĩ' iidx jĩçxaçxáata'. Aça' jxuka iidx jĩ' adx jĩçxaçxáata'. Txãawe'sxpa'ga yuuçxáath txakwe wala weçxaawa'ja's ji'phu.

11 Adxa' naa kiwete txaçxmeeçxáa ũswa'j ji'phtu. Nawa txãawe'sxa' naa kiwete neeyũutxna, naapkaçxha' adxa' yuhth idx yakh ũsya'. Tata, adxna ũsgu txãawe'sxtxi' meen jxpe'j jxpa'yakx, kxah teeçxsa na'wẽçxah idx yakh txutemée fxi'zetxna adxwa ma'wẽtka idx yakh txutemée fxi'ze' txã'wěy.

12 Adxa' naa kiwete txãawe'sx yakh ũsçxa', idx pu'çxte' jxpa'yakxth jxpe'jna fxi'ze adxa's jxpe'khan ũsgu txãawe'sxtxi's. Aça' jxukaysa yu' vxitumeeta', naasáa teeçx vxituwa'jsane' yu' txãa yuuçxáak vxitu, Dxus librute pta'sxna fxi'jni' kxtey yuukahn.

13 ãçxha' yuhth idx ũsgu kxteey. Nawa naa kiwete nee ũsí txã'wẽth idxa's neewe'we', kxah txãawe'sxa' ũukhmée weçxana fxi'zetxna, adxwa na'wẽth weçxana fxi'ze' txã'wěy.

14 Iidx pta'sx kaahni's pta'sxth jxpe'jnisatxi', nawa naa kiwetewe'sxa' txãawe'sxtxi' açe'tx, adx jxpe'jnisawe'sxa' adx na'wěy naa kiwetewe'sxmeeta' naa pa'ga.

15 Adx jxpe'jnisatxi' naa kiwejũ mkuutxi'j jĩ'çmeeth, naasáa eçxthẽ'j kaypuba'khamen meen nwe'we jĩnaçxáath neewe'we'.

16 Adxa' naa kiwetewe'sxmeeth, aça' txãawe'sxwa naa kiwetewe'sxmeeta'.

17 Txãawe'sxa' iidx jiiçxáa yuukahn idxçxáa jxpe'jene'ga, isasa's kaapiya'jna. Iidx kaapiya'jni' kaypuba'jwa'jsame'.

18 Idxwa ma'wēga adxa'sa' naa kiwete kaah, txã'wēy txãawe'sxtxiwa kajaçthu.

19 Sa' txãawe'sx pa'gate adxwa iidx kusete neeyũuçthu, kxah txãawe'sxwa iidx jxpe'jwa'jyã'j neeyũutxna.

20 Txãawe'sx pa'gateçxáa neewe'weçmeeth. Txãawe'sx iidx yuwe's pta'sxte', maawa idxa's jiyuwa'jsa ũstxna txãawe'sx pa'gate ja'dath neewe'we'.

21 Txãawe'sx jxukaysa teeçxsa na'wēçxaçxáa yajkxna kwe'sx yakh txutemée fxi'zekahnthu neewe'we', Tata, idxwa na'wē adx yakh fxi'zена ũsgu aça' adxwa idx yakh fxi'zена ũsthu txã'wēy yuukahn. Txã'wē yuuçxa teeçxsa na'wēçxaçxáa ih fxi'zetxna, kxah naa kiwetewe'sxa' jiyutxna adxa' iidx kaahnisatewa.

22 Idx yakh ih fxi'zewa'ja's adxa's ũsgu aça' txãawe'sxtxiwa idx yakh ih fxi'zewa'ja's adxa' ũsthu, adxwa idx yakh ma'wētka'w teeçxçxáa na'wē fxi'ze' txã'wēy ih fxi'zekahn.

23 Adxa' txãawe'sx yakh fxi'zete', idxwa adx yakh fxi'zene'ga, kxah txãawe'sxa' teeçxçxáa na'wēsa yuutxna. Aça' txã'wē yũute', naa kiwetewe'sxa' jiyutxna adxa' iidx kaahnisatewa. Sa' adxa's ma'wēga peeygãja', txã'wēygu peeygãja' naawe'sxtxiwa.

24 Tata, adxa's jxpe'khan ũsgu aça' txãawe'sxtxi' adx ũsnitey ith ũs jxthãasu',

naa kiwe meetey adxa's peeygãhçxa weçxana jxpe'jna ũsu'g txã'sa' uykahn.

²⁵ Tata, idxa' wala yuh ewsatewa, naa kiwetewe'sxa' idxa's jiimeeta'. Nawa adx yu' jiith, aç'a' adx jxpe'jnisawa jiita' adxa' iidx kaahnisatewa.

²⁶ Adx jxpe'jnisatxi' kaajiyu'th idx kimtewa, sa' kaajiyu'jna nes yu'nja, kxah idx adxa's peeygãani' txãawe'sx ũuste nes yuute', adxwa txãawe'sx ũuste nes yu'nja.

18

Jesusa's preesu'jni

(Mt 26.47-56; Mr 14.43-50; Lk 22.47-53)

¹ Jesusa' txã'wẽ neewe'wena jxã'jçxa', Cedron yu'kuten ktejkana u'kh, txãa yakh u'jusawe'sx yã'jçxa teeçx walta ũsa' kxtee u'kaya'.

² Txãa waltate' Jesus yakh u'jusawe'sxa' maz uswa txãa yakh pkhaakheya' u'kasatx yu', naa pa'gak Jesusa's ikhkahn dukhwa'jsa Judasa' jii yu'.

³ Txãasak Judasa' jiiyã'jçxa', soldauwe'stxxi pe'jçxa kxtee pa'j u'j dxuus yat thegsawe'sx yã'jçxa. Txãa dxuus yat thegsawe'sx yu', sacerdote npiiçthẽ'j vxite' fxariseowe'sx jxkaahnitx yu'. Vxite' fxtũ, vxite' kçxilx, vxite' lampara atçxatx pa'j.

⁴ Nawa Jesusa' txã'sna ma'wẽwa pkxuuçxa ikhwa'j ãhte jiiyã'jçxa', puutx uyya' kasejk. Sa' na'jĩk:

—¿Kimnakwe pakwé'? jĩte',

⁵ txãawe'sxa' na'wẽtx pas:

—Jesus Nasarethuwe'sxa'stha'w pakwé' jíte',
Jesusa' na'jĩk:

—Adxíi txãath.

Aça' Judaswa kxtee txãawe'sx yakh ũsu'k,
Jesusna kuuwe'jna.

⁶ Txajũ' adxíith jĩna Jesus we'weniteçxaá, Je-
susa's tudwa'jsa' e'su ya'skaçxa kiwegatx wete.

⁷ Aça' Jesusa' ki' pějxku:

—¿Kimnakwe pakwé'? jíte', txãawe'sxa':

—Jesus Nasarethuwe'sxa'stha'w pakwé' jĩnatx
pas.

⁸ Aça' Jesus pasçxa':

—Adxíith jĩna pta'sxyã'th. Aça' adxa's pak-
weeççxa', adx yakh u'jusawe'sx ayte ũsta'
txãawe'sxtxi' kuçx yuunuwe u'khan jĩk.

⁹ Jesusa' nyafxíi we'weçxa': Tata adxna
jxpe'khan ũsku txã' jxukaysa yu' vxitumeeta'
txã'jĩni' kxtey yuukahnku txã'jĩ.

¹⁰ Naapkaçxha' Simon Pedro' kçxilx
ya'kxnisa's jxkuutxi'jçxa teeçx piçthě'j thũ'wě
paçuwe'sxa'sku spě'th. (Txãa piçthě'ja'
sacerdote npiçthě'ja's selpisáa Malko yaasek
yu'.)

¹¹ Aça' Jesusa' Pedro's na'jĩnak jxkaah:

—Kçxilxa's wainutey myu'akh. Adx nxuste
pxthaa yuuwa'ja'sku Tata' jxthãasu' aça' txã'sa'
jxpa'gawa'jsameena sũju'wá'ga jĩk.

Jesusa's Anas tasxna jxũna u'jni

(Mt 26.57-58; Mr 14.53-54; Lk 22.54)

¹² Txajũ' soldau npiçthě'j txajx nasa yakh
vxite' dxuus yat thegsawe'sx yã'jçxa Jesusa's
tudçxa',

13 Anas tasxna khuẽ'y jxũna u'jtx. Txãa Anas duh Kaifxasa' sacerdote npiĩçthẽ'kh yu' txãa anxute.

14 Txãa Kaifxasiik judiuwe'sxtxi na'jĩna we'wesa yu': Nasa jxukaysa pa'gate teeçx piçthẽ'jçxãa uuwaç wejx ewna jĩsak yu'.

Pedro ĩsxiini

(Mt 26.69-70; Mr 14.66-68; Lk 22.55-57)

15 Jesusa's tudçxa jxũna u'the', Simon Pedro' vxite piçthẽ'jyã'jçxa Jesus e'stey u'kh. Txãa vxite piçthẽ'j yu' sacerdote npiĩçthẽ'j yakh jiisak yu', txãa pa'ga txãa npiĩçthẽ'jsa yat patxute u'kak Jesus u'kanitey.

16 Nawa Pedro' u'kamée vxitx pukate neeyũuk. Txãasak sacerdote npiĩçthẽ'j yakh jiisa' kxtee vxitxte thegsa yakh puutx we'weçxa Pedro's dxiite ka'ga'j.

17 Aça' vxitxte thegsa' pějxku Pedro's:

—Idxa' ¿naa piçthẽ'j yakh u'jusameegá'? jĩte', Pedro pasçxa':

—Txãa yakh u'jusameeth jĩk.

18 Txajũ' kxtee selpisaawe'sx vxite' dxuus yat thegsawe'sx yã'jçxa kumaçxa ipx yuthçxatx bajçxna ũsu' patxute. Aça' Pedrowa kxtee txãawe'sx yakh ipx pukate bajçxna ũsu'k.

Anas Jesusa's paapěyni

(Mt 26.59-66; Mr 14.55-64; Lk 22.66-71)

19 Txajũ' Anasa' paapějxya' takhku Jesusa's:

—Idx yakh u'jusawe'sxa' ¿kimtxna? aça' idxa' ¿kĩhga kaapiya'ja'? jĩte',

20 Jesusa' na'jĩnak pas:

—Adxa' ãateçxaçxáa iuwe'weth nasa jxukaysa dxi'pte, judiuwe'sx pkhaakhenisu vxite' dxuus yatte judiuwe'sx jxukaysa ksxavxyte Dxus yuwe's kaapiya'jna. Adxa' paaçte yu' kîhwa iipta'sxmeeth.

²¹ Aça' adxa's ¿kîjxa'ga paapëyi'? Adx pta'sxni's wëse'jsatx mpaapëjx, aça' txãawe'sxa' pta'sxixna adx kîh we'weni'swa. Txãawe'sxa' adx pta'sxni's jiita' na'.

²² Txã'wë we'wete', dxuus yat thegsawe'sx teeçx kxtee ùssa' kuseju Jesus dxi'pga pehtxaçxa', na'wëk juuna' we'we:

—Anasa' sacerdote npiiçthë'ja' aç yuja' ¿txã'wë pasu'gá'? jîte',

²³ Jesus pasçxa':

—Adx ewmée we'wete', mpeeta'sx kîhsu ewmée we'weçtewa. Nawa ewsaçxá's we'weçte', ¿ma'wëtega adxa's txã'wë pkxú'? jînak pas.

²⁴ Txã'wë yūunijū' Anasa' Jesusa's tudni ũsín, jxūna u'khaakh sacerdote npiiçthë'j Kaifxas tasxna.

Pedro ki' ïsxiini

(Mt 26.71-75; Mr 14.69-72; Lk 22.58-62)

²⁵ Naapkaçxha' Pedro' ipx pukate bajçxna ũsíčxáak yu'. Aça' kxtee ũssawe'sxa' na'wëtx pëjx:

—Idxa' ¿naa piçthë'j yakh u'jusa yuh meega wakx? jîte', Pedro':

—Adxa' txãameeth jînak pas.

²⁶ Aça' sacerdote npiiçthë'ja's selpisáa teeçxsa' na'jînak pëjx:

—Idxa's ¿uymeewá'ntka waltate txãa yakh ũste? (Txã'jĩna pēysa' Pedro teeçx piçthē'j thũ'wē's spē'thku txãa piçthē'j nwe'sxku yu.)

²⁷ Txã'jĩna ki' pējxte', Pedro' ki'kin ĩsxiijaçpkaçxa', atalxa' we'wek.

Jesusa's Pilato tasxna jxũna u'jni

(Mt 27.1-2, 11-14; Mr 15.1-5; Lk 23.1-5)

²⁸ Txajũ' Kaifxas yatu Jesusa's jxũna u'jtx ne'jwe'sx Pilato tasxte nuypa'jya'. Naapkaçxha' khikhiiçku yu'. Txajũ' judiuwe'sxa' ne'jwe'sx u'pnite u'kameeta', pkal pēetheejena sũhçxa. Txã'wē pkal pēetheethe', Paskuatewe'sxa's ũ'ya' ājame'nja'w sũhçxatx u'kamée.

²⁹ Txãa pa'gak Pilato' eka kasehçxa' na'jĩna paapējx:

—Naa piçthē'ja' ¿kĩhga yuu aç txã'wē pāatxhĩ'khna yujkwe? jĩte',

³⁰ txãawe'sxa' na'wētx pas:

—Kĩhwa yuuwemeewaça', iidx tasxte nuypa'jwa'jmeene'tka'w yu' jĩte',

³¹ Pilato' na'jĩnak jxkaah:

—Jxũna me'jwe, sa' i'kwe'sx ley ma'wē jxkaathe', kxtey yuune'kwe jĩte', judiuwe'sxa' na'jĩnatx we'we:

—Kwe'sxa' judiuwe'sxtha'w na' ¿ma'wē ikh kaajxa' ājakxtha'w?

³² Jesusa' ma'wē uuwa'jsaçxawa pta'sxku txãa pta'sxni' kxtey yuukahntxi txã'jĩna we'we.

³³ Txajũ' Pilato' txajx u'pnite ki' kũhçxa', Jesusa's pa'yaçxa na'wēk paapējx:

—¿Idxa' judiuwe'sxtxi jxkaahsawá'ga? jĩte',

³⁴ Jesusa' na'jĩk:

—¿Iidx ũusuh yajkxçxaga txã'jĩ'á'? meeçxa' ¿vxitesa txã'jĩna adxa's kxsuusni's wëse'jçxawá'ga txã'jĩ'? jĩte',

³⁵ Pilato' na'wëk pas:

—Adxa' judiumeeth. Iidx nwe'sx vxite' sacerdote npiiçthë'jwe'sxtxi adx tasxte idxa's nuykũh, aça' idxa' ¿kĩhga ewmée yũu? jĩte',

³⁶ Jesusa' pta'sxku:

—Adx jxkaahwa'ja' naa kiweteme'. Txã'wë naa kiwete jxkaahwa'jsawaça', adx ju'gusawe'sxa' puiiwa'jne'ta yu', judiuwe'sx kusete adxa's dukhkahmen. Açá' naa kiwete jxkaahsameeth.

³⁷ Txã'jĩte', Pilato' ki' pëjxku:

—Txã'wëçxa' ¿idxa' jxkaahsa dxihgá'? jĩte', Jesusa' na'jĩk:

—Idx kxsusu'g txã'wëíith. Naa kiwete upçxa isasaçxáana pta'sxya'th yuwé'. Maawa isasa's nwëese'jwa'jsa' adx we'weni's jxpa'yakxtxi wëse'je' jĩte',

³⁸ Pilato' na'wëk paapëjx:

—Na'wë isasa' jĩna we'we'g txã' ¿kĩhna?

Jesusa' ikhwa'j yuuni

(Mt 27.15-31; Mr 15.6-20; Lk 23.13-25)

Txã'wë Jesusa's paapëjçxa', Pilato' ki' eka kasejk judiuwe'sxtxi na'jĩna pta'sxya':

—Naa piçthë'j ewmée yũuni's kĩhte yuhwa uyu'çmeeth.

³⁹ Nawa Paskua fxiesta iisa teeçx preesu kaatx-hweete'je'i'kwe na' ¿ãçxwa txã'wëy txhweete jx-thãasu'kwe' naa judiuwe'sxtxi jxkaahsa's? jĩte',

⁴⁰ jxukaysa na'jĩtx:

—Txã'sa' kaatxhweete'jnu. Barabasçxá's mkaatxhweete'j jĩnatx weyi'.

Txãa Barabasa' iiméh jxthaakwe pesweesak yu'.

19

¹ Txajũ' Pilato' Jesusa's jxũna u'jçxa peçxuukwekaakh.

² Aça' soldauwe'sxa' çhũçhna tadx vxitçxa Jesus dxikthete kaafxĩkhe'jtx, sa' atxh behsa's kaapã'çxi'jçxatx na'jĩ':

³ —¡Vxiwa, judiuwe'sxtxi jxkaahsa! Txã'jĩçxatx dxi'pga petxaatxa.

⁴ Txajũ' Pilato' ki' eka kasehçxa' na'wêk we'we: —Mthegwe, naa piçthê'ja' ayte ũsa', nawa txã'sa' makwe paapêjçxawa txajx ewmée yũuni's uymeeth.

⁵ Txã'jĩ yã'the', Jesusa' kasejk dxikthete çhũçha's tadxçxa kaafxĩkhe'jni, sa' atxh behsa's kaapã'çxi'jni. Aça' Pilato' na'jĩnak we'we:

—Açxha' ayte ũsa' txãa piçthê'ja's mthegwe.

⁶ Txã'jĩte', sacerdote npiçthê'jwe'sx vxite' dxuus yat thegsawe'sx Jesusa's thegçxa' na'jĩnatx sus weyya' kiite:

—Kluuste mkaafxuçu'j, kluuste mkaafxuçu'j jĩte', Pilato' na'jĩk:

—I'kwe'sx jxpa'gaçxa kluuste mfxuçwe. Adxa' kĩh yuhwa ewmée yũuni's jiyuya' ajameeth jĩte',

⁷ judiuwe'sxa' na'jĩnatx we'we:

—Kwe'sxa' ley ji'ptha'w txãa leya' ikhkaja'k, Dxus Nçxi'kthu jĩna u'jupa'ga.

⁸ Txã'jĩni's wêse'jçxa', Pilato' jweeíçxáak wala ũukhwa'j ji'phu.

9 Sa' txajx u'pnite u'kaçxa', na'jĩnak Jesusa's paapẽjx:

—Idxa' ¿majũwe'sxga? jĩtewa, Jesusa' pasme'.

10 Aça' Pilato' na'jĩk:

—¿Adxa's kĩh yuuçxaga pasu'çmée? ¿Ji-imeewá'ga? adxa' kluuste fxuçkahn jxkaajxa'wa ãjawa'jsath, sa' txã'wẽy kaatxhweete'jya'wa ãjawa'jsath jĩte',

11 Jesusa' pasku:

—Dxuspa'gameewaça', idxa' kĩjxa'yuhwa ãjawa'jsameeg adxa's. Nawa iidx kusete adxa's dukhsa' idxte jxthaakwe yuuwesa'.

12 Txã'jĩna we'wenijũ' Pilato' wala pa'pçxuk Jesusa's txhweetewẽçxa. Nawa judiuwe'sxa' na'jĩnatx sus we'we:

—Naa piçthẽ'ja's txhweteçxa', jxkaahsa Cesar namikumée yuune'ga. Maawa fxiy jxkaahsa' txã' Cesar ju'gusame'.

13 Txã'jĩni's wẽse'jçxa', Pilato' Jesusa's ekate pe'jna u'jçxa', jxkaahna u'pnite kaçxku. Txãa jxkaahna u'pni' Gabata yaasek yu' hebreo yuwete. Txã' Kwet Fxuçni jĩni'.

14 Paskua fxiesta ãjaçtek txã'wẽ yũuna ũsu'. Txajũ' Pilato' na'wẽk we'we judiuwe'sxtxi:

—I'kwe'sxtxi jxkaahsa' ayte ũsa' jĩte',

15 txãawe'sxa' na'wẽtx sus we'we:

—¿Peekx uuna, kluuste mfxuç! jĩte', Pilato' na'wẽk we'we:

—I'kwe'sxtxi jxkaahsa yuja's, ¿ma'wẽ kluuste fxuç kajaki'th? jĩte', sacerdote npiiçthẽ'jwe'sxa' na'wẽtx we'we:

—Kwe'sxtxi jxkaahsa' Cesar yuuçxá'. Vxite jxkaahsa yu' ji'phmeetha'w.

16 Txã'wě we'we yã'the', Pilato' Jesusa's txãawe'sx kusete kluuste fxuçkahn dukhte', jxūna u'jtx.

Jesusa's kluuskhē fxuççxa ikhni

(Mt 27.32-44; Mr 15.21-32; Lk 23.26-43)

17 Jesusa' txã'sna fxuçwa'j kluusa's yakhçxa çxhabu kasehna u'kh, teeçx ahte Gólgota yaase' kxtee pa'j. Txãa Gólgota yu', Uusáa Jxkwet Dxi'th jīni' hebreo yuwete'.

18 Kxtee pa'jçxa' Jesusa's kluuste fxuçtxi, vxite e'z piçthē'jtx txã'wěy, Jesusa's pxāhte txahçxa.

19 Txajū' Pilato' kluus kajkwete na'wēk ki'p kaah: Jesus Nasarethuwe'sx, judiuwe'sxtxi jxkaahsa jīna fxi'jni's.

20 Aça' kluuste fxuçni' çxhab utxatek yu', naa pa'ga maazkuēe judiuwa txãa fxi'jni's thegu'tx. Txãa fxi'jni', hebreo, griego, latin yuwejuk fxi'jni yu'.

21 Aça' sacerdote npiiçthē'jwe'sx vxite' judiu npiiçthē'jwe'sxa' na'jīnatx Pilato's paatxhī'kh:

—Judiuwe'sxtxi Jxkaahsa jīna fxi'j na'wě, Adxa' Judiuwe'sxtxi Jxkaahsath jī'k jīna fxi'jwaça', wejx ewna.

22 Nawa Pilato pasçxa' na'jīk:

—Adx txã'wě fxi'jni's kim yuhwa yu'pthehmeena.

23 Txajū' soldauwe'sxa' Jesusa's kluuste fxuç yã'jçxa', Jesus athni's pahzsa txu'dedetx soldau iisa teeçxteeçx. Sa' atxha'swa txã'wěytxi yūu wēe, nawa txã' tehwedsaçxáak yu' kaçnimeesa.

24 Aça' soldauwe'sxa' na'wětx puutx we'we:

—Txã's sudeya'mée swerte kaja'nja'w kim jïi neeyũutewa jiyuya'.

Soldauwe'sx txã'wě yũuni' Dxus librute na'wě fxi'jni kxtey yuuk: Adx athni's txãawe'sx pwe'sx txu'dedetx swerte kaahçxa jïna fxi'jni'.

²⁵ Txã'wě yũuçpkaçxha', Jesusa's fxuçni kluus pukate nji'jwa ũsu'k vxite' Jesus nji'j yũkwe, vxite' Kleofxas nyu Maria, vxite' Maria Magdalena.

²⁶ Aça' Jesus nji'j pukate Jesus wedxnisa ih ũste Jesus uyçxa', nji'ja's na'jik:

—Naa piçthě'ja' i'kwe's jxpe'jena nçxi'k na'wě jičxa',

²⁷ txãa piçthě'ja'swa na'jinak neewe'we:

—Na'sa' iidx mama na'wě jxpe'jene'ga.

Txã'jite', txãa piçthě'ja' txãa oratey Jesus nji'ja's txajx yatna pe'jna u'kh.

Jesus uunü

(Mt 27.45-56; Mr 15.33-41; Lk 23.44-49)

²⁸ Txãa skhěua', Jesusa' jiik yu' jxuka kxtey yuuna u'jweçtewa. Sa' Dxus librute ma'wě fxi'jni kxtey yuukahnu na'jïna we'we:

—Yũ'wěeth jïna.

²⁹ Teeçx tasa vxino utak ũsu'. Aça' txãa vxinote esponja's tuupha'jçxa fxtüte aççxa Jesus yuwete utxatx çxazxakahn.

³⁰ Aça' Jesusa' esponja's çxazxaçxa', na'wěk we'we:

—Jxuka jxã'jnik neeyũu jïna'wa, kiiçhuna' uuk.

Teeçx soldau Jesus tabxte yãjani

³¹ Aça' Paskua fxiesta en ãjaç yã'kh yu'. Txãa ena' wala ki'snisa yu'k. Aça' judiuwe'sxa' fxiesta ente uusaawe'sx kakwetx kluuskhẽ nvxiit wẽemeexa', Pilato's pějxtxi kluuskhẽ ki'pnisa çxidatx çxkadedeya' kaakhan, dud uute' kakwetx txajũ kiisya'.

³² Txajũ' soldauwe'sx u'jçxa çxidatx çxkadedetx teeçxsa khuẽ'yna, sa' vxitenawa txã'wẽytxi yũu Jesus pukakhẽ kluuskhẽ u'psa's.

³³ Nawa Jesusnawa txã'wẽy yũuya' utxaana kũhçxa', uunii yã'j u'ptetx uy. Txãa pa'gatx Jesus çxidatx çxkadedemée.

³⁴ Txã'wẽtewa, teeçx soldau yu' Jesus tabxte we'thuk yãja'. Aça' txã'wẽ yãjate', ee yu' yakhku uwu.

³⁵ Txã'wẽ yũunisa's pta'sxsa' txajx yafxju yuuk uy, sa' isak we'we'. Sa' jiia' isa we'weççxawa, kxah i'kwe'sxwa txã'wẽ yuh yũune' sũhwa'ja's ji'phune'kwe.

³⁶ Nawa Dxus libroute' na'wẽ fxi'jni': Iidx dxi'thtxi' teeçxçxáa yuhwa çxkahdemeetxna jĩni kxtey yuukahntxi txã'wẽ yũu.

³⁷ Dxus libroutey vxite ajkhẽ na'wẽ fxi'jni ũsa': We'thu yãjaçxa', thegutxna jĩ'k.

Jesusa's pedaní

(Mt 27.57-61; Mr 15.42-47; Lk 23.50-56)

³⁸ Txã'wẽ yũuniijũ' Jose yaasesa Arimatea çxhabuwe'sxa' Pilato tasxte utxaak Jesus kakwe's pějxçxa jxũna u'jya'. Aça' Pilato' ewna jĩte', Josea' Jesus kakwe's pedaaya' jxũna u'kh. Naa Jose yu' Jesus ju'gsak yu', nawa judiuwe'sxtxi ũukhçxa kimwa jiyunimeene' u'jusa yu'.

39 Txajũ' Nikodemowa pa'kh, Jesus yakh kus puutx we'wesa. Txãa yu' treinta kilo ãjk yu'çe tũ'sçxa pa'j, miçxa aloe yakh ka'dnisa.

40 Txajũ' Jose' Nikodemo yakh Jesus kakwe's jxũna u'jçxa', yaptxi txãa yu'çe ka'dnisa yakh, judiuwe'sx ma'wẽne'ta uusáa kakwetx pedá' txã'wẽytxi yũu.

41 Jesusna kluuste fxuçni utxasu walta ũsu'k. Aça' txãa waltate' uusáa pedawa'j kafx u'sesa u'pu'k, kim yuhtxwa pedanimeesa.

42 Txkaatx Jesus kakwe's khikh, kafxa' utxatek u'pu' aça' ki'swa'j enwa ãjaçku yu' naa pa'ga.

20

Jesus ki' itxi yuuni

(Mt 28.1-10; Mr 16.1-8; Lk 24.1-12)

1 Ki'sen khikhiiçte wala kusíi çxhi'dxtey Maria Magdalena' pedaní kafxte kũhçxa', kxtee aphni kweta's kiisniyã'j ũstek uy.

2 Txajũ' wuwuuçxáak u'j Simon Pedro vxite' Jesus wedxnisa tasxte pa'j. Sa' na'jĩnak pta'sx:

—Kwe'sxtxi jxpe'jsa kakwe's jxũna u'jne'ta pedaniiũ, aça' jiyumeetha'w mkaane'ta khikh nanwa jĩte',

3 Pedrowe'sxa' teehwed pedani kafxte thegya' u'jtx.

4 E'zĩi wuwuuçxáatx u'j, nawa teeçxsa' thaakwe dud wuwuuçxa Pedro's phyahççxa' txãa khuẽ'y yaçte kũjk pedani kafxte.

5 Sa' kuyçxa' Jesus kakwe's yapnisaçxáa u'ptek uy. Nawa txã'wẽ uyçxawa, dxiite yu' u'kame'.

6 Txajũ' Pedrowa e'ste kũhçxa pedani kafxte u'kak, sa' txãawa uyku Jesus kakwe's yapnisaçxáa ki'pni u'pte.

7 Sa' Jesus dxikthé yapnisa yu' tpehgçxa fxiite ki'pni u'ptek uy.

8 Aça' yaçte kũusawa kafx dxiite u'kaçxa', txã'wẽ tpehgçxa ki'pni u'pte uyçxa', Jesusa' ìtxi yuu yuhgaxx sũhwa'ja's ji'phuk.

9 Nawa Jesusa' uuçxa ki' ìtxi yuuna jĩna Dxus librute fxi'jni's jiyumeytxi yu'.

10 Txajũ' Pedro Juanwe'sxa' txã'wẽ uyçxa', yatna ki' sxawedna u'jtx.

Maria Magdalena's Jesus vxyaani

(Mr 16.9-11)

11 Pedrowe'sx u'jweçpkaçxha', Maria Magdalena' pedaní kafx pukate ù'nena neeyũuk. Txã'wẽ ù'nena u'píi, kafx dxiiga kuyçxa' uyku

12 e'z angeleswe'sx çxihmeçxáa iikãh jxaath-satx Jesus kakwe's khikhnite pdxi'p kaçxçxa u'pu', teeçxa' dxikthé ja'date vxite' çxida ja'date.

13 Txajũ' angeleswe'sxa' na'wẽtx pẽjx:

—I'kwe' ¿kĩh yũuçxa ù'nena ùskwe? jĩte', na'jĩnak pas:

—Û'kwe's jxpe'jsa's jxũna u'tha, aça' jiimeeth mkaane'ta khikh nanwa.

14 Txã'wẽ we'wepu'na' yu'thegçxa', teeçx piçthẽ'j yujuçxa ùstek uy. Nawa txã' Jesusna sũhme'.

15 Aça' Jesusa' na'jĩk:

—I'kwe' ¿kĩh yuutekwe ù'né'? sa' ¿kimnakwe pakwé'? jĩte', Maria' kxtee walta thegsa wá' txã'wẽ we'we' sũhçxa', na'wẽk pas:

—Idx wá'ga ù'kwe's jxpe'jsa kakwe's jxūna u'j na' mpeeta'sx mkaa khikhçxawa, ù'kwe jxūna u'khan.

¹⁶ Txã'jĩte' Jesusa':

—¡Maria! jĩnak kxsus.

Aça' Maria tuphiçxa na'wëk we'we hebreo yuweju:

—¡Raboni! jĩk, txã' Kaapiya'jsa jĩni'.

¹⁷ Txajũ' Jesusa' na'jĩk:

—Adxa's jxa'dxnuwe, Tata tasxna u'jmeythu naa pa'ga. Wejxwa adx yakhthë'jwe'sxtxi pta'sxya' me'jwe na'jĩna: Adx Tata' i'kwe'sx Tataiúçxá', sa' adx Dxusa' i'kwe'sx Dxusiúçxá' tx-ajx tasxna u'jweçthu jĩnak pta'sxkaah jĩne'kwe.

¹⁸ Txã'wë pta'sxkaathe', Maria Magdalena' pta'sxya' u'kh: Jxpe'jsa's uythu, aça' txãak txã'jĩna pta'sxkaah jĩk.

*Jesus txãa yakh u'jusawe'sxtxi vxyaani
(Mt 28.16-20; Mr 16.14-18; Lk 24.36-49)*

¹⁹ Txãa ki'sen entey kusa' Jesus yakh u'jusawe'sxa' yatte u'kaçxa vxitxtxi jxuka aphçxatx ũsu', judiuwe'sxtxi ũukhçxa. Txã'wë ũspkaçxha', Jesusa' txãawe'sx pxãhte vxyaaçxa na'jĩnak weçxa:

—Ũukhmée wët wëtçxáa yajkxna meswe.

²⁰ Txã'jĩçxa', txajx kuse kpã'tx pta'sxku, tabxte we'thu yãjani'swa txã'wëy. Aça' txãawe'sxa' Jesusa's uyçxa' wala weçxweçxa yajkxtxi.

²¹ Txajũ' Jesusa' ki' we'weçxa na'jĩk:

—Ũukhmée wëtwëtçxáa yajkxna meswe. Adx Tatawa ma'wëga adxa's kaah txã'wëy adxwa i'kwe'sxtxi kajaçthu.

22 Txã'jĩçxa', txãawe'sx kajkwesu puthku na'jĩna:

—Miipa'gawe Dvus Espiritu's.

23 I'kwe'sxa' maaxwa we'weçxa': I'kwe'sx pkaltxi' Dvusa' peltunaĩna jĩte', peltunãyni yuutxna. Nawa peltunaĩmeena jĩte', peltunãynimée neeyũutxna jĩk.

Jesus ĩtxi yuuni's Tomas uyni

24 Jesus yakh u'jusaçxawa, Tomas melxisu jĩnisa' meek yu' Jesus txã'wẽ vxyaani ente yu'.

25 Aça' Tomas yu' uymeetewa, Jesus yakh u'jusa vxite yu' pta'sxtxi:

—Kwe'sxtxi jxpe'jsa's uytha'w jĩna.

Txã'wẽ pta'sxtewa, Tomasa' na'jĩk:

—Kusete klaus kpã'vxitni's uyçxa txajx tabxte we'thu yãjani'swa uyçxa txkaa adx kuse's kaah-meeçxa yu', txã'wẽ ĩtxi yuune' sũhme'nja jĩk.

26 Txajũ' teeçx ki'su skhẽwniite', Jesus yakh u'jusawe'sxa' ki' pkhaakheçxa ũsu'tx teeçx yatte. Aça' txãa ente' Tomaswa txãawe'sx yakh pkhaakhena ũsu'k. Aça' makwe vxitxtxi aphçxa ũstewa, Jesusa' txãawe'sx pxãhte vxyaaçxáak yuu, sa' na'jĩk:

—Ũukhmée wẽtwẽtçxáa yajkxna meswe jĩk.

27 Txã'wẽ we'weçxa', Tomasa'swa na'jĩk:

—Adx kusete kpã'yuunitx thegçxa, txkaa iidx kuse's mkuupath, sa' adx tabxte we'thu yãjanigawa mkuupath. Txã'wẽ yũuçxa', kuh jwed yajxmée, ĩtxi yuu yuhga sũhwa'jçxá's ji'phune'ga jĩte',

28 Tomasa' na'jĩk:

—¡Adxna jxpe'jsa yuhg, sa' adx Dvus yuhg!

29 Txajũ' Jesusa' na'jĩk:

—Tomas, âçxha' adxa's uyçxa', ĩtxi yuu yuhga sũhwa'ja's ji'phug. Nawa adxa's uymeeçxawa txã'wẽ ĩtxi yuu yuhne' sũhna yaakxsawa weçxweçxa fxi'zewa'jsata' jĩnak we'we.

Jesukristo' Dxus Nçxi'k yuh yu'k jĩna pta'sxsa' naa libru'

30 Naa kiwete kim yuhwa âjanimeesatx Jesusa' wala kuh kaavxya'ja'kh txãa yakh u'jusawe'sxtxi. Nawa jxuka yu' naa librute fxi'jnimeeta'.

31 Nawa Jesukristo' Dxus kaahni txajx Nçxi'k yuh yu'ga sũhna jiyuçxa' txã'sna jxpa'gaçxa', pçumée ĩtxi fxi'zewa'ja's ji'phukahñ pta'sxna fxi'jnisaçxáata'.

21

Tiberias ĩkh pukate Jesus vxyaani

1 Jesusa' Tiberias ĩkh wala pukate ki'kin na'wẽk vxyaa txãa yakh u'jusawe'sxtxi.

2 Kxtee pkhaakheçxatx ũs yu' Simon Pedro, vxite' Tomas melxisu jĩ'tx txãa, vxite' Natanael Galilea kiwesu Kaná çxhabetewe'sx, vxite' Zebedeo nçxi'kwe'sx, vxite' e'zsa.

3 Kxtee pkhaakheçxa ũsçxa', Simon Pedro' na'jĩnak we'we:

—Wedx uweya' u'jweçthu jĩte':

—Kwe'sxwa idx yakh yuhtha'w jĩnatx pas txãawe'sxwa.

Sa' teeçx barkote khẽeçxa u'jtx. Nawa txãa kuste' teeçx wedx yuhwa uwemeeta'.

4 Khikhyna sêjeçte', Jesusa' ĩkh pukate vxyaak. Nawa txãawe'sxa' jiyumeeta' kimtewa.

⁵ Txajũ' Jesusa' na'jĩnak pẽjx:

—¿Teeçx wedxçxá' uwekwe'? jĩte':

—Uwemeetha'w jĩna paste',

⁶ Jesusa' na'jĩnak jxkaah:

—Wedx ukhe's paçu ju'gkhẽ makhwe, sa' uweene'kwe jĩte', txã'wẽy ukhe's akhçxa', yu'ju wezxçxawa kutxi'jya' çxhãçxhameeta', wedx iiméh kuh khẽepa'ga.

⁷ Txã'wẽ yũuni's uyçxa', Jesus yakh u'jusa wedxnisa' Pedro's na'jĩnak pta'sx:

—¡Naate ũsa' txã' kwe'sxtxi jxpe'jsa'!

Txã'jĩna we'weçpkaçxha', Pedro' txã'wẽ wẽse'jna' ropa's jathna'wa yu'khẽ khẽek Jesus tasxna u'jya'. (Ropa's pahdeçxak ũs yu', txãasak txã'wẽ yũu.)

⁸ Barkote neeyũusáa vxite yu' wedx ukhe's wezxna kũhtx, cien metroçxáak ũhdxte kũuwa'j peejx yu' naa pa'ga.

⁹ Txajũ' barkoju jxsa'jçxa', ipx yuthni çxhã'çxha kajkwega teeçx wedx petx pan khikhni ũstetx uy.

¹⁰ Txajũ' Jesus we'weçxa':

—Ãçxh uwenisa wedxtxi mneejxũhwe jĩte',

¹¹ Simon Pedro' barkote khẽena'wa wedx ukhe's wedx walasaçxaçxáa ji'phsa's wezxna kũjk ũhdxte pa'j. Ciento cinkwenta y tres wedxku ji'phu'. Kxaazkuẽe wedx ji'phçxawa, ukhe' suteme'.

¹² Txajũ' Jesus pa'yaçxa':

—Ũ'ya' myuhwe jĩk.

Txã'wẽ pa'yate', txãa yakh u'jusawe'sxa' jxpe'jsatewa jiyuçxa', maa yuhwa: Idxa' ¿kinga? jĩna pẽyi'çmeeta'.

13 Aça' Jesusa' utxaana kũhçxa', pana's uwena'wa txãawe'sxtxi ũsu'sku, wedxnawa txã'wëy.

14 Jesus uuçxa ki' ïtxi yuunijũ naa yakha' tekh us vxyaak txãa yakh u'jusawe'sxtxi.

Jesus Pedro's neewe'weni

15 Txajũ' ũ'na jxã'jçxa', Jesusa' Simon Pedro's pëjxku:

—Jonas nçxi'k Simon, ¿ayte ũsta' txãawe'sxte jxthaakwega' adxa's wedxi'á'? jïte', Pedro pasçxa':

—Idxa' peekx jüig adx idxa's wedxiçtewa jïte', Jesusa' na'wëk neewe'we:

—Txã'wëçxa', adx piisxakuëtx wedxna miipe'j jïk.

16 Txajũ' Jesusa' Pedro's ki' pëjxku:

—Jonas nçxi'k Simon ¿adxa's wedxi'gá'? jïte', Pedro pasçxa':

—Idxa' jüig adx idxa's wedxiçtewa. Txã'jïte', Jesusa' na'wëk neewe'we:

—Txã'wëçxa', adx piisxaatx sã'jïna miipe'j jïk.

17 Tekh uswa ki' pëjxku Jesusa':

—Jonas nçxi'k Simon, ¿adxa's wedxi'gá'? Aça' Pedro' wala nxusku txã'wë tekh us ¿adxa's wedxi'gá'? jïna pëjxte'. Sa' na'jïk:

—Idxa' jxuka jüig adx idxa's wedxiçtewa jïte', Jesusa' na'jïnak neewe'we:

—Txã'wëçxa' adx piisxaatx jxpa'yakx miipe'j.

18 Isath we'we', nyafxíi piçtakxteya' ropa's peekíi jathe'g, sa' mtee u'j wëeçxawa u'jwe'g. Nawa ñisx yã'the', vxitesa' idxa's tudçxa jxũna u'jwetxna idx u'j wëemeetewa.

19 Jesusa' txã'wẽ we'weçxa', Pedro ma'wẽ yũuni uuçxa Dxusa's äate kaavxya'ja'jwa'ja's pta'sxnak txã'jĩ.

Txajũ' Jesus we'weçxa':

—Adx yakh myuhçxáa jĩnak pi'kx.

Jesus yakh u'jusa wedxnisa

20 Pedro' yu'thegçxa' uyku Jesus wedxnisa's. Txãa wedxnisa'ĩ nmeħ kus ũ'weçte', Jesus pukate kaçxçxa u'pçxa' na'jĩnak pẽysa yu': Jxpe'jsa ¿kim idxa's dukhwa'jsana? jĩna.

21 Txã'sna Pedro uyçxa', na'jĩnak Jesusa's pẽjx:

—Jxpe'jsa, naa piçthẽ'ja's ¿kĩh yuukx? jĩte',

22 Jesusa' na'wẽk pas:

—Adx jxthãaste' naa piçthẽ'ja' uumée u'juma'k adx sxawedna kĩhpkaçx, nawa txã'sa' idxa' yaakxwa'j ji'phmeeg. Idxa' adx yakh fxi'zewa'jçxá's miijajkx.

23 Jesus txã'wẽ we'wepa'ga, txãa piçthẽ'ja' uuwa'jsamée wáana sũhnatx ũsu' Jesus yakh u'jusawe'sx vxite yu'. Nawa uumeena jĩçxa Jesusa' txã'wẽ we'weme', naasáa adx jxthãaste', uumée u'juma'k adx sxawedna kĩhpkaçx, nawa idxa' txã'sa' yaakxwa'j ji'phmeeg jĩnaçxáak we'we.

24 Jesus we'weçxa' txã'wẽ uumeena jĩna we'wenisa piçthẽ'jĩiçxáak pta'sxna fxi'j, aça' isasa yuja's we'we'k sũju'tha'w.

25 Txã'wẽ Jesus kĩjkĩhwa kaavxya'ja'jnıtx jxuka pta'sxna fxi'jwaça', naa kiwete libru yuuwa khẽemeetxna sũju'th.

cv

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd